

# Ieremia

## *KA WANANA*

- <sup>1</sup> NA olelo a Ieremia, ke keiki a Hilikia, no na kahuna ma Anetota, ma ka aina o ka Beni-amina:
- <sup>2</sup> Hiki mai no ka olelo a Iehova io na la, i na la o Iosia i ke keiki a Amona, ke alii o ka Iuda, i ka makahiki umikumamakolu o kona noho aupuni ana:
- <sup>3</sup> A i na la o Iehoikima ke keiki a Iosia, ke alii o ka Iuda, a hiki i ka pau ana o ka makahiki umikumakahki o Zedekia ke keiki o Iosia, ke alii o ka Iuda, a hiki i ka lawe pio ia ana aku o ko Ierusalema, i ka lima o ka malama.
- <sup>4</sup> Alaila, hiki mai la ka olelo a Iehova ia'u, i mai la,
- <sup>5</sup> Mamua aku o ka'u hana ana ia oe iloko o ka opu, ike aku no au ia oe; a mamua aku o kou puka ana mawaho mai o ka opu, hoolaa aku au ia oe, a hoolilo no au ia oe i kaula no na lahuikanaka.
- <sup>6</sup> Alaila, i iho la au, Auwe, e ka Haku, e Iehova! aia hoi, aole au i ike i ka olelo, no ka mea, he keiki no wau.
- <sup>7</sup> Aka, olelo mai la o Iehova ia'u, Mai olelo oe, He keiki no wau; no ka mea, e hele aku no oe i ka poe a pau a'u e hoouna aku ai ia oe, a o ka mea a'u e kauoha aku ai ia oe, o kau ia e olelo aku ai.
- <sup>8</sup> Mai makau i ko lakou maka; no ka mea, owau pu no me oe, e hoopakele ia oe, wahi a Iehova.

- <sup>9</sup> Hohola mai o Iehova i kona lima, a hoopaa iho la  
i ko'u waha; a olelo mai la o Iehova ia'u, Aia  
hoi, ua haawi aku au i ka'u mau olelo iloko  
o kou waha.
- <sup>10</sup> E nana hoi, ua hoolilo wau ia oe i keia la, maluna  
o na lahuikanaka a me na aupuni, e uhuki,  
a e wawahī, a e luku, a e hoohiolo, e kukulu,  
a e kanu no hoi.
- <sup>11</sup> A hiki mai ka olelo a Iehova ia'u, i mai la, E  
Ieremia, heaha kau e ike nei? I aku la au,  
ke ike nei au i kookoo o ka laau alamona.
- <sup>12</sup> Alaila, i mai la o Iehova ia'u, Ua pono kou ike  
ana; no ka mea, e kiai no wau i ka'u olelo,  
e hooko ia.
- <sup>13</sup> Hiki hou mai la ka olelo a Iehova ia'u, o ka lua ia,  
i mai la, Heaha kau e ike nei? I aku la au, Ke  
ike nei au i ka ipuhao e lapalapa ana, a mai  
ke kukuluakau mai ka huli ana o ka waha.
- <sup>14</sup> Olelo mai la o Iehova ia'u, Mai ke kukuluakau  
mai e puka mai ai ka hewa maluna o ka poe  
a pau e noho ana ma ka aina.
- <sup>15</sup> No ka mea, aia hoi, e hea aku no wau i na  
ohana a pau o na aupuni ma ke kukulu-  
akau, wahia Iehova; a e hele mai no lakou, a  
e hoonoho kela mea keia mea o lakou i kona  
nohoalii ma kahi e komo aku ai i na pukapa  
o Ierusalema, a ma na pa a pau e puni ana  
ia wahi, a ma na kulanakauhale a pau o ka  
Iuda.
- <sup>16</sup> A e hai aku no au i ko'u hoopai ana ia lakou,  
no ko lakou hewa a pau, i ka poe i haalele  
mai ia'u, a i kuni i ka mea ala no na'kua e, a  
hoomana i ka hana a ko lakou lima iho.

- <sup>17</sup> Nolaila, e kakoo oe i kou puhaka, a e ku mai, a e olelo ia lakou i na mea a pau a'u e kauoha aku ai ia oe. Mai makau oe i ko lakou maka, o hoohilahila aku au ia oe imua o lakou.
- <sup>18</sup> No ka mea, aia hoi, ua hana aku au ia oe i keia la i kulanakauhale paa, a i kia hao, a i mau pa keleawe no ka aina a pau, a no na alii o ka Iuda, a no ko lakou mau luna, a no ko lakou mau kahuna, a no na kanaka o ka aina.
- <sup>19</sup> A e kaua mai no lakou ia oe, aole nae lakou e lanakila maluna ou, no ka mea, owau pu no me oe, e hoopakele ia oe, wahi a Iehova.

## 2

- <sup>1</sup> A HIKI mai la ka olelo a Iehova ia'u, i mai la,
- <sup>2</sup> O hele, e kala ma na pepeiao o ko Ierusalema, e i aku, Ke olelo mai nei o Iehova, penei, Ua hoomanao aku au ia oe, i ka lokomaikai o kou wa opiopio, i ke aloha o kou wa i mare hou ia'i, i kou hahai ana mamuli o'u maloko o ka waonahele, ma ka aina i lulu ole ia.
- <sup>3</sup> Ua laa no ka Israela no Iehova, a me na hua mua o kona mea ulu. O na mea a pau i hoopau ia ia, ua hewa no lakou; e hiki mai no ka hewa maluna o lakou, wahi a Iehova.
- <sup>4</sup> E hoolohe mai oukou i ka olelo a Iehova, e ko ka hale o Iakoba, a me na ohana a pau o ka hale o ka Israela.
- <sup>5</sup> Ke i mai nei o Iehova penei, Heaha ka hewa i loaa i ko oukou mau makua iloko o'u, i hele loihi aku ai lakou mai o'u aku nei, a ua hele hoi

mamuli o ka lapuwale, a ua lilo lakou i mea  
lapuwale?

- <sup>6</sup> Aole hoi lakou i ninau iho, Auhea o Iehova, ka  
mea nana i lawe mai ia kakou, mai ka aina o  
Aigupita mai, a alakai hoi ia kakou maoko o  
ka waonahele, maloko hoi o ka aina i paapu  
i na auakua, a me na lua, mawaena hoi  
o ka aina maloo, a me ke aka o ka make,  
mawaena o ka aina i hele ole ia e kanaka,  
a noho ole ia hoi e ke kanaka?
- <sup>7</sup> A lawe mai au ia oukou maloko o ka aina ai  
nui i ai oukou i kolaila hua, a me kolaila  
maikai. Aka, i ko oukou komo ana, hoohau-  
mia oukou i ko'u aina, a hoolilo hoi i ko'u  
hooilina i mea e hoopailua ai.
- <sup>8</sup> Aole i olelo na kahuna, Auhea o Iehova? A o  
ka poe hoi i lawelawe ma ke kanawai, aole  
lakou i ike mai ia'u. A hanā hewa mai no hoi  
ia'u ka poe kahu, a ao mai no hoi na kaula  
ma Baala, a hahai no hoi lakou mamuli o na  
mea kokua ole.
- <sup>9</sup> Nolaila, e paio aku au ia oukou, wahi a Iehova,  
a e paio aku no hoi au i na keiki a ka oukou  
keiki.
- <sup>10</sup> E hele ae hoi ma na aina o Kitima, a e nana; a e  
hoouna aku hoi i Kedara, a e noonoo pono,  
a ike, ina paha he mea like me ia.
- <sup>11</sup> Ua hoololi ae nei anei he lahuikanaka i na'kua, i  
na mea akua ole? Aka, ua hoololi ae nei no  
ko'u poe kanaka i ko lakou nani i mea kokua  
ole.
- <sup>12</sup> E kahaha mai, e na lani i keia, a e weliweli loa  
hoi, e lilo oukou i neoneo loa hoi, wahi a  
Iehova.

- 13** No ka mea, ua hana ko'u poe kanaka i na hewa elua; ua haalele mai lakou ia'u, i ke kumu wai ola, a ua eli lakou i na luawai, i na luawai nahaha, aole e paa ka wai maloko.
- 14** He mea hooluhia anei o Israela? he kauwa i hanau ohua ia? No ke aha la ia i lilo ai i ka haoia?
- 15** Uwo mai la na liona hou ia ia, a hoonui aku hoi i ko lakou leo, a hooneoneo iho la i kona aina. Ua pau i ka wela kona mau kulanakauhale, aohe mea e noho ana.
- 16** Ua hoopau no hoi na keiki o Nopa, a me Tahapanesa i kou piko poo.
- 17** Aole anei nau iho i hana i keia maluna ou, i kou haalele ana ia Iehova, i kou Akua, ia ia i alakai aku ai ia oe ma ke ala?
- 18** Heaha hoi kau ma ka aoao o Aigupita, e inu ai i na wai o Sihora? Heaha hoi kau ma ka aoao o Asuria, e inu ai i na wai o ka muliwai?
- 19** Na kou hewa iho no e paipai ia oe, a na kou mau lawehala e ao mai ia oe. E ike hoi oe, a e hoomaopopo, he mea ino, a he mea walania hoi kou haalele ana ia Iehova, i kou Akua, a me ka noho ole ana o ka makau ia'u iloko ou, wahi a Iehova, ka Haku o na kaua.
- 20** No ka mea, mai kahiko loa mai, ua uhaki au i kou auamo, a ua moku hoi ia'u kou mau kaula i paa ai; a olelo iho la oe, Aole au e noho i kauwa, oiai, ua kulou oe maluna o na puu kiekie a pau, a malalo hoi o na laau uliuli a pau, a ua moe kolohe hoi oe.

- 21** Aka, ua kanu no wau ia oe i kumu waina maikai, he hua pono wale no. Pehe la hoi oe i hoololiia'i i lala o ke kumu waina e ia'u?
- 22** Ina e holoi oe ia oe i ka paakai holoi, a hoonui hoi i ka sopa, ua palahea no kou hewa imua o'u, wahi a Iehova, ka Haku.
- 23** Pehe la e hiki ai ia oe ke olelo, Aole au i haumia, aole au i hahai mamuli o na Baala? E nana i kou ala ma ke awawa, e hoomaopopo hoi i ka mea au i hana'i. He kamelo mama no oe e holoholo ana i kona mau ala iho:
- 24** He hoki hihiu hoi, ua maa ma ka waonahele, e hau ana i ka makani no konā makemake iho. Ia ia e lapa kane ai, owai ka mea hiki ke hoohuli aku ia ia? o ka poe a pau e imi ana ia ia, aole lakou e hoomaloeloe ia lakou iho, no ka mea, a hiki i kona mahina, loaa no ia ia lakou.
- 25** E malama oe i kou wawae, o kamaa ole, a me kou puu, o maloo. Aka, olelo mai la oe, Make hewa. Oia, ua makemake au i na malihini, a e hahai no au ia lakou.
- 26** E like me ka aihue i hilahila i kona wa e loaa'i, pela no e hilahila ai ko ka hale o ka Israela, o lakou, a me ko lakou alii, a me ko lakou poe luna, a me ko lakou poe kahuna, a me ko lakou poe kaula,
- 27** E olelo ana hoi i ka laau, O oe ko'u makuakane; a i ka pohaku hoi, Nau no wau i hanau: a ua huli lakou i ke kua ia'u, aole i ka maka. Aka, i ka manawa o ko lakou poino, e olelo mai no lakou, E ala, e hoola mai oe ia makou.
- 28** Auhea kou poe akua au i hana'i nou? E ala mai lakou, ina paha e hiki ia lakou ke hoola ia

oe i kou popilikia. No ka mea, o ka heluna o kou mau kulanakauhale, oia no ka heluna o kou poe akua, e Iuda.

- 29 No ke aha la oukou e paio mai ia'u? Ua hana hewa mai ia'u, oukou a pau, wahi a Iehova.
- 30 Ua make hewa ko'u paipai ana i ka oukou poe keiki: aole i loaa ia lakou ka naauao. Na ka oukou pahikaua no i hoopau i ko oukou poe kaula, e like me ka liona luku.
- 31 E ka hanauna kanaka, e nana oukou i ka olelo a Iehova. He waouahēle anei au ne ̄ ka Israela? He aina pouli hai? No ke aha la i olelo ai ko'u poe kanaka, E aea lealea aku makou, aole makou hei hou aku iou la?
- 32 E hiki anei ke kaikamahine ke hoopoina i kona kahike ana, a me ka wahine mare hoi i kona kaei? Aka, ua hoopoina ko'u poe kanaka ia'u i na la pau ole i ka helu.
- 33 No ke aha la oe e hoomaikai nei i kou aoao, e imi i ke aloha? Nolaila, ua ao aku oe i ka poe hewa i kou mau aoao.
- 34 Ma na kihi o kou aahu, ua loaa ke koko o na uhane o ka poe ilihune hewa ole; aole i loaa ma ka huli ana, aka, maluna no ia o keia mau mea a pau.
- 35 Aka, ke olelo nei oe. Aole o'u hewa, holaila, e huli aku ai kona huhu, mai o'uaku nei. Aia hoi, e paio aku no au ia oe, no ka mea, na olelo oe. Aole au i hewa.
- 36 Heaha kou mea e hele nui aku ai, e hoololi hou i kou aoao? E hilahila no hoi oe ia Aigupita. e like me oe i hilahila ai ia Asuria.

<sup>37</sup> Oia, e hele aku no oe, mai ona aku la, a aia hoi kou mau lima maluna e kou poo: no ka mea. ua hoowahawaha o Iehova i kou mea i hiliuai ai, aole hoi oe e pomaikai ia lakou.

### 3

- <sup>1</sup> KE olelo nei lakou, Iua kipaku ke kane i kana wahine, a hele aku oia, mai ona aku la, a lilo na ke kanaka e, e hoi hou anei kela ia ia? Aole anei e hoohaumia loa ia kela aina? Ua moe kolohe no nae oe me na ipo he nui loa: aka, e hoi hou mai oe ia'u, wahi a Iehova.
- <sup>2</sup> E alawa oe i kou mau maka iluna, a i na wahi kiekie. a e nana hoi i kahi i moe ole ia'i oe. Ma na alanui, ua noho kakali oe ia lakou, e like me ko Arabia ma ka waunahele; a ua hoohaumia oe i ka aina, i kou moe kolohe ana, a i kou haua hewa ana.
- <sup>3</sup> Noliala, ua kaohiia ka ua, aole hoi i hiki mai ka ua hope ana. Aia no ia oe ka maka o ka wahine hookamakama; hoole no oe, aole oe e hoopalaimaka.
- <sup>4</sup> Mai keia manawa aku, aole anei oe e hea mai ia'u, E kuu makua, o oe no ke alakai o ko'u wa opioopio?
- <sup>5</sup> E hoomauhala mau loa anei oia? E hoomauhala anei oia, a hiki i ka hopena? Aia hoi, ua olelo oe a ua hana hoi oe i na mea hewa me kou ikaika a pau.
- <sup>6</sup> Olelo mai no hoi o Iehova ia'u, i na la ia Iosia, i ke alii, Ua ike anei oe i ka mea a ka Israela hoihope i hana'i? Ua hele no oia maluna o

na mauna kiekie a pau, a malalo o na laau  
uliuli a paa, a malaila i moe kolohe ai.

<sup>7</sup> A i aku la au, mahope o kana hana ana i keia  
mau mea a pau, E hali mai oe. ia'u. Aole ia  
i huli mai, Ike ae la kona kaikuaana kipi, o  
ka Iuda.

<sup>8</sup> A ike aku la au, a kipaku aku au i ka Israela no  
ka moe kolohe aua, a haawi ia ia i ka palapala  
hoohemmo; alaila, aole i makau kona  
kaikuaana kipi, o ka Iuda, hele aku no hoi  
ia, a moe kolohe iho la.

<sup>9</sup> A no ka kaulana o kona moe kolohe ana, hoohau-  
mia iho la oia i ka aina, a moe kolohe no me  
ka pohaku, a me ka laau.

<sup>10</sup> Aka, no keia mau mea a pau, aole i huli mai  
kona kaikuaana kipi ia'u me kona naau a  
pau, aka, me ka wahahhee, wahi a Iehova.

<sup>11</sup> A olelo mai la o Iehova ia'u. Ua hoapono ka  
Israela hoihope ia ia iho, mamua o ka Iuda  
kipi.

<sup>12</sup> O hele, e kala aku i keia mau olelo ma ke kukulu  
akau, a e i aku, E hoi mai, e ka Israela hoi-  
hope, wahi a Iehova; aole hoi au e hookau  
aku i ko'u ukiuki maluna o oukou; no ka  
mea, ua lokomaikai au, wahi a Iehova, aole  
hoi au e hoomauhala mau loa.

<sup>13</sup> E hai wale mai hoi oe i kou hewa, i kau hana  
hewa ana ia Iehova i kou Akua, a ua lulu  
aku oe i kou mau aoao i na malihini, malalo  
o na laau uliuli a pau, aole hoi oukou i  
hooloho i ko'u leo, wahi a Iehova.

- 14 E huli mai, e na keiki hoihope, wahi a Iehova, no ka mea, ua mareia au nau: a e lawe no au ia oukou, i hookahi o ke kulanakauhale hookahi, a i elua o ka hale hookahi, a e lawe no au ia oukou i Ziona.
- 15 A e haawi no au ia oukou i poe kahu mamuli o'ko'u naau, nana e hanai ia oukou i ka ike, a me ka naauao.
- 16 A hiki aku i ka manawa e nui ai oukou, a mahuahua ma ka aina, ia mau la, wahi a Iehova, aole lakou e olelo hou, O ka pahu o ka berita o Iehova; aole hoi e komo ia iloko o ka naau, aole lakou e hoomanao ia mea, aole lakou e hele e ike, aole hoi e hana hou ia ia mea.
- 17 Ia manawa, e kapa no lakou ia Ierusalema, o ka nohoalii o Iehova; a e hoakoakoia mai ko na aina a pau imua ona, i ka inoa o Iehova i Ierusalema; aole hoi lakou e hele hou mamuli o ka paakiki o ka naau hewa.
- 18 Ia mau la, e hele pu no ko ka hale o ka Iuda, me ko ka hale o ka Israela, a e hele pu mai no lakou mai ka aina o ka akau mai, a i ka aina au i haawi aku ai i aina hooili no kou poe makua.
- 19 Aka, i iho la au, Pehea la au e waiho ai ia oe iwaena o na keiki, a haawi hoi ia oe i ka aina maikai i aina hooili nani o na pae aina? A olelo aku la au, E kapa mai oukou ia'u, o Ko'u Makua, aole hoi e huli mai o'u aku nei.
- 20 Oiaio, e like me ka wahine haalele ino i kana kane, pela oukou i haalele ino mai ai ia'u, e ko ka hale o ka Israela, wahi a Iehova.

- 21** Ua loheia ka Ieo maluna o na wahi kiekie, o ka uwe ana, e me ka nonoi ana a na mamo a Israela; a ua hookekee lakou i ko lakou aoao, a ua hoopoina lakou ia Iehova i ko lakou Akua.
- 22** E hoi mai oukou, e na keiki hoihope, a e hoola no wau i ko oukou hoihope ana. Aia hoi, ke hele mai nei makou iou la, no ka mea, o oe no o Iehova, o ko makou Akua.
- 23** He oiaio, he mea wahahnee na mea o na mauna mai, a no na kuahiwia lehulehu mai: He oiaio, maloko o Iehova, o ko makou Akua, ke ola o ka Israela.
- 24** Na ka hilahila i hoopau i na hana a ko makou poe makua, mai ko makou wa uuku mai, i ko lakou hipia, a me ko lakou hipia, a me ka lakou keikikane, a me ka lakou kaikamahine.
- 25** Ke moe nei makou ilalo iloko o ko makou hilahila, a ua uhia makou i ko makou palaimaka; no ka mea, ua hana hewa aku makou ia Iehova i ko makou Akua, o makou, a me ko makou poe makua, mai ko makou wa opio, a hiki loa mai nei i keia la, aole hoi i hoolohe i ka leo o Iehova, ko makou Akua.

## 4

- 1** I NA e hoi mai oe ia'u, e ka Israela, wahi a Iehova, e hoi mai no; a ina e hoolei oe i kou mau mea e hoopailua ai, mai ko'u alo aku, alaila aole oe e aea.
- 2** A e hoohiki no oe, ke ola la no o Iehova ma ka oiaio, a ma ka pono, a ma ka maikai; a e

hoopomaikai ko na aina ia lakou iho ma ona la, a ma ona la lakou e kaena'i.

- 3** No ka mea, penei ka olelo ana mai a Iehova i na kanaka o ka Iuda, a me ko Ierusalema, E waele oukou i ko oukou mahinaai, mai kanu oukou iwaena o na kakalaioa.
- 4** E okipoepoe ia oukou iho no Iehova, a e lawe aku oukou i ka omaka o ko oukou naau, e na kanaka o ka Iuda, a me ka poe noho ma Ierusalema, o puka mai ko'u ukiuki e like me ke ahi, a a hoi, aohe mea e hiki ke hoopio, no ka hewa o ka oukou hana ana.
- 5** E hai aku oukou maloko o ka Iuda, a o kala aku hoi ma Ierusalema; a e i aku, E puhi oukou i ka pu ma ka aina; e kala aku, e hoonui i ka leo, a e i aku, E hoakoakoa oukou, a e komo aku kakou iloko o na kulanakauhale i paa i ka pa.
- 6** E kau i ka hae ma Ziona, e hoikaika aku hoi, mai ku malie; no ka mea, e lawe mai no wau i ka hewa, mai ke kukuluakau mai, a i ka make nui loa hoi.
- 7** Ua pii mai ka liona, mai kona ululaau mai; ke hele mai la hoi ka mea luku i na aina; ua puka aku oia, mai kona wahiaaku e hoolilo i kou aina i neoneo; a e anaiia kou mau kulanakauhale, aohe mea koe e noho ana.
- 8** No keia mea, e komo oukou i ka lole ino e kumakena, a e aoa hoi; no ka mea, aole i huli aku ka ukiuki o ke Akua, mai o kakou aku.
- 9** A hiki aku i kela la, wahia Iehova, e maule auanei ka naau o ke alii, a me ka naau o na luna;

e pilihua hoi na kahuna, a e weliweli na kaula.

**10** A i aku la au, Auwe, e ka Haku, e Iehova! he oiaio, ua alakai hewa loa oe i keia poe kanaka, a me ko Ierusalema, i ka i ana mai, E loaa auanei ia oukou ka malu; aka, ua komo ka pahikaua iloko o ka uhane.

**11** I kela manawa, e oleloia mai a keia poe kanaka, a i ko Ierusalema, He makani wela no na wahi kiekie mai o ka waonahale, ma ke ala o ke kaikamahine o ko'u poe kanaka, aole no ka hoomaikai, a me ka hoomaemae.

**12** He makani ikaika ka i hele mai ia'u, mai ia mau wahi mai: ano hoi au e hooponopono ia lakou.

**13** Aia hoi, e pii mai no ia e like me na ao, a e like auanei kona mau kaakaua me ka puahio-hio; ua oi aku ka mama o kona mau lio mamua o ko na aeto. Auwe kakou, no ka mea, ua anaiia kakou!

**14** E Ierusalema e, holoi oe i kou naau, i pau ka hewa, i hoolaia hoi oe. Pohea la ka loihi o ka noho ana o na manao lapuwale iloko ou?

**15** No ka mea, ke hai mai nei ka leo, mai Dana mai, a hoolaha mai hoi i ka lohe i ka popilikia, mai ka mauna o Epaeraima mai.

**16** E hoikeike i ko na aina: aia hoi, e hai aku no Ierusalema, ua hiki mai ka poe kiai, mai ka aina mamao aku mai, a hoonui hoi lakou i ka leo ku e i na kulanakauhale o ka Iuda.

- 17** E like me ka poe kiai i ka mahinaai, pela no lakou e ku e nei ia wahi a puni: no ka mea, ua kipi mai oia ia'u, wahi a Iehova.
- 18** Na kou aoao, a me kau hana ana i hookau mai i keia mau mea maluna ou; nou no keia hewa, he walania hoi ia, no ka mea, ua komo loa no iloko o kou naau.
- 19** O kuu opu, o kuu opu! Ua hookaawiliia au ma kuu naau; ke kani nei ko'u naau iloko o'u. Aole au e noho ekemu ole, no ka mea, ua lohe oe, e kuu uhane, i ke kani ana o ka pu, a me ka hooho o ke kaua.
- 20** Ua heaia ka make maluna o ka make, no ka mea, ua anaiia ka aina a pau. Ua luku hoohikilele ia ko'u mau halelewa, a me ko'u mau paku hoi, ma ka minute.
- 21** Pehea la ka loihi o ko'u ike ana i ka hae, a lohe hoi i ke kani ana o ka pu?
- 22** No ka mea, ua lapuwale ko'u poe kanaka, aole lakou i ike mai ia'u; he poe kamalii lapuwale, aohe o lakou naauao. He akamai lakou i ka hana hewa; aka, aole o lakou ike i ka hana maikai.
- 23** Nana ae la au i ka honua, aia hoi, ua neoneo, a olohelohi hoi; i ka lani kekahī, aohe ona malamalama.
- 24** Nana ae la au i na kuahiwī, aia hoi, haalulu lakou, a naka iho la na mauna a pau.
- 25** Nana aku la au, aia hoi, aohe kanaka, a ua hee aku la na manu a pau o ka laui.

- 26 Nana aku la au, aia hoi, o kahi i nui ka ai, ua waonahele; a ua hoohioloa kolaila kulanakauhale a pau imua o ke alo o Iehova, imua hoi o koua ukiuki nui.
- 27 No ka mea, ke olelo mai nei o Iehova penei, E neoneo auanei ka aina a pau; aole nae au e hooki loa i na wahи.
- 28 No keia mea, e kumakena'i ka honua, a e pouli hoi na lani maluna, no ka mea, ua olelo no wau, ua paa kuu manao, aole hoi au e mihi ana, aole au e huli, mai ia manao aku.
- 29 E auhee no ke kulanakauhale a pau, no ka walaau o na hololio, a me na kanaka kakaka. E holo no lakou iloko o ka ulu-laau, a e pii hoi maluna o na pohaku; e haaleleia no kela kulanakauhale, keia kulanakauhale, aole kanaka e noho ana iloko.
- 30 A anaiia oe, pehe la oe e hana'i? Ina paha e hoaahu oe ia oe i ka mea ula, a kahiko hoi oe ia oe i na kahiko gula, a ina paha e nahae kou mau maka i ka pena, make hewa no kou hoomaikai ana ia oe; e hoowahawaha mai no kou mau ipo ia oe, e imi no lakou e hoopau i kou ola.
- 31 No ka mea, ua lohe no au i ka leo, e like me ko ka wahine e hanau keiki ana, a i ke kuakoko, e like me ko ka wahine i hanau i kana hiapo, i ka leo hoi o ke kaikamahine o Ziona e kumakena ana ia ia iho, e hohola ana hoi i kona mau lima, me ka olelo iho, Auwe au ano! no ka mea, ua paupauaho kuu uhane no ka poe pepehi kanaka.

**5**

- <sup>1</sup> E HOLOHOLO oukou ma na alanui o Ierusalema, a e nana, a e hoomaopopo, a e imi ma kolaila wahi akea, ina paha e loaa ia oukou ke kanaka, ina he mea hana i ka pono, a imi i ka oiaio; a na'u e kala aku i ka hala ona.
- <sup>2</sup> A ina paha lakou e olelo, Ke ola la no Iehova; malaila no lakou i hoohiki wahahnee ai.
- <sup>3</sup> E Iehova e, aole anei kou mau maka ma ka oiaio? Ua hahau no oe ia lakou, aole nae lakou i uwe. Ua hoopau no oe ia lakou, aka, ua hoole lakou, aole lakou e hoonaauao: a ua hana lakou i ko lakou maka a oi ka paakiki i ko ka pohaku; ua hoole lakou, aole e hoi mai.
- <sup>4</sup> A olelo no hoi au, He poe ilihune lakou, ua naaupo hoi; no ka mea, aole lakou i ike i ka aoao o Iehova, aole hoi i ka pono o ko lakou Akua.
- <sup>5</sup> E hele aku no au i na kanaka koikoi, a e olelo aku ia lakou; no ka mea, ua ike lakou i ka aoao o Iehova, i ka pono hoi o ko lakou Akua: aka, o keia poe, ua uhaki loa lakou i ka auamo, ua moku ia lakou na kaula e paa ai.
- <sup>6</sup> Nolaila, na ka liona mai ka ululaau mai e luku ia lakou, a na ka iliohae o ke ahiahi e anai ia lakou; a na ka leopadi e kiai i ko lakou mau kulanakauhale: o kela mea keia mea o lakou e puka aku iwaho, e haehaeia no; no ka mea, ua nui loa ka lakou hana hewa ana, a ua hoomahuahuaia ko lakou hoihope ana.
- <sup>7</sup> Peheia la wau e kala'i i keia hewa nou? Ua haalele kau mau keiki ia'u, a ua hoohiki lakou ma

na mea akua ole. Hanai aku la au ia lakou a maona, alaila, moe kolohe iho la lakou, a hoakoakoa lakou me ka lehulehu ma na hale o na wahine hookamakama.

- 8** Holoholo lakou e like me na lio i hanai maikai ia; uhuhu kela mea keia mea o lakou i ka wahine a kona hoalauna.
- 9** Aole anei au e hoopai i keia mau mea? wahi a Iehova. Aole anei e ko ka inaina o kuu uhane i ka lahuikanaka e like me neia?
- 10** E pii aku oukou maluna o kona mau pa, a e luku aku; mai hooki loa nae; e lawe aku i kona mau puupuu kaua, no ka mea, aole no Iehova ia mau mea.
- 11** No ka mea, ua hana wahahee loa mai ia'u ko ka hale o ka Israela, a me ko ka hale o Iuda, wahi a Iehova.
- 12** Ua hoole lakou ia Iehova, a ua olelo iho, Aole ia, aole e hiki mai ka hewa maluna o makou, aole hoi e ike makou i ka pahikaua, a me ka wi.
- 13** A e lilo auanei na kaula i makani, aole iloko o lakou ka olelo; pela e hanaia'i io lakou la.
- 14** Nolaila, ke olelo mai nei o Iehova, ke Akua o na kaua, peneia, No ka oukou olelo ana i keia olelo, aia hoi, e hoolilo no wau i ka'u mau olelo iloko o kou waha, i ahi, a o keia poe kanaka i wahie, a e hoopau ia ia lakou.
- 15** Aia hoi, e lawe mai no wau maluna o oukou, e ko ka hale o ka Israela, i ka lahuikanaka, mai kahi mamao aku mai, wahi a Iehova; he lahuikanaka ikaika, he lahuikanaka kahiko, he lahuikanaka, aole oe i ike i ka

lakou olelo, aole hoi i hoomaopopo i ka mea  
a lakou e olelo mai ai.

**16** O ko lakou aapua, he lua kupapau hamama ia,  
he poe kanaka ikaika lakou a pau.

**17** A e ai no lakou i kau ai, a me kau palaoa i  
hoiliiliia i mea na kau poe keiki kane, a na  
kau poo kaikamahine e ai ai: e ai no lakou  
i kau poe hipa, a me kau poe bipi; e ai no  
lakou i kou mau kumuwaina, a me kou laau  
fiku; e anai aku no lakou ma ka pahikaua, i  
kou mau kulanakauhale i paa i ka pa, i na  
mea au i hilinai ai.

**18** Aka, i kela mau la, wahi a Iehova, aole au e hooki  
loa ia oukou.

**19** A ika wa e olelo mai ai oukou, No ke aha la i hana  
mai ai o Iehova, ko makou Akua, i keia mau  
mea a pau ia makou? Alaila, e i aku oe ia  
lakou, E like me oukou i haalele mai ai ia'u,  
a hookauwa aku na na akua e, ma ko oukou  
aina, pela no oukou e hookanwa aku ai na  
na kanaka e, ma ka aina aole no oukou.

**20** E hai aku i keia maloko o ka hale o ka Iakoba, a  
e hoolaha aku hoi ma ka Iuda, e i aku,

**21** E hoolohe mai oukou i keia, e ka lahuikanaka  
lapuwale, a naauao ole; ka poe mea maka,  
a ike ole, ka poe mea pepeiao, a lohe ole;

**22** Aole anei oukou e makau mai ia'u? wahi a  
Iehova; aole anei oukou e haalulu imua  
o ko'u alo, ka mea i hoonoho i ke one i  
mokuna no ke kai, mamuli o ka manao paa  
mau loa, i pii ole ia a kela aoao: a ina  
hooleilei kona mau ale, aole hiki ia lakou ke

- pii, a ina halulu mai, aole no lakou e hele mai i keia aoao?
- <sup>23</sup> Aka, o keia poe kanaka, he naau kipi ku e ko lakou; ua kipi no lakou, a ua lilo.
- <sup>24</sup> Aole nae lakou i olelo ma ko lakou naau, Ano, e makau aku kakou ia Iehova, i ko kakou Akua, i ka mea i haawi mai i ka ua, i ka ua mua, a me ka ua hope i kona manawa pono; a hookoe hoi no kakou i na hobedoma e hoiliili ai.
- <sup>25</sup> Na ko oukou hewa i hoohuli aku i keia mau mea, a na ko oukou hala i hoopaa i na mea maikai, i loaa ole ia oukou.
- <sup>26</sup> Ua loaa no na mea hewa iwaena o ko'u poe kanaka; kiai malu lakou, e like me ke kulou ana o ka mea hoopahele manu;. kau no lakou i ka upiki, a paa no na kanaka ia lakou.
- <sup>27</sup> E like me na hinai manu i piha i na manu, pela no ka piha ana o ko lakou hale i ka wahahhee; nolaila lakou i nui ai, a ua waiwai hoi.
- <sup>28</sup> Ua momona ae nei lakou, ua hinuhinu hoi; oia, ua hele lakou, a ua pakela mamua o ka hana ana a ka poe hewa; aole lakou i kokua i ka pono, i ka pono hoi o na keiki makua ole, ua pomaikai nae lakou; aole lakou i hoopono ma ka hoopii ana o ka poe kaumaha.
- <sup>29</sup> Aole anei au e hoopai i keia mau mea? wahi a Iehova; aole anei e ko ka ukiuki o kuu uhane i ka lahuikanaka e like me keia?
- <sup>30</sup> Ua hanaia ka mea kupanaha ma ka aina, a he mea haumia loa hoi;

31 Wanana wahahee mai na kaula, a ma o lakou la i noho alii ai na kahuna; a ua makemake ko'u poe kanaka ia mea; a pehea hoi oukou e hana'i i ka hopena o ia mea?

## 6

- <sup>1</sup> E NA mamo a Beniamina, e hoakoakoa oukou e holo aku mawaho o Ierusalema; a e puhi i ka pu ma Tekoa, a e kau hoi i ka hoailona o ke ahi ma Betehakerema. No ka mea, aneane mai ka hewa, a me ka make nui, mai ke kukulu akau mai.
- <sup>2</sup> Ua hoopau no au i ke kaikamahine o Ziona, i ka mea puloku, a palupalu.
- <sup>3</sup> E hele mai no io na la na kahu hipa, me ko lakou poe hipa, e kukulu no lakou i na halelewa a puni ia wahi; e ai no kela mea keia mea i kona wahi iho.
- <sup>4</sup> E hoomakaukau oukou e kaua ia ia; e ku mai, e pii ku e kakou ia ia i ke awakea. Auwe kakou! no ka mea, e pau ana ka la; ua hohola ae ka molehulehu o ke ahiahi.
- <sup>5</sup> E ku mai, e hele hoi kakou i ka po, a e wawahī i kona mau hale alii.
- <sup>6</sup> No ka mea, ua olelo mai o Iehova o na kaua penei, E kua oukou ilalo i mau laau, a e hana hoi i puu ku e ia Ierusalema; oia ke kulanakauhale e hoopaiia'i; o ka hooluhi wale no ko loko ona.
- <sup>7</sup> A like me ka punawai i puai mai i kona mau wai, pela no oia i puai mai i kona hewa. Ua loheia ka lawe wale a me ka hao ana

maloko ona; imua o ko'u alo, ua mau loa no  
ke kaumaha a me ka palapu.

<sup>8</sup> E aoia oe, e Ierusalema, o haalele kuu uhane ia  
oe, a hooneoneo aku hoi au ia oe, he aina  
noho ole ia.

<sup>9</sup> Ke olelo mai nei o Iehova o na kaua penei, E hoili-  
ili no lakou i ke koena a pau o ka Israela, e  
like me ke kumu waina; e hoihoi i kou lima,  
e like me ka mea hoiliili i ka huawaina iloko  
o na hinai.

<sup>10</sup> Ia wai la wau e olelo aim ai, a e ao aku hoi, i lohe  
lakou? Aia hoi, ua okipoepoe ole ia ko lakou  
pepeiao, aole hiki ia lakou ke hoolohe: aia  
hoi, he mea hoowahawaha ka olelo a ke  
Akua ia lakou, aohe o lakou lealea iloko o ia  
mea.

<sup>11</sup> Nolaila, ua piha au i ka inaina o Iehova; ua  
auka au i ka uumi ana. E ninini aku au ia  
maluna o na kamalii mawaho, maluna pu  
no me ka ahakanaka ui; no ka mea, e lawe  
pio pu ia no ke kane me ka wahine, o ka mea  
elemakule me ka mea i nui kona mau la.

<sup>12</sup> A e hooliloia ko lakou hale no na kanaka e, a  
me na mahinaai, a me na wahine pu; no ka  
mea, e kikoo aku no au i ko'u lima, maluna  
o ka poe e noho ana ma ka aina, wahi a  
Iehova.

<sup>13</sup> No ka mea, mai ka mea uuku o lakou a ka mea  
nui o lakou, ua makee waiwai lakou a pau;  
a mai ke kaula mai a ke kahuna, hana ma ka  
wahahee kela mea keia mea.

<sup>14</sup> Ua hoola hapa lakou i ka eha o ko'u poe kanaka,  
me ka olelo iho, He malu, he malu; aole hoi  
he malu.

- 15** Ua hilahila anei lakou ia lakou i hana'i i ka mea e hoopailua ai? Ole, aole lakou i hilahila iki, aole hoi i ike i ka hoopalaimaka; nolaila lakou e haule ai iwaena o ka poe haule; a hoopai aku au ia lakou, alaila lakou e kulaina'i, wahi a Iehova.
- 16** Ke i mai nei o Iehova penei, E ku mai oukou ma na alanui, a nana, a e ninau hoi no na kuamoo kahiko. Auhea ka aoao maikai? E hele oukou maloko olaila, a e loaa no ia oukou ka hoomaha no ko oukou poe uhane. Aka, olelo mai la lakou, Aole makou e hele.
- 17** A hoonoho iho la au i poe kiai maluna o oukou, nana i olelo, E hoolohe oukou i ke kani ana o ka pu. Aka, olelo mai la lakou, Aole makou e hoolohe.
- 18** Nolaila, e hoolohe mai oukou, e na aina, a e ike hoi, e ka ahakanaka, i ka mea mawaenao lakou.
- 19** E hoolohe mai, e ka honua! aia hoi, e lawe mai ana no wau i ka hewa maluna o keia poe kanaka, i ka hua hoi o ko lakou manao iho; no ka mea, aole lakou i hoolohe mai i ka'u mau olelo, aole hoi i ko'u kanawai, aka, hoole lakou ia.
- 20** No ke aha la e hele mai ai ka mea ala mai Seba mai no'u? A me ka ohe ala mai ka aina mamao aku mai? Aole i makemakeia e a'u ko oukou mohaikuni, aole hoi i oluolu ko oukou alana.
- 21** Nolaila, ke olelo mai nei o Iehova penei, Aia hoi, e waiho aku au i mau mea e hina'i imua o keia poe kanaka, a e haule pu maluna o ia mau mea na makuakane, a me na

keikikane. E make pu no ka hoalauna, a me kona hoa.

- 22 Ke i mai nei o Iehova penei, Aia hoi, he poe kanaka e hele mai la, mai ka aina akau mai; a e hoalaia mai ka lahuikanaka nui, mai na aoao mai o ka honua.
- 23 E lalau no lakou i ke kakaka, a me ka ihe: he poe lokoino lakou, aohe o lakou lokomaikai; halulu ko lakou leo, e like me ke kai; a holo no lakou maluna o na lio i hoomakaukauia e like me na kanaka kaua e ku e aku ia oe, e ke kaikamahine o Ziona.
- 24 Ua lohe makou i kona kaulana, ua nawaliwali hoi ko makou mau lima; ua loohia makou i ka haalulu, a me ke kuakoko e like me ko ka wahine hanau keiki.
- 25 Mai hele aku iloko o ke kula, mai hele hoi ma na alanui; no ka mea, aia no ka pahikaua o ka enemi, a me ka makau ma na aoao a pau.
- 26 E ke kaikamahine o ko'u poe kanaka, e hoaahu oe i kapa Kumakena, a e lulu i ka lehu maluna ou; a e kumakena hoi oe, e like me ia no ka hanaukahih, he kumakena ino loa; no ka mea, e hele hoohikilele mai ana ka mea anai ia kakou.
- 27 Ua hoonoho wau ia oe, i hale kiai, a i pakaua mawaena o ko'u poe kanaka, i ike oe, a e hoao i ko lakou aoao.
- 28 He poe hoihope ino lakou a pau, e hele ana me ka ahiahi; he keleawe lakou, a he hao hoi; he poe hoohaumia lakou a pau.

- <sup>29</sup> Ua wela na upamakani, ua pau i ke ahi ke kepau;  
o ka mea hoohehee, hoohehee makehewa  
no oia: no ka mea, aole i laweia'ku ka poe  
hewa.
- <sup>30</sup> E kapaia no lakou, he kala i haaleleia, no ka mea,  
ua haalele o Iehova ia lakou.

## 7

- <sup>1</sup> O KA olelo keia i hiki mai ai io Ieremia la, mai o  
Iehova mai, i mai la.
- <sup>2</sup> E ku oe ma ka puka o ka hale o Iehova, a malaila  
oe e kala aku ai i keia olelo, a e i aku. E  
hoolohe oukou i ka olelo a Iehova, e ka  
Iuda a pau i komo nei iloko o na pukapa e  
hoomana ia Iehova.
- <sup>3</sup> Ke olelo mai nei o Iehova o na kaua, ke Akua o  
ka Isaela penei. E hoomaikai oukou i ko  
oukou mau aoao, a me ka oukou hana ana,  
a na'u no e hoonoho loa ia oukou ma keia  
wahi.
- <sup>4</sup> Mai hilinai oukou ma na olelo wahahhee, me ka  
olelo iho, Ka luakini o Iehova, Ka luakini o  
Iehova, Ka luakini o Iehova, keia mau mea.
- <sup>5</sup> No ka mea, ina hoomaikai oiaio oukou i ko oukou  
mau aoao, a me ka oukou hana ana; ina e  
hana oiaio oukou i ka pono mawaena o ke  
kanaka, a me kona hoa;
- <sup>6</sup> Ina hookaumaha ole oukou i ka malihini. i na  
keiki makua ole, a me na wahine kane-  
make, a hookahe ole i ke koko hala ole ma  
keia wahi, aole hoi e hele mamuli o na'kua  
e, i mea e hewa'i oukou;
- <sup>7</sup> Alaila, e hoonoho loa au ia oukou i keia wahi i  
ka aina a'u i haawi aku ai i ko oukou poe  
makua, a mau loa aku no.

- 8 Aia hoi, ke hilinai nei no oukou i na wahahee  
hope ole.
- 9 E aihue anei oukou, a pepehi kanaka, a moe  
kolohe, a e hoike wahahee, a e kuni i ka mea  
ala no Baala, a e hele mamuli o na'kua e a  
oukou i ike ole ai?
- 10 A e hele mai anei, a ku imua o'u iloko o keia hale,  
ka mea i heaia ma ko'u inoa, a e olelo iho,  
Ua hoolaia makou, i hana makou i keia mau  
mea hoopailua a pau?
- 11 O keia hale i kapaia ma ko'u inoa, ua lilo anei ia  
i lua no ka poe powa i ko oukou mau maka?  
Aia hoi, ua ike no wau, wahi a Iehova.
- 12 Aka, e hele oukou, ano, i ko'u hale ma Silo, i kahi  
a'u i waiho ai i ko'u inoa i kinohi, a e ike hoi  
i ka mea a'u i hana'i ia wahi no ka hewa o  
ko'u poe kanaka no ka Israela.
- 13 A no ka oukou hana ana i keia mau mea a pau,  
wahi a Iehova; a olelo aku hoi au ia oukou,  
me ke ala ae i ka wauaaeo e olelo, aole nae  
oukou i hoolohe: a hea aku no hoi au ia  
oukou, aole oukou i o mai;
- 14 Nolaila, e hana aku no au i keia hale i kapaia ma  
ko'u inoa, ka mea a oukou e hilinai nei, a i  
kahihoi a'u i haawi aku ai ia oukou a i ko  
oukou poe makua, e like me ka'u i hana'i ia  
Silo.
- 15 A e kipaku aku no au ia oukou, mai ko'u ale aku,  
e like me ka'u i kipaku aku ai i ko oukou poe  
hoahanaau a pau, i ka hanauna a pau hoi o  
ka Eperaima.
- 16 Nolaila, mai pule oe, no keia poe kanaka, aole  
hoi e hookiekie i ka leo, a me ka nouoi ana

no lakou, aole hoi e uwao iho no lakou; no ka mea, aole loa au e hoolohe aku ia oe.

- 17** Aole anei oe i ike i na mea a lakou e hana nei ma na kulanakauhale o ka Iuda, a ma na alanui o Ierusalema?
- 18** Hoiliili no na keiki i ka wahie, a hoa na makuakane i ke ahi, a kaawili na wahine i ka palaoa, e hana i papapalaoa no ke alii wahine o ka lani, a uinini i ka mohai inu no na akua e, i mea e hoonaukiuki mai ai ia'u.
- 19** E hoonankiuki mai anei lakou ia'u, wahi a Iehova? Aole anei ia e lilo ia lakou i mea e hoopalai loa ai ko lakou mau maka?
- 20** Nolaila, ke olelo mai nei o Iehova ke Akua penei, Aia hoi, e nininii'a'ku no ko'u huhu, a me ko'u ukiuki maluna o keia wahi, maluna o ke kanaka, a maluna o ka holoholona, a maluna o na laau o ke kula, a maluna o ka hua o ka lepo; a e a no ia, aole ia e hoopioia.
- 21** Ke olelo mai nei o Iehova o na kaua, ke Akua o ka Israela penei, E hui oukou i ko oukou mohaikuni me ko oukou alana, a e ai i ka io.
- 22** No ka mea, aole au i olelo aku i ko oukou poe makua, a i ka la a'u i lawe mai ai ia lakou mai Aigupita mai, aole au i kauoha ia lakou no na mohai kuni, a me na alana:
- 23** Aka, o keia ka'u i kauoha aku ai ia lakou, i aku la, E malama i ko'u leo, a owau auanei ko oukou Akua, a o oukou auanei ko'u poe kanaka, a e hele hoi oukou ma na aoao a pau a'u i kauoha aku ai ia oukou, i mea e pomaikai ai oukou.

- 24** Aka, aole lakou i hoolohe mai, aole hoi i haliu mai i ko lakou pepeiao, aka, hele no lakou ma ka noonoo ana a ma ka paakiki o ko lakou naau hewa, a hoihope lakou, aole i hele mua.
- 25** Mai ka la i hele mai ai ko oukou poe kupuna mai Aigupita mai, a hiki loa mai i keia la, ua hoouna aku au io oukou la, i ka'u poe kauwa a pau, i na kaula hoi, e ala ana i ka wanaao i kela la i keia la no ka hoouna aku.
- 26** Aole nae lakou i hoolohe mai ia'u, aole hoi i haliu mai i ko lakou pepeiao, aka, hooolea no i ko lakou a-i. Kelaaku no ka lakou hana hewa ana, i ka na makua o lakou.
- 27** Nolaila oe e olelo aku ai i keia mau olelo a pau ia lakou; aka, aole no lakou e hoolohe mai ia oe. E heaaku oe ia lakou; aka, aole no lakou e o mai i kau.
- 28** E olelo no nae oe ia lakou, He lahuikanaka keia i hoolohe ole i ka leo o Iehova o ko lakou Akua, aole hoi lakou i hoonaauao. Ua make ka oiaio, a ua hookiia mai ko lakou wahaaku.
- 29** E ako oe i kou lauoho, a e hooleiaku, a e olo ka pihe maluna o na wahi kiekie; no ka mea, ua hoole o Iehova, a ua haalele hoi i ka hanauna o kona ukiuki
- 30** No ka mea, ua hana hewa na kieki a Iuda imua o ko'u alo, wahi a Iehova; ua waiho lakou i ko lakou mea e hoopailua'i maloko o ka hale i kapaia ma ko'u inoa, e hoohaumia ia wahi.
- 31** A ua hana lakou i na wahi kiekie o Topeta; aia no ia maloko o ke awawa o ke keiki a Hinoma,

e puhi i ka lakou keiki kane, a me ka lakou kaikamahine iloko o ke ahi, ka mea a'u i kauoha ole ai ia lakou, aole hoi i komo ia iloko o ko'u naau.

- <sup>32</sup> Nolaila, aia hoi, e hiki mai auanei na la, wahi a Iehova, e kapā ole ia'i ia o Topeta, aole hoi o ke awawa o ke keiki a Hinoma, aka, o ke awawa o ka make; no ka mea, e kanu kupapau no lakou ma Topeta, a piha loa ia wahi.
- <sup>33</sup> A e lilo na kupapau o keia poe kanaka i mea ai na na manu o ka lani, a na na holoholona o ka honua, aohe mea hooweliweli ia lakou.
- <sup>34</sup> Alaila, maloko o na kulanakauhale o ka Iuda, a ma na alanui o Ierusalema, e hooki no wau i ka leo o ke oli, a me ka leo o ka hauoli, a me ka leo o ke kane mare, a me ka leo o ka wahine mare; a e neoneo auanei ka aina.

## 8

- <sup>1</sup> I KELA manawa, wahi a Iehova, e lawe mai no lakou i na iwi o na'līi o ka Iuda, a me na iwi o na luna, a me na iwi o na kahuna, a me na iwi o na kaula, a me na iwi o ka poe i noho ma Ierusalema, mawaho o ko lakou mau halelua;
- <sup>2</sup> A e kaulai no hoi lakou ia mau mea i ka la, a i ka mahina, a i na hoku a pau o ka lani, i na mea a lakou i makemake ai, a i hookauwa ai hoi na lakou, a i hahai mamuli o lakou, a i imi ia lakou, a i hoomana ia lakou; aole e hoiliiliia ia mau iwi, aole hoi e kanu hou ia; e lilo lakou i mea kipulu maluna o ka honua.

- <sup>3</sup> A e kohoia ka make, aole o ke ola, e na kanaka i koe, o keia poe i hookoeia o keia hanauna hewa, o ka poe i koe ma na wahi a pau a'u i kipaku aku ai ia lakou, wahi a Iehova o na kaua.
- <sup>4</sup> A e olelo aku no hoi oe ia lakou, Ke i mai nei o Iehova penei, E hina anei lakou a ala ole mai? E huli aku anei ia, a hoi ole mai?
- <sup>5</sup> Heaha ka mea e hoihope ai keia poe kanaka o Ierusalema me ka hoihope mau loa? Hoopaa loa lakou i ka wahahhee; hoole lakou, aole e hoi mai.
- <sup>6</sup> Hoolohe aku la au, a lohe, aole lakou i olelo pololei: aohe kanaka i mihi i kona hewa, me ka olelo iho, Heaha ka'u i hana'i? Huli no kela mea keia mea i kona aoao, e like me ka lio i holo ino iloko o ke kaua.
- <sup>7</sup> Oia, ua ike no ke setoreka ma ka lani i ka manawa pono: a malama no hoi ke kuhukuku, a me ka manu u, a me ka manuioio i ko lakou wa e hele mai ai: aka, o ko'u poe kanaka, aole ike lakou i ka hopono o Iehova.
- <sup>8</sup> Pehea la oukou e olelo ai, Ua akamai makou, a eia ia makou ke kanawai o Iehova? Aia hoi, ua hoololi ka peni hoopunipuni a ka poe kakauolelo ia mea i wahahhee.
- <sup>9</sup> E hilahila auanei ka poe akamai, e makau, a e pio. Aia hoi, ua hoole lakou i ka olelo a Iehova: heaha hoi ke akamai iloko o lakou?
- <sup>10</sup> Nolaila, e haawi aku au i ka lakou poe wahine na hai, a me ko lakou mahinaai no ka poe hou e noho iho ai; no ka mea, ua makee waiwai kela mea, keia mea o lakou, mai ka

mea uuku o lakou a i ka mea nui; a mai ke kaula a i ke kahuna, hana no kela mea keia mea ma ka wahahee.

**11** Ua hoola hapa lakou i ka eha o ke kaikamahine o ko'u poe kanaka, me ka olelo iho, He malu, he malu: aole hoi he malu.

**12** Ua hilahila anei lakou i ka lakou hana ana i ka mea e hoopailua'i? Ole, aole lakou i hilahila iki, aole hoi i ike i ka hoopalaimaka; nolaila lakou e haule ai iwaena o ka poe haule; a ia lakou e hoopaiia'i, alaila lakou e kulaina'i, wahi a Iehova.

**13** Oiaio, e hoopau no au ia lakou, wahi a Iehova; aole e loaa na hua ma ko lakou kumuwaina, aole hoi he fiku ma ka laau fiku, a e mae wale ka lau; a e lilo ia mau mea na ka poe hele mai maluna o lakou.

**14** No ke aha la kakou e noho malie ai? E hoakoakoa oukou, a e komo iloko o na kulanakauhale i paa i ka pa, a malaila kakou e noho ekemu ole ai; no ka mea, e luku mai o Iehova ia kakou, a e hoohainu mai ia kakou i ka wai o ke au, no ka mea, ua hana hewa kakou ia Iehova.

**15** Kakali kakou i ka malu; aohe pono: a i ka manawa o ke ola, aia hoi, he popilikia!

**16** Ua loheia ka hau ana o na lio mai Dana mai; haalulu ka aina a pau no ka uhuhu ana o ka poe ikaika: no ka mea, ua hiki mai lakou, a ua hoopau lakou i ka aina, a me na mea a pau maloko olaila, i ke kulanakauhale, a me ka poe noho maloko olaila.

**17** No ka mea, aia hoi, e hoouna aku no au i na nahesa, a me na moo pepeiaohao iwaena o

oukou, aole hoi lakou e hoowalewaleia, a e  
nahu mai no lakou ia oukou, wahi a Iehova.

**18** I maha no kuu kaumaha, ua maule no ko'u naau  
iloko o'u.

**19** Aia hoi, ka leo o ka uwe ana o ke kaikamahine o  
ko'u poe kanaka, ma ka aina mamao mai;  
Aole anei o Iehova ma Ziona? Aole anei  
kona alii iloko ona? No ke aha la lakou  
i hoonaukiuki mai nei ia'u i ko lakou kii  
kalaiia, a me na mea lapuwale no kahi e  
mai?

**20** Ua hala ka hoiliili ai ana, ua pau no ke kau, aole  
hoi kakou i hooliaia.

**21** Ua eha au no ka eha ana o ke kaikamahine o ko'u  
poe kanaka; ua eleele au, ua loohia au i ka  
pilihua.

**22** Aole anei he nini ma Gileada? aole anei he  
kahuna lapaau malaila? No ke aha la i loaa  
ole ai ke ola no ke kaikamahine o ko'u poe  
kanaka?

## 9

**1** A UWE! ina i lilo kuu poo i wai, a me kuu mau  
maka hoi i kumu waimaka, i uwe aku ai au  
i ke ao a me ka po, no ka poe i pephiia o ko  
kaikamahine o ko'u poe kanaka!

**2** Auwe hoi! ina ia'u ma ka waonahele ko ka poe  
hele wahi e moe ai; i haalele ai au i ko'u  
poe kanaka, a e hele, mai o lakou aku! no  
ka mea, he poe moe kolohe lakou a pau, he  
ahakanaka kipi.

**3** Lena no lakou i ko lakou mau alelo, e like me ko  
lakou kakaka, no ka wahahee. Aole lakou

hookoa ma ka oiaio maluna o ka honua; no ka mea, hele no lakou, mai kekahi hewa, a i kekahi hewa, aole hoi lakou i ike mai ia'u, wahi a Iehova.

- 4** E makaala kela mea keia mea i kona hoalauna, mai hilinai hoi i kekahi hoahanau; no ka mea, e wahahée loa no kela hoahanau, keia hoahanau; a hele ahiahi no na hoalauna a pau.
- 5** E hoopunipuni no kela mea keia mea i kona hoalauna, aole olelo i ka mea oiaio; ua maa ko lakou alelo e olelo i na wahahée, hoomaloeloe lakou ia lakou iho e hana i ka hewa.
- 6** Aia no kou wahi noho ai iwaena konu o ka hoopunipuni; no ka hoopunipuni, hoole mai lakou, aole e ike mai ia'u, wahi a Iehova.
- 7** Nolaila, ke olelo mai nei o Iehova o na kaua peneia. Aia hoi, e hoohehee no wau ia lakou, a e hoao hoi ia lakou; no ka mea, heaha la wau e hana'i no ke kaikamahine o ko'u poe kanaka?
- 8** O ko lakou alelo, he pua ia i panaia'ku, olelo no ia i ka hoopunipuni. Olelo oluolu aku kekahi i kona hoalauna me ka waha, aka, ma ka naau, ua hoohalua ia ia.
- 9** Aole anei au e hoopai ia lakou no keia mau mea, wahi a Iehova? Aole anei e ko ka ukiuki o kuu uhane i ka lahuikanaka e like me keia?
- 10** E olo no wau i ka pihe no na mauna, me ka uwe aku, a e kumakena no hoi no na wahi mauu o ka waonahéle, no ka mea, ua pau lakou i ke ahi; nolaila, aole hiki kekahi ke

hele malaila, aole hoi e loheia ka leo o na holoholona. Ua holo aku no ka manu o ka lewa, a me ka holoholona, ua hala lakou.

**11** A e hoolilo no wau ia Ierusalema i mau puu, he noho ana hoi no na ilio hihiu; a e hooneoneo no wau i na kulanakauhale o ka Iuda, aohe mea noho iloko.

**12** Owai ke kanaka akamai i hoomaopopo i keia? A ua olelo hoi ka waha o Iehova ia ia, a nana hoi e hai aku i ka mea i make ai ka aina, a neoneo e like me ka waonahele, i ole e hele ae kekahi maloko?

**13** I mai la o Iehova, No ko lakou haalele ana i ko'u kanawai, i ka mea a'u i kau ai imua o lakou, aole hoi i hoolohe i ko'u leo, aole hoi i hele mamuli o ia;

**14** Aka, ua hele lakou mamuli o ka paakiki o ko lakou naau iho, a mamuli o na Baala hoi, na mea a ko lakou poe makua i ao mai ai ia lakou;

**15** Nolaila, penei ka olelo ana mai a Iehova o na kaua, ke Akua o ka Israela, Aia hoi, e hanai aku no wau ia lakou, i keia poe kanaka hoi, i ka awaawa, a e hoohainu aku au ia lakou i ka wai o ke au.

**16** A e hoopuehu aku au ia lakou iwaena o ko na aina e, i ka poe i ike ole ia e lakou, aole hoi e ko lakou mau makuaa; e hoouna aku au i ka pahikaua mahope o lakou, a hoopau au ia lakou.

**17** Ke olelo mai nei o Iehova o na kaua penei, E hoonaauao oukou, a e hea aku i na wahine e

- olo pihe ana, i hele mai lakou, a e kii aku hoi  
i na wahine kumakena, i hele mai lakou;
- 18 E hoowikiwiki hoi lakou, a e olo pihe no kakou  
i kahe ka wai o ko Kakou mau maka, i poha  
aku hoi ko kakou mau alumaka i na wai.
- 19 No ka mea, ua loheia ka leo o ka uwe ana,  
mai Ziona mai, Nani ko kakou lukuia! Ua  
hilahila loa kakou, no ka mea, ua haalele  
kakou i ka aina, no ka mea, ua kipaku aku  
ko kakou wahi noho ai ia kakou.
- 20 Aka, e hoolohe mai oukou i ka olelo a Iehova, o  
na wahine, a e lawe hoi ko oukou pepeiao  
i ka olelo a kona waha, a e ao aku i ka  
oukou mau kaikamahine i ka uwe ana, a  
o kela mea keia mea i kona hoalauna i ke  
kumakena ana.
- 21 No ka mea, ua pii mai no ka make, a iloko o ko  
kakou puka ma kani, ua komo no iloko o  
ko kakou halealii, e hooki ae ia i na kamalii  
mawaho, a me ua kanaka opiopio ma ke  
alanui.
- 22 E i aku Ke olelo mai nei o Iehova penei, E haule  
no na kupapau o kanaka e like me ka lepo  
ma ke kula, e like hoi me ka pua ai mahope  
o ka mea hoiliili ai; aohe mea nana lakou e  
hoiliili.
- 23 Ke i mai nei o Iehova penei, Mai kaena wale ka  
mea akamai i kona akamai ana, mai kaena  
wale hoi ka mea ikaika i kona ikaika ana,  
a mai kaena ka mea waiwai i kona waiwai  
ana;
- 24 Aka o ka mea kaena, e kaena oia i keia, i  
kona hoomaopopo ana, a i kona ike aua  
ia'u, owau no o Iehova, ka mea hana aku i

ka lokomaikai, a me ka hoopono, a me ka maikai ma ka honua; no ka mea, ke lealea nei au ia mau mea, wahi a Iehova.

- <sup>25</sup> Aia hoi, e hiki mai auanei na la. wahi a Iehova, e hoopai pu aku ai au i ka poe a pau i okipoepoeia me ka poe i okipoepoe ole ia:
- <sup>26</sup> I ko Aigupita, a me ka Iuda a me ka Edoma. a me na keiki a Amona, a me ka Moaba, a me na mea a pau i ako i ka uminmi, ka poe e noho la ma ka waonahelo; no ka mea, ua okipoepoe ole ia ko na aina e a pau, a ua okipoepoe ole ia ko ka hale a pau o ka Israela, ma ka maau.

## 10

- <sup>1</sup> E HOOLOHE mai oukou i ka olelo a Iehova e olelo mai nei ia oukou, e ko ka hale o ka Israela.
- <sup>2</sup> Ke olelo mai nei o Iehova penei. Mai ao oukou i ka aoao o ko na aina e; a mai makau hoi oukou i na ouli o ka lani; no ka mea, ua makau ko na aina e ia lakou.
- <sup>3</sup> No ka mea, o na aoao o na kanaka, he lapuwale ia; no ka mea, kua no kekahi i ka laau ma ka ulu laau me ke koi lipi, o ka hana hoi a ka paahana.
- <sup>4</sup> A kahiko no lakou ia mea i ke kala a me ke gula; hoopaa no lakou ia mea i ke kui hao, a me na hamare, i kulualana ole ia.
- <sup>5</sup> Ku pono no lakou, e like me ka laau pama, aole nae i olelo; he oiaio no, ua kaikaiia lakou, no ka mea, aole hiki ia lakou ke hele. Mai makau ia lakou, no ka mea, aole hiki ia

lakou ke hana mai; i ka hewa, aole hoi iloko  
o lakou ke hana i ka maikai.

- 6** Aohe mea like me oe, e Iehova: ua nui oe, ua kaulana hoi kou inoa no ka maua.
- 7** Owai ka mea makau ole ia oe e ke Alii o na ainai? No ka mea, ku pono ia ia oe; no ka mea, iwaena o ka poe akamai a pau o na aina, a iloko hoi o ko lakou aupuni a pau, aohe mea like me oe.
- 8** Ua like io no lakou me na holoholona, ua lapuwale hoi; o ka naauuo o ka poe lapuwale, he pauku laau ia.
- 9** Ua laweia mai na papa kala, mai Taresisa mai. a o ke gula hoi, mai Upaza mai, ka hana a ka paahana, a ka lima hoi o ka mea hoohehee kala. He poni uliuli, a he poni ulaula ko lakou lole; o ka hana hoi a ka poe akamai oia mau mea a pau.
- 10** Aka o Iehova no ke Akua oiaio, oia ke Akua ola, o ko alii mau loa hoi. E haalulu auanei ka honua i kona ukiuki, aole hoi e hiki i na lahuikanaka ke hoomanawanui i kona inaina.
- 11** Penei oukou e olelo ai ia lakou, O na'kua i hana ole i na lani, a me ka honua, e make auanei lakou, mai ka honua aku, a mailalo aku hoi o keia mau lani.
- 12** Ua hana no oia i ka honua i kona mana, a ua hookumu hoi i ke ao nei i kona akamai, a ua hoopalahalaha ae i na lani i kona naauao.
- 13** I ka pane ana o kona leo, ua nui loa na wai ma na lani, oia hoi ka inea i pii aku ai ka mahu,

mai na kukulu aku o ka honua; nua no i hana na uwila, a me ka ua, a hoopuka mai oia i ka makani, mai kona waihona mai.

**14** Me he holoholona la kela kanaka, keia kanaka ma ka ike; hilahila hoi na mea hoohehee kala a pau no ke akuakii, no ka mea, he mea wahahée kona kii i hooheheeia, aohe hanu iloko o lakou.

**15** He lapuwale lakou, he hana na ka wahahée; i ko lakou wa e hoopaiia mai ai, e make no lakou.

**16** Aole i like ka hooilina o Iakoba me lakou; no ka mea, nana no i hana na mea a pau; a o ka Israela hoi ke kookoo o koua hooilina; o Iehova o ua kaua kona inoa.

**17** E lawe nui i kou waiwai, mai ka aina aku, e ka mea noho ma ka pakaua.

**18** No ka mea, ke olelo mai nei o Iehova peneia, Aia hoi, e maa aku no wau i ka poe noho ma ka aina, i ka maa hookahi ana, a e hoopilikia ia lakou, a pela o loaa ia lakou.

**19** Auwe au i kuu eha! ua nui loa ko'u hahauia, aka, i iho la au, He oiaio, he kaumaha keia, e hoomanawanui nae au ia.

**20** Ua wawahia ko'u halelewa, a ua moku hoi ko'u mau kaula a pau. Ua hele aku ka'u mau keiki, mai o'u aku nei, a ua ole lakou: aohe mea i koe nana e hohola hou i ko'u halelewa, a e kukulu i ko'u mau paku.

**21** Ua lilo na kahu i mea e like me na holoholona, aole hoi i imi ia Iehova; nolaila, aole lakou e pomaikai; a e hoopuehu liilii ia ka lakou poe hipa a pau.

- <sup>22</sup> Aia hoi, ua hiki mai ka leo o ka lono, he haunaele nui, mai ka aina akau mai, i mea e lilo ai na kulanakauhale o ka Iuda i neoneo, i noho ana hoi no na ilio hihiu.
- <sup>23</sup> E Iehova, ua ike no au, aole iloko o ke kanaka kona aoao iho; aole no ke kanaka hele ke alakai i kona mau kapuwai iho.
- <sup>24</sup> E Iehova, e paipai mai oe ia u, ma ka pono nae, aole ma kou ukiuki, o hooki loa mai oe ia'u.
- <sup>25</sup> E ninini oe i kou ukiuki maluna o ko na aina e, ka poe ike ole ia oe, a maiuna o na ohana i hea ole i kou inoa; no ka mea, ua ai lakou ia Iakoba, a ua hoopau ia ia, a oki loa, a ua hooneoneo i kona wahi i noho ai.

## 11

- <sup>1</sup> O KA olelo i hiki mai io Ieremia la mai o Iehova mai, i ka i ana mai,
- <sup>2</sup> E hoolohe oukou i na olelo o keia berita, a e olelo aku i na kanaka o ka Iuda, a i ka poe e noho ana ma Ierusalema;
- <sup>3</sup> E i aku ia lakou, Ke i mai nei o Iehova, ke Akua o ka Israela penei, E poino auanei ke kanaka i malama ole i na olelo o keia berita,
- <sup>4</sup> A'u i kauoha aku ai i ko oukou poe kupuna, i ka la a'u i lawe mai ai ia lakou mai ka aina o Aigupita, a mai ke kapuahi hao mai, i ka i ana aku, E hoolohe mai i kuu leo, a e hana i na mea e like me na mea a pau a'u i kauoha aku nei ia oukou; pela oukou e lilo ai i poe kanaka no'u, a owau auanei ko oukou Akua:

- 5** I hooko wau i ka hoohiki a'u i hoohiki ai i ko oukou poe makua, e haawi ia lakou i ka aina e kahe ana o ka waiu, a me ka mele, e like me ia i keia la. Alaila olelo aku la au, i aku la, Pela io no, e Iehova.
- 6** Alaila, olelo mai la o Iehova ia'u, E kala aku oe i keia mau olelo a pau maloko o na kulanakauhale o ka Iuda, a ma na alanui o Ierusalema, e i aku, E hoolehe oukou i na olelo o keia berita, a e hana hoi ia mau mea.
- 7** No ka mea, olelo ikaika loa aku la au i ko oukou poe makua, i ka la a'u i lawe mai ai ia lakou, mai ka aina o Aigupita mai, a hiki mai hoi i keia la, e ala ana no i ka wanaao, me ka olelo ikaika aku, i ka i ana, E malama i ko'u leo.
- 8** Aka, aole lakou i malama, aole i haliu mai i ko lakou pepeiao; hele no kela mea keia mea mamuli o ka paakiki o kona naau hewa: nolaila, e lawe no wau maluna o lakou i na olelo a pau o keia berita, a'u i kauoha aku ai ia lakou e hana; a hana ole lakou.
- 9** A olelo mai la o Iehova ia'u, Ua loaa ke kipi ana iwaena o na kanaka o ka Iuda, a iwaena hoi o ka poe noho ma Ierusalema.
- 10** Ua huli hope lakou mamuli o na hewa o ko lakou poe kupuna, ka poe i hoole, aole lakou e hoolohe i ka'u mau olelo: a hahai lakou mamuli o na'kua e, e malama ia lakou. A ua uhaki ko ka hale o ka Israela, a me ko ka hale o ka Iuda i ka'u berita, i ka mea a'u i hana'i me ko lakou poe kupuna.

- 11** Nolaila, ke olelo mai nei o Iehova penei, Aia hoi, e lawe mai no wau i ka hewa maluna o lakou, i ka mea hoi e hiki ole ai ia lakou ke pakelē aku; a ina kahea mai lakou ia'u, aole au e hoolohe aku ia lakou.
- 12** Alaila, e hele no ko na kulanakauhale o ka Iuda, a me ka poe e noho ana ma Ierusalema, a e kahea aku i na akua, i na mea i kaumaha ai lakou i ka mea aia. Aka, aole e hoola iki mai kela poe akua ia lakou, i ka wa o ko lakou popilikia.
- 13** No ka mea, e like me ka heluna o kou mau kulanakauhale, pela no kou poe akua, e ka Iuda; a e like me ka heluna o na alanui o Ierusalema, pela no oukou i hana'i i na kuahu, no ka mea hilahila, i na kuahu hoi e kuni ai i ka mea ala no Baala.
- 14** Nolaila, mai pule oe no keia poe kanaka, aole hoi e hookiekie i ke kahea ana, a me ka pule ana no lakou; no ka mea, aole au e hoolohe i ka wa e kahea mai ai lakou ia'u no ko lakou popilikia.
- 15** Heaha ka kuu mea aloha maloko o ko'u hale? Ua hana oia i ka hewa me na mea he nui, a ua lilo aku la ka io laa, mai ou aku la. Ia oe e hana hewa'i, olioli no oe.
- 16** Kapa aku la o Iehova i kou inoa, He laau oliva uliuli, maikai, a maikai ka hua; me ka leo o ka walaau nui, ua hoa oia i ke ahi maluna ona, a ua uhaiia na lala ona.
- 17** No ka mea, o Iehova o na kaua, ka mea nana oe i kanu, ua olelo mai no oia i ka hewa nou, no ka hewa o ko ka hale o Israela, a me ko ka hale o Iuda, ka mea a lakou i hana'i e ku

e ia lakou iho, e hoonaukiuki mai ia'u, i ke kaumaha ana i ka mea ala no Baala.

- 18** A ua hoike mai o Iehova ia'u, a ua ike no wau.  
Alaila, hoike mai oe ia'u i ka lakou hana ana.
- 19** Aka, ua like no wau me ke keiki hipa, me ka bipi hoi i laweia mai no ke kaluaia. Aole au i ike, ua imi manao hewa mai lakou ia'u, e i ana, E hooki kakou ia laau, a me kona hua, a e uhuki ia ia, mai ka aina aku o ka poe e ola ana, i ole e manao hou ia'i kona inoa.
- 20** Aka, o oe o Iehova o na kaua, ka mea hooponopono ma ka pololei, ka mea i hoao i ka opu, a me ka naau, e hoike mai oe ia'u i kou ukiuki ia lakou; no ka mea, ua hoike aku au ia oe i ko'u hihiia.
- 21** Nolaila, ke olelo mai nei o Iehova no na kanaka o Anetota, ka poe i imi i kou ola, me ka olelo mai, Mai wanana mai oe ma ka inoa o Iehova, o make auanei oe i ko makou lima.
- 22** Nolaila, ke olelo mai nei o Iehova o na kaua, Aia hoi, e hoopai no wau ia lakou. E make no na kanaka ui i ka pahikaua; e make no hoi ka lakou poe keikikane, a me ka lakou poe kaikamahine i ka wi.
- 23** Aole hoi e koe mai kekahī o lakou; no ka mea, e lawe mai no wau i ka hewa maluna o na kanaka o Anetota, i ka makahiki hoi o ko lakou hoopaiia.

## 12

- 1** PONO no oe, e Iehova, i ko'u wa e paio aku ai me oe; aka, e kamailio aku no au ia oe ma ka

hooponopono ana. No ke aha la e pomaikai ai ka aoao o ka poe hewa? E maluhia anei ka poe hana ma ka wahahhee nui loa?

- 2** Ua kauu no oe ia lakou, oia, ua kolo ko lakou aa; ke ulu nei no lakou, oia, ke hua mai nei lakou i ka hua; ua kokoke no oe i ko lakou waha, ua loihi aku nae mai ko lakou naau aku.
- 3** Aka, o oe e Iehova, ke ike mai nei no oe ia'u; ua nana mai no oe ia'u, ua hoao mai oe i ko'u naau ma ou la. E hookaaawale oe ia lakou, e like me na hipa no ke kaluaia, a e hoomakaukau hoi ia lakou no ka la o ka pepehi ana.
- 4** Pehea la ka loihi o ke kumakena ana o ka aina, a me ka mae wale ana o na laalaau o ke kula, no ka hewa o ka poe e noho ana maloko? Ua laweia'ku na holoholona, a me na manu; no ka mea, olelo no lakou, Aole ia e ike mai i ko makou hopena.
- 5** Ina i holo pu oe me ka poe hele wawae, a ua hoomaloeloe mai lakou ia oe, pehea la e hiki ai ia oe ke kukini me na lio? A ina hilinai oe ma ka aina malu, pehea la oe e hana'i maloko o ka nani o Ioredane?
- 6** No ka mea, o kou poe hoahanau, o ko ka hale o kou makuakane, oia, ua hana hoopunipuni mai iakou ia oe; a ua hea aku mamuli ou me ka leo nui; mai manaoio aku ia lakou, ina paha lakou e olelo mai i na olelo malimali ia oe.
- 7** Ua haalele au i ko'u hale, a ua waiho aku au i ko'u aina hooili: a ua haawi aku hoi au i ka mea

a kuu uhane i aloha nui ai iloko o ka lima o kona poe enemi.

<sup>8</sup> Ua like ko'u aina hooili ia'u me ka liona iloko o ka ululaau. Uwo ku e mai oia ia'u. Nolaila i ukiuki aku ai au ia ia.

<sup>9</sup> He hien aha ko'u aina hooili ia'u; a hae mai ia ia na mea a pau e puni ana. E hele mai oukou, e akoakoa mai, e na holoholona a pau o ke kula, no ka ai aku.

<sup>10</sup> Ua nui na kahu i anai aku i ko'u pawaina. ua hahi lakou i ko'u aina, ua hoolilo lakou i ko'u wahi maikai, i waonahele neoneo.

<sup>11</sup> Ua anai lakou ia wahi, a no kona neoneo, ua uwe mai oia ia'u; au anaiia ka aina a pau, no ka mea, aohe kanaka i manao ma ka naau.

<sup>12</sup> Ua hiki mai ka poe luku maluna o na wahi kiekie a pau o ka waonahele; no ka mea, e luku aku no ka pahikaua o Iehova, mai kekah i kukulu o ka aina a i kekah i kukulu o ka aina; aohe io e maluhia ana.

<sup>13</sup> Ua lulu lakou i ka hua palaoa, aka, e hooiliili no lakou i kakalaioa. Ua hoeha lakou ia lakou iho, aole nae ia he mea e pomaikai ai: a e hilahila auanei lakou i na mea i loaa'i ia oukou, no ko Iehova huhu nui.

<sup>14</sup> Penei ka olelo ana mai a Iehova, no ko'u poe hoalauna hewa, ka poe i pa mai i ka hooilina a'u i, hooili aku ai na ko'u poe kanaka o ka Israela; Aia hoi, e lawe no wau ia lakou, mai ko lakou aina aku, a e lawe aku hoi au i ko ka hale o Iuda, mai waena aku o lakou.

<sup>15</sup> A mahope iho o ko'u lawe ana aku ia lakou, alaila, e hoi hou no wau, a e aloha aku ia

lakou, a e hoihoi hou mai ia lakou i kela kanaka, i keia kanaka i kona aina hooili, a i kela kanaka keia kanaka i kona aina iho.

- <sup>16</sup> A e hiki mai no hoi keia, ina e ao ikaika lakou i na aoao o ko'u poe kanaka, e hoohiki ma ko'u inoa, Ke ola la no o Iehova; e like me lakou i ao ai i ko'u poe kanaka e hoohiki ma Baala; alaila, e kukulu hou ia lakou iwaenakonu o ko'u poe kanaka.
- <sup>17</sup> Aka, ina aole lakou e malama mai, alaila, e uhuki loa wau, a e anai loa aku i kela lahuikanaka, wahi a Iehova.

## 13

- <sup>1</sup> KE olelo mai nei o Iehova ia'u penei, O hele, a e lawe nou i kaei olona, a e hume ma kou puhaka, a mai waiho hoi ia iloko o ka wai.
- <sup>2</sup> A lawe iho la au i ke kaei, e like me ka olelo a Iehova, a hume iho la au ma kuu puhaka.
- <sup>3</sup> Hiki hou mai ka olelo a Iehova ia'u, o ka lua ia, i mai la,
- <sup>4</sup> E lawe oe i ke kaei i loaa ia oe, ka mea ma kou puhaka, a e ku iluna, a e hele i Euperate, a e huna ia mea malaila, ma ke ana o ka pohaku.
- <sup>5</sup> A hele aku la au, a huna iho la ia, ma Euperate, e like me ka Iehova i kauoha mai ai ia'u.
- <sup>6</sup> A hala na la he nui, alaila, olelo mai la o Iehova ia'u, E ku iluna, a e hele i Euperate, a e lawe mai i ke kaei a'u i kauoha aku ai ia oe e huna malaila.
- <sup>7</sup> Alaila, hele aku la au i Euperate, a kohi iho la, a lawe ae la i ke kaei, mai kahi aku a'u i huna

ai la mea; a aia hoi, ua ino ke kaei, he mea waiwai ole loa hoi.

- <sup>8</sup> Alaila, hiki mai la ka olelo a Iehova ia'u, i mai la,  
<sup>9</sup> Ke olelo mai nei o Iehova penei, E like me keia e hoino aku ai au i ka manao kiekie o ka Iuda, a me ka manao kiekie loa o ko Ierusalema.  
<sup>10</sup> O keia poe kanaka hewa, ka poe manao ole e hoolohe i ka'u mau olelo, ka poe i hele ma ka paakiki o ko lakou naau, a hahai hoi mamuli e na akua e, e malama ia lakou, a e hoomana ia lakou, e like auanei lakou me keia kaei, ka mea waiwai ole loa.  
<sup>11</sup> No ka mea, e like me ke kaei i pili i ka puhaka o ke kanaka, pela i hoopili mai ai au i ko ka hale a pau o ka Israela, a me ko ka hale a pau o ka Iuda ia'u, wahi o Iehova; i lilo mai lakou i poe kanaka no'u, a i inoa hoi, a i mea e hoomaikaiia'i, a i nani hoi; aka, aole lakou i hoolohe.  
<sup>12</sup> Nolaila oe e olelo ai ia lakou i keia olelo; Ke i mai nei o Iehova, ke Akua o ka Israela peneia, E hoopihaiia no na hue a pau i ka waina, a e olelo mai no lakou ia oe, Aole anei kakou e ike maopopo, e hoopihaiia na hue a pau no i ka waiua?  
<sup>13</sup> A e olelo aku no oe ia lakou, Ke i mai nei o Iehova penei, Aia hoi, o ka poe a pau e noho la ma keia aina, o na'lii e noho ana ma ka noho alii o Davida, o na kahuna, a me na kaula, a me ka poe a pau e noho la ma Ierusalema, e hoopihai no wau ia lakou i ka ona.  
<sup>14</sup> A e ulupa no wau ia lakou, kekahи maluna o kekahи, o na makuakane, a me na keikikane

pu, wahi a Iehova; aole hoi au e aloha aku, aole au e hookuu, aole au e lokomaikai aku, aka, e anai aku no wau ia lakou.

- 15 E hoolohe mai oukou, a e haliu mai hoi ka pepeiao: mai hookano, no ka mea, ua olelo no o Iehova.
- 16 E hoonani aku ia Iehova, i ko oukou Akua, mamua o kona hoopoeelele ana mai, a mamua hoi o ke kulanalana ana o ko oukou mau wawae ma na mauna pouli, a oiai oukou e kakali i ka malamalama, hoolilo oia ia i aka no ka make, a hana hoi i pouli loa.
- 17 Aka, ina aole oukou e hoolohe ia, alaila, e uwe no kuu uhane no oukou ma na wahi malu, no ka hookano; a e uwe nui loa no ko'u mau maka, a kahe ka waimaka, no ka mea, ua lawepioia ka poe hip'a Iehova.
- 18 E i aku i ke alii kane a i ke alii wahine, E hoohaaraha ia olua iho, e noho ilalo; no ka mea, e hoohaarahaia no ko olua mau pookela, a me ka leialii o ko olua nani.
- 19 E paniia no na kulanakauhale o ke kukulu hem'a, aohe mea nana e wehe: e lawepioia o ka Iuda a pau, e lawepioia a lilo loa no.
- 20 E alawa'e i ko oukou mau maka iluna, a e nana i ka poe e hele ana, mai ke kukulu akau mai. Auhea ka poe hip'a i haawiia nau, o ka poe hip'a hoi o kou nani?
- 21 Pehea la oe e olelo ai i ka wa e hoopai mai oia ia oe? Aole anei e loohia oe i ka eha e like me ka wahine hanau keiki, no ka mea, ua ao

aku no oe ia lakou e noho kapena, a e noho alii maluna ou.

- <sup>22</sup> A ina olelo oe ma kou naau, No ke aha la i hiki mai ai keia mau mea maluna o'u? No ka nui loa o kou hewa i laweia'ku la na hua lole ou, ua waiho wale ia kou mau kuekue wawae.
- <sup>23</sup> E hiki anei i ko Aitiopa ke hoano e i kona ili, a me ka leopadi i kona mau kiko? alaila oukou, ka poe maa i ka hana hewa, e hiki ai ke hana maikai.
- <sup>24</sup> Nolaila, e hoopuehu aku au ia lakou, e like me ka opala i lilo aku la i ka makani o ka waoakua.
- <sup>25</sup> Oia no kou mea loaa, o ka haawina nou i anaia e au, wahi a Iehova; no ka mea, ua hoopoina mai oe ia'u, a ua hilinai hoi i ka mea wahahhee.
- <sup>26</sup> Nolaila au e wehe ae ai i ka hua lole ou iluna ma kou maka, i ikeia kou wahi hilahila.
- <sup>27</sup> Ua ike no wau i kou moekolohe ana, a me kou hau ana, a me ka hewa o kou hookamakama, a me kau hana hoopailua maluna o na puu ma ke kula. Auwe oe, e Ierusalema! Aole anei oe e hoomaemaeia? Pehea la ka loihi?

## 14

- <sup>1</sup> KA olelo a Iehova i hiki mai io Ieremia la no ka wi.
- <sup>2</sup> Ke kanikau nei o ka Iuda, a kumakena hoi kona mau pukapa; ua eleele hoi a ilalo i ka lepo; ua pii aku la no ka uwe ana o ko Ierusalema.
- <sup>3</sup> O kolaila poe koikoi, ua hoouna lakou i ka lakou poe uuku e kii i ka wai; ua hele mai hoi lakou i na luawai, aole loaa ia lakou ka wai:

hoi aku no lakou, aohe mea iloko o ko lakou hue. Hilahila iho la lakou, a hoopalaimaka, a pulou iho la i ko lakou mau poo.

- 4** No ka mea, ua nakaka ka lepo, no ka na ole maluna o ka honua. Ua hilahila ka poe mahiai, ua pulou lakou i ko lakou mau poo.
- 5** Oia, hanau ae la ka dia ma ke kula, a haalele iho la, no ka mea, aohe mauu.
- 6** Ku mai la hoi na hoki hihiu ma na wahi kiekie; hau ae la lakou i ka makani e like me na iliohae; pau iho la no hoi ko lakou mau maka no ka mea, aohe mauu.
- 7** E Iehova, ke hoike ku e mai nei ko makou hewa ia makou, aka, e hana mai oe no kou inoa iho; no ka mea, ua nui loa ko makou hoi hope ana, ua hana hewa makou ia oe.
- 8** E ka mea e manaolana'i o ka Israela, o kona Hoola i ka manawa o ka popilikia, no ke aha la oe e like ai me ka malihini maloko o ka aina, a e like hoi me ke kanaka hele, i kipa'e e moe i kekahi po?
- 9** No ke aha la oe e like ai me ke kanaka pilihua, e like hoi me ke kanaka koa hiki ole ke hoola? Aka, o oe, e Iehova, eia no oe iwaenakonu o makou, a ua kapaia makou ma kou inoa; mai haalele oe ia makou.
- 10** Penei i olelo mai ai o Iehova i keia poe kanaka, ua makemake no lakou e hele hewa pela, aole lakou i kaohi i ko lakou mau wawae; nolaila, aole i ae mai o Iehova ia lakou; e hoomanao no oia i ko lakou hewa, a e hoopai hoi i ko lakou hala.

- 11** Alaila, olelo mai la o Iehova ia'u, Mai pule aku oe no keia poe kanaka, no ka maikai.
- 12** Ia lakou e hookeai ai, aole au e hoolohe i ko lakou kahea ana; a ia lakou e kaumaha'i i ka mohai kuni, a me ka mohai makana, aole au e ae aku ia lakou; aka, e hoopau no wau ia lakou i ka pahikaua, a i ka wi, a i ka mai ahulau.
- 13** Alaila, i iho la au, Auwe, e ka Haku, e Iehova e! Aia hoi, ke olelo mai nei na kaula ia lakou, Aole oukou e ike i ka pahikaua, aole hoi e loaa ia oukou ka wi; aka, e haawi aku no au ia oukou i ka malu oiaio ma keia wahi.
- 14** Alaila, olelo mai la o Iehova ia'u, Ke wanana nei na kaula i ka wahahhee ma ko'u inoa. Aole au i hoouna aku ia lakou, aole hoi au i kauoha aku la ia lakou, aole hoi au i olelo ia lakou. Ke wanana nei lakou ia oukou i hihio wahahhee, a me ka anaana, a me ka mea hope ole, a me ka wahahhee o ko lakou naau.
- 15** Nolaila, ke olelo mai nei o Iehova, no na kaula, ka poe i wanana ma ko'u inoa, aole hoi au i hoouna aku ia lakou; aka, ke olelo nei lakou, Aole e hiki mai ka pahikaua, aole hoi ka wi iloko o keia aina: E hoopauia ua poe kaula la, i ka pahikaua, a me ka wi.
- 16** A o na kanaka a lakou i ao aku ai i ka wanana ana, e kiolaia'ku no lakou iloko o na alanui o Ierusalema, no ka wi, a me ka pahikaua; aohe o lakou mea nana lakou e kanu, o lakou, a me ka lakou wahine, aole hoi ka lakou keikikane, aole ka lakou

kaikamahine; no ka mea, e ninini aku au i ko lakou hewa maluna o lakou.

<sup>17</sup> Nolaila, e olelo aku oe i keia olelo ia lakou; E kahe no ko'u mau maka i ka wai, i ka po a me ke ao, aole hoi laua e hooki; no ka mea, ua lukuia i ka luku nui ke kaikamahine puupaa o ko'u poe kanaka, i ka hahau ino loa.

<sup>18</sup> Ina e hele aku au i ke kula, alaila, e nana i ka poe i lukuia i ka pahikaua! a ina komo wau iloko o ke kulanakauhale, alaila, e nana aku i ka poe i mai no ka wi! Oia, kaahele aku no ke kaula, a me ke kahuna iloko o ka aina a lakou i ike ole ai.

<sup>19</sup> Ua hoole loa anei oe i ka Iuda? Ua hoopailua anei kou uhane ia Ziona? No ke aha la oe i pepehi mai ai ia makou, aole hoi he hoola no makou? Kakali makou i ka malu, aole hoi he pono: a i ka hoola hoi, aia hoi, he popilikia!

<sup>20</sup> E Iehova, ua ike no makou i ko makou hewa, a me ka hala o ko makou poe makua; no ka mea, ua hana hewa aku makou ia oe.

<sup>21</sup> Mai hoowawahawa mai oe, no kou inoa iho, mai hoino oe i ka nohoalii o kou nani. E hoomanao, mai uhai oe i kou berita me makou.

<sup>22</sup> Aia anei iwaena o na mea lapuwale o na aina e kekahi mea hooua mai i ka ua? E hiki anei i na lani ke haawi mai i ka ua? Aole anei o oe ia, e Iehova, ko makou Akua? Nolaila makou e hilinai aku ai ia oe; no ka mea, ua hana oe i keia mau mea a pau.

## 15

- <sup>1</sup> A LAILA, olelo mai la o Iehova ia'u, Ina i ku mai o Mose, a me Samuelia imua o'u, aole no e kau ko'u manao ma keia poe kanaka. E kiola ia lakou mai ko'u alo aku, a e puka aku lakou iwaho.
- <sup>2</sup> A ina e olelo mai lakou ia oe, Mahea makou e puka aku ai? Alaila, e olelo oe ia lakou, Ke olelo mai nei o Iehova penei, O ka poe no ka make, i ka make no; a o ka poe no ka pahikaua, i ka pahikaua no; a o ka poe no ka wi, i ka wi no; a o ka poe no ka lawepioia, i ka lawepioia no.
- <sup>3</sup> A e hookau aku au maluna o lakou i na mea eha, wahi a Iehova; o ka pahikaua e pepehi; o na ilio e haehae; o na manu o ka lani, a me na holoholona o ka honua, e ai, a e hoopau.
- <sup>4</sup> A e haawi no wau e laweia lakou i na aina a pau o ka honua nei, no Manase, ke keiki a Hezekia, ke alii o ka Iuda, no ka mea ana i hana'i ma Ierusalema.
- <sup>5</sup> No ka mea, owai ka mea aloha aku ia oe, e Ierusalem? Owai ka mea kumakena ia oe? Owai auanei ka mea e huli ae, e ninau i kou noho ana?
- <sup>6</sup> Ua haalele mai oe ia'u, wahi a Iehova, ua hoi hope oe. Nolaila, e kikoo ku e aku au i ko'u lima ia oe, a e luku ia oe; no ka mea, ua uluhua wau i ka mihi ana.
- <sup>7</sup> E hoolulu aku au ia lakou i ka peahi lulu ma na pukapa o ka aina; e hoonele au ia lakou i na keiki, e luku aku no au i ko'u poe kanaka; aole lakou i huli, mai ko lakou aoao mai.

- 8** E oi aku ka nui o ko lakou wahinekanemake ia'u i ko ke one o ke kai. I ke awakea, e hoopuka no au maluna o lakou, maluna hoi o ka makuwahine o ka poe ui, i poe luku. E hoopuka no au maluna ona me ka hoohikilele ka makau a me ka weliweli.
- 9** Mae wale aku ka mea i hanau i na mea ehiku, e kaili ana ke ea. Ua napoo kona la i ke ao okoa; ua hilahila oia, ua hoopalaimaka hoi. A e haawi no wau i ke koena o lakou i ka pahikaua imua o ko lakou poe enemi, wahi a Iehova.
- 10** Auwe hoi au, e kuu makuwahine, no ka mea, ua hanau mai oe ia'u, he kanaka hakaka, he kanaka paio no ko ka honua a pau! Aole au i hoolimalima kala ma ke kuala, aole hoi i aie kala ma ke kuala; aka, ke hailili mai nei kela mea keia mea o lakou ia'u.
- 11** I mai la o Iehova, He oiaio, e pomaikai ana kou poe i koe; oiaio, na'u no e mea aku, a e hana maikai ae ka enemi ia oe i ka manawa poino, a i ka manawa popilikia.
- 12** Na ka hao anei e uhaki i ka hao o ke kukulu akau, a me ke keleawe?
- 13** A e haawi no wau i kou waiwai, a me kou ukana, no ka hoopio me ka ukū ole ia mai, a oia hoi no kou hewa a pau, a aia no ia ma kou mau mokuna a pau.
- 14** A na'u no e hoohele ia oe, me kou poe enemi a iloko o ka aina au i ike ole ai; no ka mea, ua hoaia ke ahi i kuu inaina, a e a no ia maluna o oukou.

- 15** E Iehova, ua ike no oe: e hoomanao mai oe ia'u, a e ike mai hoi ia'u, a e hooponopono mai oe ia'u i ka poe hoomaaau mai ia'u. Mai lawe aku oe ia'u, i kou ahonui ana. E ike oe, nou no wau i kaikai ai i ka hilahila.
- 16** Ua loaa no kau mau olelo, a ai no wau ia mau mea; a lilo kau olelo ia'u i mea olioli, a i mea hoi e hauoli ai ko'u naau: no ka mea, ua kapaia wau ma kou inoa, E Iehova, ke Akua o na kaua.
- 17** Aole au i noho ma ka aha o ka poe hoowahawa, aole hoi au i olioli; noho kaawale au, no kou lima; no ka mea, ua hoopiha mai oe ia'u i ka ukiukiia.
- 18** No ke aha la i mau ai ko'u eha, a ola ole hoi ko'u hahauia, a hoole hoi i ka hoolaia? E lilo anei oe ia'u e like loa me na wai hoopunipuni, mau ole?
- 19** Nolaila, ke olelo mai nei o Iehova penei, Ina hoi mai oe, alaila, e hoihoi mai no wau ia oe, a e ku no oe imu'a o'u: a ina e lawe aku oe i ka mea pono, mai ka mea hewa aku, alaila, e like auanei no oe me ko'u waha. E hoi mai lakou ia oe, aka, mai hoi aku oe ia lakou.
- 20** A e hoolilo wau ia oe i pa keleawe paa loa no keia poe kanaka; a e kaua mai no lakou ia oe, aka, aole lakou e lanakila mai maluna ou; no ka mea, owau pu no me oe, e hoola ia oe, a e hoopakele ia oe, wahi a Iehova.
- 21** A e hoopakele aku au ia oe, mai ka lima aku o ka poe hewa, a e hoolapanai aku au ia oe, mai loko aku o ka lima o ka poe hooweliweli.

## 16

- <sup>1</sup> HIKI mai ka olelo a Iehova ia'u, i mai la,
- <sup>2</sup> Mai lawe oe i wahine nau, aole hoi e loaa ia oe na keikikane, a me na kaikamahine ma keia wahi.
- <sup>3</sup> No ka mea, penei ka olelo ana mai a Iehova, no na keikikane, a no na kaikamahine i hanauia ma keia wahi, a no na makuwahine nana lakou i hanau, a no na makuakane nana lakou i ko ai ma keia aina.
- <sup>4</sup> E make mainoino lakou, aole lakou e kauikauia, aole hoi lakou e kanuia; aka, e lilo lakou i lepo maluna o ka aina; a e hoopauia no lakou i ka pahikaua, a i ka wi; a e lilo ko lakou kupapau i mea ai na na manu o ka lani, a na na holoholona o ka honua.
- <sup>5</sup> No ka mea, ke olelo mai nei o Iehova penei, Mai komo maloko o ka hale kumakena, mai hele hoi e kanikau, a e uwe ia lakou; no ka mea, ua lawe aku au i ko'u malu, mai keia poe kanaka aku, wahi a Iehova, i ko'u aloha hoi, a me ko'u lokomaikai.
- <sup>6</sup> E make no ka poe nui, a me ka poe uuku ma keia aina; aole lakou e kanuia, aole e kumakena na kanaka no lakou, aole e okioki ia lakou iho, aole hoi e koli i ke oho no lakou.
- <sup>7</sup> Aole e puunaue na kanaka i ka ai na lakou no ke kumakena, i mea e hoomaha ai ia lakou no ka make; aole hoi e hoochaine aku na kanaka ia lakou i ke kiahia o ka hooluolu no kona makuakane, a no kona makuwahine.
- <sup>8</sup> Mai komo aku hoi oe iloko o ka hale ahaaina, e noho pu me lakou, e ai, a e inu.

- 9** No ka mea, penei ka olelo ana mai a Iehova o na kaua, ke Akua, o ka Israela; Aia hoi, imua o ko oukou mau maka, a i ko oukou mau la hoi, e hooki aku au mai keia wahī aku, i ka leo o ka olioli, a i ka leo o ka hauoli, i ka leo o ke kaue mare, a i ka leo o ka wahine mare.
- 10** A hiki i ka manawa e hoike aku ai oe i keia poe kanaka i keia mau olelo a pau, a olelo mai lakou ia oe, No keaha la i kau oh a mai ai o Iehova i keia hewa nui maluna o makou? Heaha hoi ko makou hala; a heaha ka hewa a makou i hana aku ai ia Iehova, i ko makou Akua?
- 11** Alaila, e olelo aku oe ia lakou, No ka mea, ua haalele ko oukou poe makua ia'u, wahī a Iehova, a ua hele lakou mn̄muli o na akua e, a ua malama ia lakou, a ua hoomana ia lakou, a ua haalele mai ia'u, aole hoi i malama i ko'u kanawai:
- 12** A ua oi aku ka oukou hana ino ana mamua o ka ko oukou poe makua; no ka mea, aia hoi, ke hele nei kela mea keia mea o oukou mamuli o ka paakiki o kona naau hewa, i hoolohe ole mai ai lakou ia'u.
- 13** Nolaila, e kipaku aku au ia oukou mai keia aina aku, a i ka aina a oukou i ike ole ai, aole oukou, aole hoi ko oukou poe makua; a malaila oukou e malama'i i na akua e, i ke ao a me ka po, ma kahi e haawi ole aku ai au ia oukou i ke alohaia.
- 14** Nolaila, aia hoi, e hiki mai ana na la, wahī a Iehova, aole e olelo hou ia mai, Ke ola la no o Iehova, ka mea nana i lawe mai i na mamo a Israela, mai ka aina o Aigupita mai:

- 15** Aka, Ke ola la no o Iehova, ka mea nana i lawe mai i na mamo a Israela, mai ka aina o ke kukulu akau mai, a mai na aina a pau mai, kahi ana i kipaku aku ai ia lakou. A e lawe hou no wau ia lakou iloko o ka aina a'u i haawi aku ai i ko lakou poe kupuna.
- 16** Aia hoi, e kii aku no wau i na lawaia he nui, wahi a Iehova, a e loaa ia lakou na Iudaio ma ka lawaia ana; a mahope iho, e kii aku no wau i na mea imi a nui, a na lakou no e imi i na Iudaio, mai na mauna mai a pau, a mai na puu mai a pau, a mai na lua o na pohaku mai.
- 17** No ka mea, e kau no ko'u mau maka ma ko lakou aoao a pau; aole lakou e hoonaloia i ko'u maka, aole hoi e hoonaloia ko lakou hewa, mai ko'u mau maka aku.
- 18** A mamua, e hoopai papalua wau i ko lakou hewa, a me ko lakou hala; no ka mea, ua hoohaumia lakou i ko'u aina, a ua hoopiha i ko'u hooilina i na kii o ko lakou mea hau-mia, e hoopailua ai.
- 19** E Iehova, ko'u ikaika, ko'u pakaua hoi, a me ko'u puuhonua i ka la o ka popilikia, e hele mai no ko na aina e i ou la, mai na kukulu o ka honua mai, a e olelo mai, He oiaio, ua ili mai no ka hoopunipuni i ko makou poe makua, a me ka lapuwale, a me na mea waiwai ole.
- 20** E hana anei ke kanaka i na akua nona, aole hoi lakou na akua?
- 21** Nolaila, aia hoi, i keia manawa, e hoike maopopo loa aku au i ko'u lima ia lakou,

a me ko'u mana; a e ike auanei lakou, o Iehova no ko'u inoa.

## 17

- <sup>1</sup> UA palapalaia ka hewa o ka Iuda, me ka peni hao, me kahi oi hoi o ka daimana; ua kahakahaia hoi ma ka papa o ko lakou naau, a ma na pepeiaohao o ke kuahu;
- <sup>2</sup> I ka hoomanao ana o ka lakou keiki i ko lakou kuahu, a me ko lakou ululaau ma na laau uliuli maluna o na puu kiekie.
- <sup>3</sup> E kuu mauna ma ke kula, e haawi no wau i kou waiwai, a me kou ukana a pau i pio, a me kou mau wahi kiekie i hewa, ma kou mau mokuna a pau.
- <sup>4</sup> A o oe, e hele aku no oe, mai kou hoolina aku, ka mea a'u i haawi aku ai ia oe; a e hoolilo aku au ia oe i kauwa na kou poe enemi ma ka aina au i ike ole ai: no ka mea, ua hoa oukou i ke ahi ma kuu ukiuki, a e a mau loa aku no ia.
- <sup>5</sup> Ke olelo mai nei o Iehova penei, E poino ana ke kanaka i hilinai i ke kanaka, a manao iho la i ka io i ikaika nona, a haalele kona naau ia Iehova.
- <sup>6</sup> E like auanei ia me kahi i haaleleia maloko o ka waonahele, aole ia e ike i ka wa e hiki mai ai ka maikai; aka, e noho no oia ma na wahi maloo ma ka waonahele, ma ka aina hua ole, a noho ole ia.
- <sup>7</sup> Pomaikai ke kanaka i hilinai aku ia Iehova, a o Iehova hoi kona mea e manaoiana'i.
- <sup>8</sup> E like auanei ia me ka laau i kanuia ma na wai, a kupu ae la kona mau aa ma kahi mau; aole

hoi ia e ike i ka hiki ana mai o ka wela; aka, e uliuli no kona lau; a i ka makahiki wi, aole ia e makau, aole hoi e hooki oia i ka hoohua ana mai i ka hua.

<sup>9</sup> He hoopunipuni ka naau mamua o na mea a pau, a ua hewa loa hoi ia; owai ka mea hiki ke hoomaopopo?

<sup>10</sup> Owau, o Iehova, ke huli nei au i ka naau, ke hoao nei au i ka opu, e haawi i kela kanaka keia kanaka e like me kona mau aoao, e like hoi me ka hua o kana mau hana.

<sup>11</sup> E like me ka manu aihue i hoopunana i na hua ana i hanau ole ai; pela no ka mea i loaa ka waiwai ma ka pono ole, iwaenakonu o kona mau la, e waiho oia ia mea, a i kona hope, e lapuwale oia.

<sup>12</sup> He nohoalii nani kiekie loa, mai kinohi mai, oia kahi o ko makou keenakapu.

<sup>13</sup> E Iehova, ka mea e manaolana'i o ka Israela, o ka poe a pau e haalele ia oe, e hilahila auanei lakou, a o ka poe e haalele ia'u, e kahakahaia lakou ma ka honua, no ka mea, ua haalele lakou ia Iehova, i ke kumu o na wai ola.

<sup>14</sup> E hoola mai oe ia'u, e Iehova, a e hoolaia mai no wau; e hoopakele mai oe ia'u a e hoopakeleia mai no wau; no ka mea, o oe no ka'u e kaena ai.

<sup>15</sup> Aia hoi, ke olelo mai nei lakou ia'u, Auhea ka olelo a Iehova? E hele mai ia, ano.

<sup>16</sup> Aole au i hoolalelale ia'u iho mai ka noho kahuhipa ana, e hahai mamuli ou, aole hoi

au i makemake ia la kaumaha, ua ike no oe. O ka mea i puka aku iwaho o ko'u mau lehelehe, ua pololei no ia imua ou.

**17** Mai lilo oe i mea makau no'u; o oe no ko'u mea e manaolana'i, i ka la o ka hewa.

**18** E hoohilahilaia ka poe hoomaaui mai ia'u, mai hookuu ia'u i ka hoohilahilaia. E hoopilihua ia lakou, mai hookuu ia'u i ka hoopilihuaia. E lawe mai oe maluna o lakou i ka la o ka hewa, a e luku hoi oe ia lakou i ka luku papalua.

**19** Ke olelo mai nei o Iehova ia'u penei, O hele, e ku ma ka pukapa o na keiki a ko'u poe kanaka, kahi e komo mai ai na'lii o ka Iuda, ma kahi hoi e puka aku ai lakou iwaho, a ma na pukapa a pau hoi o Ierusalema;

**20** A e i aku ia lakou, E hoolohe oukou i ka olelo a Iehova, e na'lii o ka Iuda, a me ka Iuda a pau, a me ka poe a pau e noho ana ma Ierusalema, ka poe komo iloko, ma keia mau pukapa.

**21** Ke olelo mai nei o Iehova penei, E malama oukou i ko oukou kino iho; mai halihali oukou i ka mea halihali i ka la Sabati, aole hoi e lawe mai iloko, ma na pukapa o Ierusalema.

**22** Mai lawe aku hoi i ka haawe mawaho aku o ko oukou mau hale i ka la Sabati; mai hana hoi i kekahia hana; aka, e hoano oukou i ka la Sabati, me au i kauoha aku ai i ko oukou poe kupuna.

**23** Aole lakou i hoolohe, aole hoi i haliu mai i ko lakou mau pepeiao, aka, hooolea lakou i ko

lakou a-i i mea e lohe ole ai lakou, i mea hoi,  
e loaa ole ai ia lakou ka naauao.

- 24** A ina e hoolohe pono mai oukou ia'u, wahi a Iehova, a lawe ole i ka mea lawe maloko o na pukapa o ke kulanakauhale i ka la Sabati: aka, hoano oukou i ka la Sabati, a hana ole i kekahihana ia la;
- 25** Alaila, e komo mai no iloko o na pukapa o keia kulanakauhale, na'lii, a me na luna, e noho ana ma ka nohoalii o Davida, e holo ana hoi maloko o na halekaa, a maluna o na lio, o lakou, a me ko lakou luna, o na kanaka o ka Iuda, a me ka poe noho ma Ierusalema; a e hoomau loa ia aku no keia kulanakauhale.
- 26** A e hele mai no lakou, mai na kulanakauhale o ka Iuda mai, a no na wahi mawaho o Ierusalema a puni, a mai ka aina o Beniamina mai, a mai na papu mai, a mai na mauna mai, a mai ke kukuluhema mai, e lawe ana i na mohnikuni, a me na alana, a me na mohai makana, a me ka mea ala, e lawe ana hoi i na mea aloha, a i ka hale o Iehova.
- 27** Aka, ina aole oukou e hoolohe mai ia'u, e hoano i ka la Sabati, a e lawe ole hoi i ka mea lawe, e komo ana hoi iloko ma na pukapa o Ierusalema i ka la Sabati; alaila, e hoa no wau i ke ahi ma kona mau pukapa, a e hoopau no ia i na hale alii o Ierusalema, aole hoi ia e kinaiia.

## 18

**1** O KA olelo i hiki mai io Ieremia la mai o Iehova

- mai, i ka i ana mai,
- <sup>2</sup> E ku iluna, a e iho ilalo i ka hale o ka potera, a malaila e mea aku au, a e lohe oe i ka'u mau olelo.
- <sup>3</sup> Alaila, iho aku la au ilalo i ka hale o ka potera, a aia hoi, e hana ana oia i ka hana maluna o na kaa.
- <sup>4</sup> A o ka ipu ana i hana'i no ka lepo, ino iho la no ia iloko o ka lima o ka potera. Alaila, hana hou iho la no oia i ipu e, e like me ka makemake o ka potera e hana.
- <sup>5</sup> Alaila, hiki mai la ka olelo o Iehova ia'u, i mai la,
- <sup>6</sup> E ko ka hale o ka Israela, aole anei e hiki ia'u ke hana e like me keia potera, wahi a Iehova? Aia hoi, e like me ka lepo iloko o ka lima o ka potera, pela no oukou iloko o ko'u lima, e ko ka hale o ka Israela.
- <sup>7</sup> I ka wa a'u e olelo ai no kekahī lahuikanaka, a no kekahī aupuni, e uhuki, e wawahī, a e luku iho;
- <sup>8</sup> O kela lahuikanaka a'u i hoohewa aku ai, ina i huli lakou, mai ko lakou hewa mai, alaila, e mihi no wau i ka hewa a'u i manao ai e hana ia lakou.
- <sup>9</sup> A i ka wa a'u e olelo ai no kekahī lahuikanaka, a no kekahī aupuni, e kukulu, a e hookupaa;
- <sup>10</sup> Ina e hana hewa ia imua o ko'u alo, a hoolohe ole i ko'u leo, alaila, e mihi no wau i ka maikai a'u i olelo ai e hoopomaikai aku ia lakou.
- <sup>11</sup> Ano la hoi, e olelo aku oe i kanaka o ka Iuda, a i ka poe e noho la ma Ierusalema, e i aku, Ke olelo mai nei o Iehova penei, Aia hoi, ke hana nei au i ka hewa ia oukou; ke noonoo

nei hoi i manao ku e ia oukou. E hoi mai oukou, ano la, o kela mea, o keia mea, mai kona aoao hewa mai, a e hoomaikai i ko oukou aoao a me ka oukou hana ana.

**12** I mai la lakou, Makekewa; e hele no makou mamuli o ko makou manao iho, a e hana no kela mea keia mea o makou ma ka paakiki o kona naau hewa.

**13** Nolaila, ko olelo mai nei o Iehova penei, E ninau oukou iwaena o ko na aina e, Owai ka mea i lohe i na mea e like me ia? Ua hana no ka wahine puupaa o ka Iseraela i ka mea hoopailua loa.

**14** E haalele anei ka hau ia Lebanon no na pohaku o ke kula, e kiolaia anei na wai huihui e kahe ana mai kahi e mai?

**15** No ka mea, ua hoopoina ko'u poe kanaka ia'u; ua kuni lakou i ka mea ala no ka lapuwale, a ua hoohina ia lakou ma ko lakou kuamoo, na kuamoo kahiko, e hele ma na kuamoo e, ma ke kuamoo i hoouka ole ia:

**16** I lilo ko lakou aina i neoneo, i mea hoowahawa mau loa ia. E kahaha auuae i na mea a pau e hele ae malaila, a e kunokunou i kona poo.

**17** E hoopuehu aku au ia lakou imua o ka enemi, me ka makani mai ka hikina mai; e hoike aku au ia lakou i ke kua, aole i ka maka, i ka la o ko lakou popilikia.

**18** Alaila, olelo mai la lakou, E hele mai, e imi hala kakou no Ieremia, no ka mea, aole e haule ke kanawai i ke kahuna, aole hoi ka manao akamai i ka poe akamai, a me ka olelo hoi i

ke kaula. E hele mai, e hahau kakou ia ia i ke alelo; mai hoolohe kakou i kekahi o kana mau olelo.

<sup>19</sup> E haliu mai oe ia'u, e Iehova, a e hoolohe i ka leo o ka poe hakaka me au.

<sup>20</sup> E hoihoi ia anei ka hewa no ka maikai? No ka mea, ua kohi lakou i lua no ko'u ola. E hoomanao oe i ko'u ku ana imua ou, e olelo i ka maikai no lakou, e hoohuli aku i kou inaina mai o lakou aku.

<sup>21</sup> Nolaila, e haawi aku oe i ka lakou keiki no ka wi, a e haawi ia lakou e make i ka ikaika o ka pahikaua. E hooneleia hoi ka lakou wahine i ka lakou keiki, a lilo lakou i wahinekane-make; e haawi hoi i ko lakou poe kanaka i ka make, a me ko lakou kanaka opio opio no ka lukuia i ka pahikaua, ma ka hoouka kaua ana.

<sup>22</sup> E loheia ka hea ana, mai ko lakou hale mai, i ka wa au e hoopuka mai ai i poe kaua maluna o lakou me ka hoohikilele; no ka mea, ua kohi lakou i lua, e hoopaa ia'u, a ua huna lakou i pahele no kuu mau wawae.

<sup>23</sup> Aka, ua ike no oe, e Iehova, i ko lakou manao a pau ia'u, e pepehi mai ia'u. Mai kala oe i ko lakou hala, aole hoi e holoi i ko lakou hewa, mai kou alo aku; aka, e hoohiolo ia lakou imua ou. E hana oe pela ia lakou, i ka manawa o kou inaina.

## 19

<sup>1</sup> KE olelo mai nei o Iehova penei, O hele e kii aku i hue lepo o ka potera, a i poe kahiko o na

- kanaka, a i poe kahiko o na kahuna;
- <sup>2</sup> A e hele aku i ke awawa o ke keiki a Hinoma, aia no ia ma kahi e komo ai i ka puka hikina: a e kala aku oe malaila, i na olelo a'u e hai aku ai ia oe;
- <sup>3</sup> E i aku, E hoolohe oukou i ka olelo a Iehova, e na'lii o ka Iuda, a me ka poe e noho ana ma Ierusalema. Penei ka olelo ana mai a Iehova o na kaua, ke Akua o ka Israela: Aia hoi, e lawe mai no wau i ka hewa maluna o keia wahie; e kani no na pepeiao o na mea a pau e lohe ia mea.
- <sup>4</sup> No ka mea, ua haalele lakou ia'u, a ua hoowahawaha i keia wahie, a ua kuni i ka mea aia malaila, no na akua e, i na mea ike ole ia e lakou, a me ko lakou mau makua, a me na'lii o ka Iuda, a ua hoopihia lakou i keia wahie, i ke koko o ka poe hewa ole.
- <sup>5</sup> Ua hana hoi lakou i na wahie kiekiae o Baala, e puhi i ka lakou keikikane i ke ahi, i mohai kuni no Baala, ka mea a'u i kauoha ole ai, aole hoi i olelo, aole hoi i komo ia iloko o ko'u naau.
- <sup>6</sup> Nolaila, aia hoi, e hiki mai ana na la, wahie a Iehova, e kapa hou ole ia'i keia wahie o Topeta, aole hoi ke awawa o ke keiki a Hinoma, aka, o ke awawa o ka pepehi.
- <sup>7</sup> A e hooki aku au ma keia wahie i ka manao akamai o ka Iuda, a me Ierusalema; a na'u no lakou e hoohina i ka pahikaua, imua o ko lakou poe enemi, a i ka lima hoi oka poe i imi i ko lakou ola. A e haawi no wau i ko lakou kupapau i mea ai, na na manu o ka lani, a na na holoholona o ka honua.
- <sup>8</sup> A e hoolilo wau i keia kulanakauhale i neoneo, a i mea hoowahawaha; o na mea a pau e hele

ae, e kahaha no lakou, a e hoowawahawa  
mai no kona wawahiiia a pau.

<sup>9</sup> A na'u no e hanai aku ia lakou i ka io o ka lakou  
mau keikikane, a me ka io o ka lakou mau  
kaikamahine, a e ai no kela mea keia mea i  
ka io o kona hoalauna maloko o ka ikiiki, a  
me ka pilikia o ko lakou poe enemi, a me ka  
poe i imi i ko lakou ola, e hoopilikia mai ai  
ia lakou.

<sup>10</sup> Alaila, e wawahi oe i ka hue imua o na maka o  
na kanaka i hele pu me oe;

<sup>11</sup> A e i aku oe ia lakou, Ke olelo mai nei o Iehova  
o na kaua penei, Pela no wau e wawahi ai i  
keia poe kanaka, a me keia kulanakauhale,  
e like me ka wawahiiia o ka ipu a ka potera,  
ka mea hiki ole ke kapili hou ia; a e kanu no  
hoi lakou ma Topeta, a e kaanwale ole kahi  
e kanu ai.

<sup>12</sup> Pela no wau e hana'i i keia wahi, wahi a Iehova,  
a i kona poe e noho ana, a e hoohalike i keia  
kulanakauhale me Topeta.

<sup>13</sup> A o na hale o Ierusalema, a me na hale o na'lii  
o ka Iuda, e haumia auanei lakou, e like me  
kahia o Topeta, no ka mea, maluna o na hale  
a pau, ua puhi lakou i ka mea ala, no na  
hoku a pau o ka lani, a ua ninini aku i na  
mohaiinu no na akua e.

<sup>14</sup> Alaila, hele mai la o Ieremia, mai Topeta mai,  
kahia a Iehova i hoouna aku ai ia ia e  
wanana; a ku mai la oia ma ke kahua o ka  
hale o Iehova, a i mai la i na kanaka a pau,

<sup>15</sup> Ke i mai nei o Iehova o na kaua, ke Akua o ka  
Israela penei, Aia hoi, e lawe mai no wau

maluna o keia kulanakauhale, a maluna o kona mau kauhale a pau, i ka hewa a pau a'u i hai aku ai nona; no ka mea, ua hoopaaiki lakou i ko lakou a-i, i mea e hoolohe ole ai lakou i ka'u mau olelo.

## 20

- 1** A O Pasehura, ke keiki a Imera, ke kahuna, ka mea maluna o na luna maloko o ka hale o Iehova, lohe no oia, ua wanana o Ieremia i keia mau mea.
- 2** Alaila, hahau o Pasehura ia Ieremia, ke kaula, a hahao iho la ia ia iloko o kahi paa o na laau kupee, ma ka pukapa kiekie o Beniamina, o ka mea kokoke i ka hale o Iehova.
- 3** A ia la iho, lawe mai o Pasehura ia Ieremia mawaho o kahi paa o na laau kupee. Alaila, olelo ae la o Ieremia ia ia, Aole i kapa mai o Iehova i kou inoa, o Pasehura, aka, o Magoramisabiba.
- 4** No ka mea, ke olelo mai nei o Iehova peneia, Aia hoi, e hoolilo no wau ia oe i mea makau wale nou iho, a no kou poe hoahanau a pau; a e haule no lakou i ka pahikaua o ko lakou poe enemi, a e ike no kou mau maka; a e haawi no wau i ka Iuda a pau iloko o ka lima o ke alii o Babulona, a e lawepio no oia ia lakou i Babulona, a luku no oia ia lakou i ka pahikaua.
- 5** A e haawi no wau i ka ikaika a pau o keia kulanakauhale, a me kana hana a pau, a me kona mau mea maikai a pau, a o ka waiwai a pau o na'lii o ka Iuda ka'u e haawi aku

ai iloko o ka lima o ko lakou poe enemi, na mea e hao i ka lakou, a lawepio ia lakou, a e lawe aku keia poe ia lakou i Babulona.

- 6** A o oe, e Pasehura, a me ka poe a pau e noho la ma kou hale, e hele no iloko o ke pio; a e hiki no oe i Babulona, a malaila oe e make ai, a malaila oe e kanuia'i, o oe, a me kou mau makamaka a pau, ka poe au i wanana aku ai ma ka wahahhee.
- 7** E Iehova, ua hoowalewale mai oe ia'u, a ua walewale au; ua oiaku kou ikaika i ko'u, a ua lanakila oe; he mea akaaka wau i na la a pau, henehene mai no na mea a pau ia'u.
- 8** No ka mea, i ka wa a'u i olelo ai, uwe aku la au, a kahea aku la no hoi, he kaili wale, a me ka hao ana; no ka mea, lilo no ka olelo a Iehova, i mea e heneheneia mai ai, a i mea hoi e hoowahawahaia mai ai au i na la a pau.
- 9** Alaila, olelo iho la au, Aole au e hoomanao hou ia ia, aole hoi e olelo hou ma kona inoa; aka, ua like ia iloko o ko'u naau, me ke ahi e a ana, a paniia hoi iloko o ko'u mau iwi; a ikiiki au i ka hoomanawanui ana, aole hoi i hiki ia'u.
- 10** Lohe no wau i ka hoowahawaha ana o na mea he nui, he makau no ma na aoao a pau. E hai aku oe, a e haiaku no makou ia, wahi a lakou. Ua hoomakakiu mai ko'u poe makamaka a pau i ko'u haule ana, me ka manao iho, E hoowalewaleia paha oia, a lanakila kakou maluna ona, a e hoopai aku kakou ia ia no kakou.

- 11** Aka, o Iehova pu no me au, e like me ka mea mana a weliweli; nolaila e hina'i ka poe hoomaau mai ia'u, aole lakou e lanakila: e hilahila loa auanei lakou, no ka mea, aole lakou e pomaikai. Aole e poinaia ko lakou hilahila mau loa.
- 12** Aka, o oe, e Iehova o na kaua, ka mea hoao mai i ka poe i pono, ka mea ike i ka opu, a me ka naau, e hoike mai oe ia'u i kou ukiuki ia lakou; no ka mea, ia oe no ko'u hoopii ana i ko'u pono.
- 13** E oli aku ia Iehova, e hoomaikai ia Iehova, no ka mea, ua hoopakele oia i ka uhane o ka poe hune, mai ka lima aku o ka poe hana hewa.
- 14** E hoinoia ka la a'u i hanauia'i; Mai hoomaikaiia ka la a kuu makuwahine i hanau mai ai ia'u.
- 15** E hoinoia ke kanaka i hai aku i ko'u makuakane, me ka olelo aku, Ua hanauia mai he keikikane nau, a hoohauoli nui aku la ia ia.
- 16** E hoohalikeia keia kanaka me na kulanakauhale a Iehova i hoohiolo ai, a mihi ole hoi. I lohe oia i ka uwe ana i kakahiaka, a me ka hooho ana i ke awakea;
- 17** No kona pepehi ole mai ia'u, mai ka opu mai, a lilo ole ko'u makuwahine i lua no'u, a mau loa aku ka nui ana o kona opu.
- 18** No keaha la wau i puka mai ai mawaho mai o ka opu, e ike i ka luhi, a me ke kaumaha, i hoopauia ko'u mau la i ka hilahila?

## 21

<sup>1</sup> KA olelo i hiki mai io Ieremia la, mai o Iehova mai

i ka wa i hoouna aku ai o Zedekia, ke alii,  
 io na la, ia Pasehura, ke keiki a Malekia, a  
 me Zepania, ke keiki a Maaseia, ke kahuna,  
 i aku la,

- 2** Ke noi aku nei au ia oe, e noi aku ia Iehova  
 no kakou; no ka mea, ke kaua mai nei o  
 Nebukaneza, ke alii o Babulona ia kakou;  
 ina paha e hana mai o Iehova ia kakou, e  
 like me kana hana kupanaha a pau, i pii aku  
 ke alii o Babulona, mai o kakou aku.
- 3** Alaila, olelo mai la o Ieremia ia lakou, Penei  
 oukou e olelo aku ai ia Zedekia;
- 4** Ke olelo mai nei o Iehova, ke Akua o ka Israela  
 peneia, Aia hoi, e hoihoi hope aku no au i  
 na mea kaua, na mea maloko o ko oukou  
 lima, na mea a oukou i kaua ai i ke alii o  
 Babulona, a i ko Kaledea, ka poe hoopilikia  
 mai ia oukou mawaho o na pa, a e hoiliili au  
 ia mau mea maloko o keia kulanakauhale.
- 5** A owau no kekahia e kaua aku ia oe, me ka lima  
 kakauha, a me ka lima ikaika, me ka huhu  
 no, a me ka inaina, a me ka ukiuki loa.
- 6** A e hahau no wau i ka poe noho ma keia ku-  
 lauakauhale, i kanaka, a me na holoholona;  
 a e make no lakou i ka mai ahulau nui.
- 7** A mahope iho, wahia Iehova, e haawi no wau ia  
 Zedekia, i ke alii o ka Iuda, a me kana poe  
 kauwa, a me kona poe kanaka, na mea o  
 keia kulanakauhale i koe i ke ahulau, a me  
 ka pahikaua, a me ka wi, a iloko o ka lima  
 o Nebukaneza, o ke alii o Babulona, a iloko  
 o ka lima o ko lakou poe enemi, a iloko o ka  
 lima o ka poe imi i ko lakou ola; a e hahau  
 mai no oia ia lakou i ka maka o ka pahikaua.

Aole ia e hookoe ia lakou, aole e aloha mai,  
aole hoi e lokomaikai mai.

- <sup>8</sup> Ae olelo aku oe i keia poe kanaka, Ke olelo mai nei o Iehova penei, Aia hoi, ke kau nei au imua o oukou i ka aoao o ke ola, a me ka aoao o ka make.
- <sup>9</sup> O ka mea e noho ma keia kulanakauhale, e make no ia i ka pahikaua, a me ka wi, a me ka mai ahulau; aka, o ka mea puka aku iwaho, a haule aku i ko Kaleddea, ka poe e hoopilikia ana ia oukou, e ola no ia, a e koe no kona ola i waiwaipio nona iho.
- <sup>10</sup> No ka mea, ua hooku e au i ko'u maka i keia kulanakauhale, ma ka hewa, aole ma ka maikai, wahi a Iehova; a e haawiaia ia iloko o ka lima o ke alii o Babulona, a e puhi oia i keia wahi i ke ahi.
- <sup>11</sup> E hoolohe oukou i ka olelo a Iehova, no ka hale o ke alii o ka Iuda.
- <sup>12</sup> E ko ka hale o Davida, ke i mai nei o Iehova peneia, E hana oukou i ka hooponopono i kakahiaka, a e hoopakele i ka mea i haoia, mai ka lima aku o ka mea hookaumaha, o puka aku ko'u ukiuki, e like me ke ahi, a e a hoi, aole mea e hiki ia ia ke kinai, no ka hewa o ka oukou hana ana.
- <sup>13</sup> Aia hoi, ua ku e no wau ia oe, e ka mea noho ma ke awawa, a ma ka pohaku o ka papu hoi, wahi a Iehova, ka poe olelo, Owai la ka mea iho ilalo e ku e ia makou? Owai la ka mea e komo iloko o ko makou wahi noho ai?

<sup>14</sup> Aka, e hoopai aku au ia oukou, e like me ka hua o ka oukou hana ana, wahi a Iehova; a e puhi no wau i ke ahi iloko o kolaila ululaau, a e hoopau no ia i na mea a pau, a puni ia wahi.

## 22

- <sup>1</sup> KE olelo mai nei o Iehova penei, E iho oe ilalo i ka hale o ke alii o ka Iuda, a e olelo malaila i keia olelo;
- <sup>2</sup> E i aku, E hoolohe oe i ka olelo a Iehova, e ke alii o ka Iuda, ka mea noho ma ka nohoalii o Davida, o oe, a me kau poe kauwa, a me kou poe kanaka, na mea komo iloko o keia mau pukapa.
- <sup>3</sup> Ke olelo mai nei o Iehova penei; E hana oukou i ka hooponopono, a me ka maikai, a e hoopakele i ka mea i haoia, mai ka lima aku o ka mea hookaumaha: mai hana i ka mea i hewa, mai hana i ka mea kolohe i ka malihini, a i ke kieki makuaole, a i ka wahine kanemake: mai hookahe hoi i ke koko hala ole ma keia wahi.
- <sup>4</sup> No ka mea, ina hana io oukou i keia, alaila, e komo mai no ma na pukapa o keia hale, he poe alii, e noho ana ma ka nohoalii o Davida, e holo ana hoi maloko o na kaakaua, a maluna o na lio, oia, a me kana poe kauwa, a me kona poe kanaka.
- <sup>5</sup> Aka, ina aole oukou e hoolohe i keia mau olelo, ke hoohiki nei au ia'u iho, wahi a Iehova, e lilo no keia hale i neoneo.
- <sup>6</sup> No ka mea, penei ka olelo ana mai a Iehova i ko ka hale o ke alii o ka Iuda; O oe no o Gileada ia'u, o ke poo hoi o Lebanonona. He

oiaio, e hoolilo no wau ia oe i waonahele, i kulanakauhale noho ole ia.

<sup>7</sup> A na'u hoi e hoomakaukau i poe luku aku ia oe, o kela mea keia mea, me kona mea eha: a na lakou e kua ilalo i kou mau kedera maikai, a e kiola ia lakou iloko o ke ahi.

<sup>8</sup> A e nui loa auanei na lahuikanaka e hele ae a hala keia kulanakauhale, a e olelo kela mea keia mea o lakou i kona hoa, No keaha la i haua mai ai o Iehova ia mea i keia kulanakauhale nui?

<sup>9</sup> Alaila, e olelo no lakou, No ka mea, ua haalele lakou i ka berita o Iehova, ko lakou Akua, a ua hoomaua i na'kua e, a ua malama ia lakou.

<sup>10</sup> Mai uwe oukou no ka mea i make, mai kanikau ia ia; e uwe nui i ka mea i hele aku; no ka mea, aole ia e hoi hou mai, aole e ike hou i kona aina hanau.

<sup>11</sup> No ka mea, penei ka olelo ana mai a Iehova no Saluma, ke keiki a Iosia, ke alii o ka Iuda, ka mea i noho aupuni ma ka hakahaka o Iosia, o kona makua, ka mea i hele, mai keia wahi aku; aole ia e hoi hou ilaila:

<sup>12</sup> Aka, e make no oia ma kahi a lakou i lawepio ai ia ia, aole e ike hou mai i keia aina.

<sup>13</sup> Auwe ka mea kukulu i kona hale me ka pono ole, a me kona mau keena maluna, me ka mea aole i maikai, ka mea hoohana wale i kona hoalauna, aole hoi i uku mai no kana hana ana;

<sup>14</sup> Ka mea i olelo, E hana no wau i hale akea no'u me na keena nui maluna; a kalai hoi i mau

puka makani nona; a ua kapiliia i ka laau kedera, a ua penaia i ka ulaula.

- 15 E noho aupuni anei oe no kou hoopuni ana ia oe i ke kedera? Aole anei i ai, a inu kou makuakane, a hana i ka hooponopono, a me ka pololei, alaila, ua pomaikai oia?
- 16 Nana no i hooponopono i ka hihia o ka poe hune, a me ka poe nele, alaila, pomaikai. Aole anei oia ka i ike mai ia'u, wahi a Iehova?
- 17 Aka, aohe mea ma kou mau maka, a ma kou naau, o kou makeewaiwai no, a me ka hookahe i ke koko hala ole, a me ka hookaumaha, a me ka lawe wale, e hana hoi.
- 18 Nolaila, penei ka olelo ana mai a Iehova no Iehoiakima, ke keiki a Iosia, ke alii o ka Iuda; Aole lakou e kumakena ia ia, me ka i iho, Auwe kuu kaikuaana! auwe kuu kaikuwahine! aole lakou e kumakena ia ia, me ka i iho, Auwe ka haku! auwe kona nani!
- 19 E kanuia no ia me ke kanu ana o ka hoki, i hukiia a kiolaia'ku mawaho aku o na pukapa o Ierusalema.
- 20 E pii aku oe i Lebanonona, a e kahea aku, e hookiekie hoi i kou leo ma Banana, a e kahea aku ma kela aoao; no ka mea, ua lukuia kou poe ipo a pau.
- 21 I kou wa i pomaikai ai, olelo aku la no wau ia oe, aka, olelo mai oe, Aole au e hoolohe: oia hoi kou aoao, mai kou wa opioipo mai, no ka mea, aole oe i hoolohe i ko'u leo.
- 22 Na ka makani no e hoopau i kou mau kahu a pau; a e hele no kou poe ipo iloko o ke

pio. Oiaio, i kela wa, e hilahila no oe, a e hoopalai no hoi, no kou hewa a pau.

- 23 E ka mea noho ma Lebanonona, ka mea hana i kou punana maloko o na laau kedera; pehea la oe e alohaia mai ai i ka wa e hiki mai ai kou eha, o ke kuakoko hoi, e like me ko ka wahine hanau keiki?
- 24 Me au e ola nei, wahi a Iehova, ina o Konia, ke keiki a Iehoiakima, ke alii o ka Iuda, ina paha oia ka hoailona ma ko'u lima akau; e uhuki aku no au ia oe malaila mai.
- 25 A e haawi aku no au ia oe iloko o ka lima o ka poe e imi nei i kou ola, a iloko hoi o ka lima o ka poe nona ka maka au e makau nei, iloko o ka lima hoi o Nebukaneza, ke alii o Babulona, a iloko o ka lima o ko Kaleddea.
- 26 A e kipaku aku no wau ia oe, a me kou makuwahine nana oe i hanau, i ka aina e, i kahi o oukou i hanau ole ia'i; a malaila oukou e make ai.
- 27 Aka, o ka aina a lakou e makemake ai e hoi mai; aole lakou e hoi mai ilaila.
- 28 O keia kanaka, o Konia, he kii anei oia i hoowahawahaia, a na ha no hoi? He ipu anei i makemake ole ia? No ke aha lakou i kipakuia'ku ai, oia, a me kana hua, a ua hooleilia iloko o ka aina a lakou i ike ole ai?
- 29 E ka honua, ka honua, ka honua, E hoolohe oe i ka olelo a Iehova:
- 30 Ke olelo mai nei o Iehova penei, E palapala oe i keia kanaka, ua keiki ole, he kanaka pomaikai ole i kona mau la: no ka mea, aohe kanaka o kana hua e pomaikai ana, e

noho ana ma ka nohoalii o Davida, a e noho aupuni hou ana ma ka Iuda.

## 23

- <sup>1</sup> A UWE ka poe kahu i luku, a hoopuehu i ka poe hipa o ko'u kihapai! wahi a Iehova.
- <sup>2</sup> Nolaila, penei ka olelo ana mai a Iehova, ke Akua o ka Israela, no na kahu, ka poe hanai i ko'u poe kanaka; Ua hoopuehu oukou i ka'u poe hipa, a ua kipaku ia lakou, aole i hele mai e ike ia lakou; aia hoi, e hoopai no wau maluna o oukou, i ka hewa o ka oukou hana ana, wahi a Iehova.
- <sup>3</sup> A e hoiliili no wau i ke koena o ka'u poe hipa, mai na aina a pau mai, kahi a'u i hookuke aku ai ia lakou, a e hoihoi hou mai au ia lakou iloko o ko lakou mau pa: a e kawowo lakou, a mahuahua aku.
- <sup>4</sup> A e hoonoho wau i kahu maluna o'lakou, he poe hanai aku ia lakou; aole lakou e makau hou, aole e weliweli, aole hoi lakou e hoopai hou ia, wahi a Iehova.
- <sup>5</sup> Aia hoi, e hiki mai ana na la, wahi a Iehova, o hoala no wau no Davida, i Oha pono, i Alii e noho aupuni, a e pomaikai auanei, a e hana no oia i ka hooponopono, a i ka pololei ma ka honua.
- <sup>6</sup> I kona mau la e hooliaia o ka Iuda, a e noho maluhia o ka Israela, a eia hoi kona inoa e kapaina mai ai, O IEHOVA KO KAKOU PONO.
- <sup>7</sup> Nolaila, aia hoi, e hiki mai ana na la, wahi a Iehova, aole lakou e olelo hou mai, Ke ola la

no o Iehova, ka mea nana i lawe mai ka poe mamo a Israela, mai ka aina o Aigupita mai;

- 8** Aka, Ke ola la no o Iehova, ka mea nana i lawe mai, alakai hoi i na hua o ka hale o ka Israela, mai ka aina o ko kukulu akau mai, a mai na aina a pau mai, kahi a'u i kipaku aku ai ia lakou; a e noho no lakou ma ko lakou aina iho.
- 9** Ua nahae ko'u naau iloko o'u no na kaula, haalulu no hoi ko'u mau iwi a pau. Ua like no au me ke kanaka i ona, a like hoi me ke kanaka i lanakilaia e ka waina, no Iehova, a no na huaolelo o kona Hemolele.
- 10** No ka mea, ua piha ka aina i ka poe moekolohe; no ka mea, ke kumakena nei ka aina, no ka hoohiki ino aua: ua maloo hoi na wahi maikai o ka waonahele; ua hewa ko lakou holo ana, aole hoi i pono ko lakou ikaika.
- 11** No ka mea, ua aia no ke kaula, a me ke kahuna, oia, ua loaa no ia'u ko lakou hewa maloko o ko'u hale, wahi a Iehova.
- 12** Nolaila, e like auanei ko lakou aoao ia lakou, me kahi pahee maloko o ka pouli; e kipakuia'ku la no lakou, a e haule iloko olaila; no ka mea, e lawe no wau i ka hewa maluna o lakou, i ka makahiki hoi o ko lakou hoopaiia, wahi a Iehova.
- 13** Ua ike no au i ka lapuwale maloko o na kaula o Samaria, a wanana ae lakou ma o Baala la, a alakai hewa iho la i ko'u poe kanaka, i ka Israela.

- 14 Ua ike no hoi au i ka mea inoino loa iloko o na kaula o Ierusalema; moe kolohe no lakou, a hele ma ka wahahee. Hooikaika no hoi lakou i na lima o ka poe hana hewa, i hoi ole mai kekahi, mai kona hewa mai. Ua like no lakou a pau ia'u me ko Sodoma, a o ka poe hoi e noho ana malaila, ua like no me ko Gomora.
- 15 Nolaila, penei ka olelo ana mai a Iehova o na kaua, no na kaula; Aia hoi, e hanai aku au ia lakou i ka laau awaawa, a e hoohainu aku au ia lakou i ka wai o ke au; no ka mea, mai na kaula o Ierusalema aku i hele aku ai ka aia, a i ka aina a pau.
- 16 Ke olelo mai nei o Iehova o na kaua penei, Mai hoolohe oukou i na olelo a na kaula, ka poe wanana mai ia oukou. Hoolilo no lakou ia oukou i mea lapuwale; hai mai no lakou i ka hihi o ko lakou naau iho, aole mai ka waha o Iehova mai.
- 17 Ke olelo ikaika mai nei lakou i ka poe hoowahawa mai ia'u, Ua olelo mai o Iehova, E loaa ia oukou ka maluhia: a olelo no hoi lakou i kela mea i keia mea i hele mamuli o ka paakiki o kona naau iho, Aohe hewa e hiki mai ana maluna o oukou.
- 18 No ka mea, owai ka mea i ku ma ka ahaolelo o Iehova, a ike aku la, a lohe i kana olelo? Owai ka mea i haliu aku i kana olelo a lohe?
- 19 Aia hoi, he puahiohio no Iehova ka i puka mai me ka huhu, he puahiohio nui loa; e haule ino no ia maluna o ke poo o ka poe hewa.
- 20 Aole e hoi hou aku ka huhu o Iehova, a hooko oia, a hana io i ka manao o kona naau. I

na la mahope, e hoomaopopo loa oukou ia mea.

**21** Aole au i hoouna aku i keia poe kaula, ua holo nae lakou; aole au i olelo ia lakou, aka, ua wanana ae lakou.

**22** Aka, ina i ku lakou maloko o ka'u ahaolelo; ina ua hana aku i ko'u poe kanaka e lohe i ka'u mau olelo, ina ua hoohuli hoi lakou i kela poo, mai ko lakou aoao hewa mai, a mai ka hewa mai hoi o ka lakou hana ana.

**23** He Akua kokoke nei au, wahi a Iehova, aole hoi he Akua ma kahi loihi aku?

**24** E huna anei kekahia ia ia iho ma na wahi malu, i ike ole aku ai au ia ia, wahi a Iehova? Aole anei au i hoopihia i ka lani, a me ka honua? wahi a Iehova.

**25** Ua lohe no wau i na mea a na kaula i olelo ai, ka poe i wanana wahahnee ma ko'u inoa, me ka olelo iho, Ua moeuhane au, ua moeuhane au.

**26** Pehea la ka loihi o ka noho ana o keia iloko o ka naau o na kaula, ka poe wanana wahahnee? Oia, he poe kaula lakou no ka hoopunipuni o ko lakou naau iho;

**27** He poe manao e haawi i ko'u poe kanaka i ka hoopoina i ko'u inoa, no ko lakou mau moeuhane, na mea a kela mea keia mea o lakou i hai ae i kona hoalauna, e like me ko lakou poe makua i hoopoina i ko'u inoa ma o Baala la.

**28** O ke kaula moeuhane, e hai ae oia i ka moeuhane; a o ka mea ia ia ka'u olelo, e hai pololei oia i ka'u olelo. Heaha ke aa i ka palaoa, wahi a Iehova?

- 29 Aole anei i like ka'u olelo me ke ahi? wahi a Iehova; a like hoi me ka hamare, ka mea e nahaha ai ka pohaku?
- 30 Nolaila au e ku e nei i na kaula, wahi a Iehova, na mea aihue i ka'u mau olelo, o kela kanaka keia kanaka i ka kona hoalauna.
- 31 Aia hoi, ke ku e nei au i na kaula, wahi a Iehova, ka poe hana me ko lakou alelo, a olelo mai, Ke i mai nei oia.
- 32 Aia hoi, ke ku e nei au i ka poe wanana iho i na moeuhane wahahee, wahi a Iehova, a hai ae ia mau mea, a alakai hewa i ko'u poe kanaka, i ka lakou mau mea wahahee, a i ka lakou kaena ana: aole nae au i hoouna ia lakou, aole i kauoha aku ia lakou: nolaila, aole lakou e hoopomaikai iki i keia poe kanaka, wahi a Iehova.
- 33 A hiki i ka manawa e ninau mai ai ia oe, o keia poe kanaka, a o ke kaula paha, a o ke kahuna paha, a olelo mai, Heaha ka wanana a Iehova? Alaila, e olelo aku oe ia lakou, O ka wanana hea? E haalele no wau ia oukou, wahi a Iehova.
- 34 A o ke kaula, a o ke kahuna, a o ka lahuikanaka e olelo, Ka wanana a Iehova, na'u no e hoopai aku i kela kanaka, a me ko kona hale.
- 35 Penei oukou e olelo ai, o kela mea keia mea i kona hoalauna, o kela mea keia mea i kona hoahanau; Heaha ka Iehova i pane mai ai? a heaha hoi ka Iehova i olelo mai ai?
- 36 A mai hai hou oukou i ka wanana a Iehova; no ka mea, o ka olelo a kela kanaka keia kanaka, oia kana wanana: no ka mea, ua

hoololi oukou i na olelo a ke Akua ola, o Iehova o na kaua, o ko kakou Akua.

- <sup>37</sup> Penei oe o olelo aku ai i ke kaula, Heaha ka Iehova i pane mai ai ia oe? a heaha hoi ka Iehova i olelo mai ai?
- <sup>38</sup> Aka, no ka oukou olelo ana, Ka wanana a Iehova; nolaila, penei ka olelo ana mai a Iehova; No ka oukou olelo ana mai i keia olelo, Ka wanana a Iehova, a ua hoouna aku au ia oukou, me ka i iho, Mai olelo oukou, Ka wanana a Iehova;
- <sup>39</sup> Nolaila, wau no, e hoopoina loa no wau ia oukou, a e haalele no wau ia oukou, a me ke kulananakauhale a'u i haawi aku ai ia oukou, a me ko oukou poe kupuna, a e lilo auanei oukou mai ko'u alo aku.
- <sup>40</sup> A e haawi no wau ia oukou, i mea hoowahawaha mau loa, a i hilahila pau ole, aole hoi e poinaia.

## 24

- <sup>1</sup> HOIKE mai o Iehova ia'u, aia hoi, elua hinai fiku e kau ana ma ke alo o ka luakini o Iehova, ma-hope iho o ka lawe pio ana o Nebukaneza, o ke alii o Babulona ia Iekonia i ke keiki a Iehoiakima, ke alii o ka Iuda, a me na kaukaualii o ka Iuda, a me na kamana, a me na amara, mai Ierusalema aku, a lawe ia lakou i Babulona.
- <sup>2</sup> Hookahi hinai fiku maikai loa, e like me na fiku oo mua; a o kela hinai, he fiku inoino, aole pono ke aiiia, no ko lakou inoino loa.
- <sup>3</sup> Alaila, olelo mai la o Iehova ia'u. Heaha kau e ike nei, e Ieremia? Iaku la au, He mau fiku; o na

fiku maikai, ua maikai loa, a o na fiku ino,  
 ua inoino loa, aole pono ke aiia, no ko lakou  
 inoino loa.

- 4** Hiki hou mai la ka olelo a Iehova ia'u, i mai la,
- 5** Ke olelo mai nei o Iehova, ke Akua o ka Israela  
 penei; E like me keia mau fiku maikai, pela  
 no wau e hoomaopopo ai i ka poe i lawepi-  
 oia o ka Iuda, ka poe a'u i kipaku aku ai, mai  
 keia wahi aku a i ka aina o ko Kaleddea, i mea  
 e pono ai.
- 6** No ka mea, e kau no ko'u maka maluna o lakou  
 i mea e pono ai, a e lawe hou mai no wau  
 ia lakou i keia aina; a e kukulu no wau ia  
 lakou, aole au e wawahi ia lakou, e kanu no  
 wau ia lakou, aole e uhuki ia lakou.
- 7** A e haawi no wau ia lakou i naau e ike mai ai ia'u,  
 owau no o Iehova; a o lakou auanei ko'u poe  
 kanaka, a owau auanei ko lakou Akua; no  
 ka mea, e hoi mai no lakou ia'u me ko lakou  
 naau a pau.
- 8** A e like me na fiku inoino, pono ole ke aiia no ka  
 inoino loa; He oiaio, wahi a Iehova, pela no  
 wau e haawi aku ai ia Zedekia, i ke alii o ka  
 Iuda, a me kana poe alii, a me ke koena o  
 Ierusalema, ka poe e koe ana ma keia aina, a  
 me ka poe e noho ana ma ka aina o Aigupita;
- 9** A haawi no wau ia lakou e laweia iloko o na  
 aupuni a pau o ka honua nei, i mea hoopai,  
 a i mea hoowahawaha, a i mea henehene, a  
 i mea kuamuamu, a i mea hoopoino, ma na  
 wahi a pau, a'u e kipaku aku ai ia lakou.

**10** A e hoouna aku au i ka pahikaua, a me ka wi, a me ka mai ahulau iwaena o lakou, a hoopauia lakou, mai ka aina a'u i haawi aku ai ia lakou, a i ko lakou poe makua.

## 25

**1** KA olelo i hiki mai io Ieremia la no na kanaka a pau o ka Iuda, i ka makahiki aha o lehoiakima, ke keiki a losia, ke alii o ka Iuda, oia hoi ka makahiki akahi o Nebukaneza, ke alii o Babulona:

**2** Ka mea a Ieremia, ke kaula i olelo ai i na kanaka a pau o ka Iuda, a i ka poe a pau e noho ana ma Ierusalema, i mai la,

**3** Mai ka makahiki umikumamakolu o Iosia, ke keiki a Amona, ke alii o ka Iuda a hiki loa mai i keia la, eia hoi ka makahiki iwakalukumamakolu, ua hiki mai no ka olelo a Iehova ia'u, a ua olelo aku no wau ia oukou, e ala ana i ka wanaao e olelo aku; aka, aole oukou i hoolohe mai.

**4** A ua hoouna mai o Iehova io oukou nei i kana mau kauwa a pau, i na kaula hoi, e ala ana i ka wanaao e hoouna; aka, aole oukou i hoolohe, aole hoi i haliu mai i ko oukou pepeiao e lohe ai.

**5** I mai la lakou, E huli hou kela mea keia mea, mai kona aoao hewa mai, a mai ka hewa mai o ka oukou hana ana, a e noho hoi i ka aina a Iehova i haawi mai ai ia oukou, a i ko oukou poe makua, a hiki a kau, a hiki loa aku.

**6** A mai hele hoi mamuli o na akua e, e malama ia lakou, a e hoomana ia lakou; a mai honaukiuki mai oukou ia'u i na hana a ko

oukou mau lima; alaila, aole au e hana ino ia oukou.

- 7** Aka, aole oukou i hoolohe mai ia'u, wahi a Iehova, i hoonaukiuki mai oukou ia'u i na hana a ko oukou mau lima, i mea e hewa'i oukou.
- 8** Nolaila, ke olelo mai o Iehova o na kaua; No ko oukou hoolohe ole i ka'u mau olelo,
- 9** Aia hoi, e hoouna au, a lawe mai i na ohana kanaka a pau o ke kukulu akau, wahi a Iehova, a me Nebukaneza, ke alii o Babulona, ka'u kauwa, a e lawe mai au ia lakou e ku e i keia aina, a e ku e i kolaila poe kanaka, a e ku e hoi i keia mau lahuikanaka a pau e puni ana, a e luku loa ia lakou, a hoolilo ia lakou i mea e pilihua ai, a i mea e hoowahawaha ai, a i neoneo mau loa.
- 10** A e lawe no wau, mai o lakou aku, i ka leo o ka olioli, a me ka leo o ka hauoli, i ka leo o ke kane mare, a me ka leo o ka wahine mare, i ke kani ana o na pohaku kaapalaoa, a me ka malamalama o ke kukui.
- 11** A e lilo no keia aina a pau i neoneo, a i mea e pilihua'i. A e hookauwa aku ko keia mau aina na ke alii o Babulona, i kanahiku makahiki.
- 12** A hiki i ka manawa i hala'e na makahiki he kanahiku, alaila, e hoopai aku au i ke alii o Babulona, a me ia lahuikanaka, wahi a Iehova, no ko lakou hewa, a i ka aina hoi o ko Kaledea, a e hoolilo no wau ia wahi, i neoneo mau loa.
- 13** A e lawe aku au maluna o ia aina i ka'u mau olelo a pau a'u i hai ku e ia ia, i na mea a pau

hoi i kakauia maloko o ka buke a Ieremia i wanana ai e ku e i na aina a pau.

- 14 No ka mea, e hookauwa aku lakou na na lahuikanaka he nui, a na na'lili kaulana no hoi. A e hoouku no wau ia lakou, e like me ka lakou hana ana, a e like hoi me na hana a ko lakou lima iho.
- 15 No ka mea, ke olelo mai nei o Iehova, ke Akua o ka Israela ia'u penei; E lawe oe i ke kiaha waina o keia ukiuki ma kuu lima, a e hoochaine aku ia i na lahuikanaka a pau a'u e hoouna aku ai ia oe io lakou la.
- 16 A e inu no lakou, a e haalulu no, a e hehena iho, imua o ka pahikaua a'u e hoouna aku ai iwaena o lakou.
- 17 A lawe iho la au i ke kiaha ma ka lima o Iehova, hoochaine aku la i na lahuikanaka a pau a Iehova i hoouna mai ai ia'u ia lakou:
- 18 Ia Ierusalema hoi, a i na kulanakauhale o Iuda, a i kona poe alii, a i kona poe kaukaualii, e haawi hoi ia lakou no ka hooneoneoia, i mea e pilihuia ai, a i mea hoowahawaha, a i mea e poino ai, e like me ia i keia la;
- 19 Ia Parao i ke alii o Aigupita, a i kana poe kauwa, a i kana poe alii, a i kona poe kanaka a pau;
- 20 A i na malihini a pau, a i na a'lii o ka aina o Uza, a i na'lili a pau o na aina o ko Pilisetia, a me Asekelona, a me Aza, a me Ekerona, a me ke koena o Asedoda;
- 21 Ia Edoma, a me Moaba, a me na mamo a Amona;
- 22 I na'lili a pau o Turo, ai na'lili a pau o na aina o Zidona, a i na'lili o na aina ma kela aoao o ke kai;

- 23** Ia Dedana, a me Tema, a me Buza, a me na mea  
a pau ma na mokuna loihi loa aku;
- 24** A i na'lii a pau o Arabia, a i na'lii a pau o na  
malihini e noho ana ma ka waonahele;
- 25** A i na'lii a pau o Zimeri, a i na'lii a pau o Elama,  
a i na'lii a pau o Media;
- 26** A i na'lii a pau o ke kukuluakau, ma kahi loihi  
aku, a ma kahi kokoke mai, kekahī i kekahī,  
a i na aupuni a pau o keia ao, maluna o ka  
honua nei; a e inu ke alii, o Sesaka mahope  
o lakou.
- 27** A e olelo no oe ia lakou, Ke olelo mai nei o Iehova  
o na kaua, ke Akua o ka Israela peneia; E  
inu oukou a ona, a e luai aku, a e hina, aole  
hoi e ala hou, no ka pahikaua a'u e hoouna  
aku ai iwaena o oukou.
- 28** A ina hoole lakou aole lawe i ke kiahā ma kou  
lima e inu ai, alaila, e olelo oe ia lakou, Ke  
olelo mai nei o Iehova o na kaua penei; E  
inu io auanei oukou.
- 29** No ka mea, aia hoi, ke hoomaka nei au e lawe  
mai i ka hewa maluna o ke kulanakauhale  
i kapaia ma ko'u inoa, a e hoopai ole loa ia  
anei oukou? Aole ole ko oukou hoopaiia; no  
ka mea, e hea aku no wau i ka pahikaua, e  
hele ae maluna o ka poe a pau e noho la ma  
ka honua, wahi a Iehova o na kaua.
- 30** A e wanana ku e oe ia lakou i keia mau olelo  
a pau, a e olelo ia lakou, E uwo mai no o  
Iehova, mailuna mai, a e haawi mai oia i  
kona leo, mai kahi e noho ai kona hemolelo  
mai; e uwo nui loa oia maluna o kona wahi  
noho ai; e like me ka poe hahi, pela no oia

e hooho ai e ku e i ka poe e noho la ma ka honua.

**31** E hiki mai no ka uwalaau, mai na kukulu mai o ka honua; no ka mea, he paio no ka Iehova me ko na aina, e hooponopono no oia maluna o na mea io a pau; e haawi no hoi oia i ka poe hewa i ka pahikaua, wahi a Iehova.

**32** Ke olelo mai nei o Iehova o na kaua penei, Aia hoi, e puka no ka hewa, mai kekahi aina, a i kekahi aina; a e hoalaia ka puahiohio, mai na kukulu o ka honua mai.

**33** A i kela la, e palahalaha auanei ka poe i pepehiia e Iehova, mai kekahi kukulu o ka honua, a i kekahi kukulu: aole lakou e kumakenaia, aole hoi e hoiliiliia, aole e kanuia; e lilo lakou i lepo maluna o ka aina.

**34** E aoa oukou, e na kahuhipa, a e uwe aku; a e kapi ia oukou iho i ka lehu, e ka poe malama hipa; no ka mea, ua lawa ko oukou mau la o ka pepehi, a me ka hoopuehu, a e haule no oukou, e like me ke kiahā maikai.

**35** Aohe wahi no na kahuhipa e pee aku ai; aohe wahi hoi e pakele ai ka malama hipa.

**36** He leo hoi no ka uwe ana o na kahuhipa, a me ka aoa ana o ka poe malama hipa, no ka mea, ua anai o Iehova i ko lakou wahi e ai ai.

**37** Ua hoopauia ko lakou wahi e noho ai me ka malu, no ka ukiuki nui o Iehova.

**38** Ua haalele oia i kona wahi huna me he liona la; no ka mea, ua neoneo ko lakou aina, no ka

huhu nui o ka mea hookaumaha, a no kona ukiuki loa.

## 26

- <sup>1</sup> I KA makamua o ke au ia Iehoiakima, ke keiki a Iosia, ke alii o ka Iuda, hiki mai keia olelo, mai Iehova mai, i mai la,
- <sup>2</sup> Ke i mai nei o Iehova penei; E ku oe ma ke kahua o ka hale o Iehova, a e olelo aku i na kulanakauhale a pau o ka Iuda, na mea hele mai e hoomana iloko o ka hale o Iehova, i na olelo a pau a'u e kauoha aku nei ia oe e olelo ia lakou: mai hoemi i kekahi olelo.
- <sup>3</sup> Malia paha e hoolohe lakou, a huli mai kela kanaka keia kanaka, mai kona aoao hewa mai, i mea e mihi ai au i ka hewa a'u i manao ai e hana ia lakou, no ka hewa o ka lakou hana ana.
- <sup>4</sup> A e olelo aku ia lakou, Ke i mai nei o Iehova penei; Ina aole oukou e hoolohe mai ia'u, e hele mamuli o ko'u kanawai a'u i kau ai imua o oukou,
- <sup>5</sup> E hoolohe i na olelo a ka'u poe kauwa, na kaula a'u i hoouna aku ai ia oukou, e ala ana i ka wanaao me ka hoouna aku, aka, aole oukou i hoolohe:
- <sup>6</sup> Alaila, e hoohalike au i keia hale me Silo, a e hoolilo wau i keia kulanakauhale i mea e poino ai ko na aina a pau o ka honua.
- <sup>7</sup> A lohe no na kahuna, a me na kaula a me na kanaka a pau ia Ieremia e olelo ana i keia mau olelo iloko o ka hale o Iehova.

- 8** A hiki i ka manawa i hoopau ai o Ieremia i kana olelo ana i na mea a pau a Iehova i kauoha mai ai ia ia e olelo i na kanaka a pau, alaila, hopu iho la na kahuna, a me na kaula, a me na kanaka a pau ia ia, olelo aku la, E oiaio no e make oe.
- 9** No ke aha la oe i wauana ai ma ka inoa o Iehova, i ka i ana mai, E like auanei keia hale me Silo, a e neoneo keia kulanakauhale, me ka mea ole nana e noho? A akoakoa ku e mai la na kanaka a pau ia Ieremia maloko o ka hale o Iehova,
- 10** A lohe na'lii o ka Iuda i keia mau mea, alaila, hele mai la lakou, mai ka hale o ke alii mai, a i ka hale o Iehova, a noho iho la ma kahi e komo aku ai iloko o ka pukapa hou o ka hale o Iehova.
- 11** Alaila, olelo aku la na kahuna, a me na kaula i na'lii, a i na kanaka a pau, i aku la, Pono no keia kanaka e make; no ka mea, ua wanana ku e mai oia i keia kulanakauhale, me ka oukou i lohe ai i ko oukou mau pepeiao.
- 12** Alaila, olelo mai la o Ieremia i na'lii a pau, a i na kanaka a pau, i mai la, Hoouna mai o Iehova ia'u, e wauana ku e i keia hale, a i keia kulanakauhale, i na olelo a pau a oukou i lohe ai.
- 13** Ano hoi e hoomaikai oukou i ko oukou mau aoao, a me ka oukou hana ana, a e malama hoi i ka leo o Iehova, ko oukou Akua; alaila, e mihi no o Iehova i ka hewa ana i hai ku e mai ia oukou.

- 14** A owau hoi, eia no wau iloko o ko oukou lima; e hana mai oukou ia'u ma ka mea i maikai, a pono hoi i ko oukou mau maka.
- 15** Aka, e hoomaopopo oukou, he oiaio, ina e pepehi mai oukou ia'u, alaila, e hooili no oukou i ke koko hala ole maluna o oukou, a maluna o keia kulanakauhale, a maluna o ka poe e noho ana maloko; no ka mea, he oiaio no, ua hoouna mai o Iehova ia'u io oukou la, e olelo i keia mau olelo a pau maloko o ko oukou mau pepeiao.
- 16** Alaila, olelo mai la na'lii a me na kanaka a pau i na kahuna, a i na kaula; Aole pono keia kanaka e make; no ka mea, ua olelo mai oia ia kakou ma ka inoa o Iehova, o ko kakou Akua.
- 17** Alaila, ku ae la kekahi mau lunakahiko o ka aina, a olelo ae la i ka ahakanaka a pau, i ae la,
- 18** I na la o Hezekia, ke alii o ka Iuda, o Mika, no Moraseta, wanana mai la ia, a olelo mai la i na kanaka a pau o ka Iuda, i mai la, Ke i mai nei o Iehova o na kaua penei; E mahiia no o Ziona me he mahinaai la, a e lilo no o Ierusalema i mau puu, a o ka mauna hoi o ka hale, e like me na wahi kiekie o ka ululaau.
- 19** I pepehi io anei ia ia o Hezekia, ke alii o ka Iuda, a me ka Iuda a pau? Aole anei i makau oia ia Iehova, a nonoi aku ia Iehova, a mihi iho la o Iehova i ka hewa ana i hai ku e mai ai ia lakou? A mai loaa ia kakou pela ka hewa nui no ko kakou poe uhane.

- <sup>20</sup> A he Kanaka e no hoi kekahi i wanana mai ma ka inoa o Iehova, o Uriia, ke keiki a Semaia, no Kiriatarima, nana no i wanana ku e mai i keia kulanakauhale, a i keia aina hoi, e like me na olelo a pau a Ieremia;
- <sup>21</sup> A lohe o Iehoiakima ke alii, a me kona poe kanaka ikaika a pau, a me na'lii a pau i kana mau olelo, imi iho la ke alii e pepehi ia ia. A lohe aku la o Uriia ia mea, makau iho la ia, a mahuka aku la, a hikiaku i Aigupita;
- <sup>22</sup> A o Iehoiakima ke alii, hoouna ae la ia i na kanaka i Aigupita, ia Elenatana, ke keiki a Akebora, a me na kanaka pu me ia, i Aigupita;
- <sup>23</sup> A lawe mai la lakou ia Uriia, mai Aigupita mai, a lawe ia ia io Iehoiakima la, i ke alii; a pepehi ae la oia ia ia i ka pahikaua, a hooleiaku la i kona kupapau iloko o na ilina o na kanaka.
- <sup>24</sup> Aka, me Ieremia no ka lima o Ahikama, ke keiki a Sapana, i ole lakou e haawi ia ia iloko o na lima o kanaka e pepehi ia ia.

## 27

- <sup>1</sup> I KA makamua o ke au ia Zede kia, ke keiki a Iosia, ke alii o ka Iuda, hiki mai la ka olelo io Ieremia la, mai o Iehova mai, i mai la,
- <sup>2</sup> Ke i mai nei o Iehova ia'u penei; E hana oe nou i mau kupee, a i mau auamo, a e kau ia mau mea maluna o kou a-i.
- <sup>3</sup> A e hooukaaku ia mau mea i ke alii o Edoma, a i ke alii o Moaba, a i ke alii o ka Amona, a i ke alii o Turo, a i ke alii o Zidona, ma ka lima

o na elele i hele mai i Ierusalema io Zedekia la, ke alii o ka Iuda:

- 4** A e kauoha aku ia lakou e olelo i ko lakou mau haku, Penei ka olelo ana mai a Iehova o na kaua, ke Akua o ka Israela; E olelo oukou i ko oukou poe haku penei;
- 5** Na'u no i hana ka honua, ke kanaka, a me na holoholona maluna o ka aina, i ko'u mana nui, a i ko'u lima kakauka, a ua haawi hoi ia i ka mea a'u i manao makemake ai.
- 6** Ano hoi, ua haawi aku au i keia mau aina a pau iloko o ka lima o Nebukaneza, ke alii o Babulona, i kuu kauwa; a ua haawi hoi au ia ia i na holoholona o ke kula e hookauwa nana.
- 7** A e hookauwa ko na aina a pau nana, a na kana keiki, a na ke keiki a kana keiki, a hiki wale mai ka manawa o na aina: alaila, e hookauwa aku oia na ko na aina he nui, a na na'lii kaulana.
- 8** A o ka aina auanei, a me ke aupuni e hookauwa ole na ua Nebukaneza la, na ke alii o Babulona, a haawi ole hoi i ko lakou a-i malalo o ka auamo o ke alii o Babulona, e hoopai no wau i ko ia aina, wahi a Iehova, i ka pahikaua, a i ka wi, a i ka mai ahulau, a hoopau wau ia lakou i kona lima.
- 9** Nolaila, mai hoolohe oukou i na kaula o oukou a me ko oukou poe wanana wahapee, a me ko oukou poe moeuhane, a me ko oukou poe awihi hoowalewale, a me ko oukou poe kilokilo, ka poe olelo mai ia oukou, me ka i ana iho, Aole oukou e hookauwa aku na ke alii o Babulona;

- 10** No ka mea, wanana mai lakou i ka wahahée ia oukou, i mea e lawe aku ai ia oukou mai kahi loihi aku o ko oukou aina; a i kipaku aku ai au ia oukou, i make hoi oukou.
- 11** Aka, o na aina i haawi i ko lakou a-i malalo iho o ka auamo o ke alii o Babulona, a hookauwa aku nana, o lakou no ka'u e hookoe aku maloko o ko lakou aina iho, wahi a Iehova; a e mahiai no lakou, a e noho ma ka aina.
- 12** Olelo no hoi au ia Zedekia, i ke alii o ka Iuda e like me keia mau olelo a pau, i aku la, E hookomo oukou i ko oukou mau a-i, malalo iho o ka auamo o ke alii o Babulona, a e hookauwa aku nana, a na kona poe kanaka, i ola.
- 13** No ke aha la oe e make ai, o oe, a me kou poe kanaka, i ka pahikaua, a i ka wi, a i ka mai ahulau, e like me ka Iehova i olelo ku e ai i ko ka aina hookauwa ole na ke alii o Babulona?
- 14** Nolaila, mai hoolohe i na olelo a na kaula, ka poe olelo ia oukou, i ka i ana iho, Aole oukou e hookauwa na ke alii o Babulona: no ka mea, wanana mai lakou i ka wahahée ia oukou.
- 15** No ka mea, aole na'u lakou i hoouna aku, wahi a Iehova, aka, ke wanana mai nei lakou i ka wahahée ma ko'u inoa; i mea e kipaku aku ai au ia oukou, i make hoi oukou, o oukou, a me na kaula i wanana mai ia oukou.
- 16** A olelo aku no hoi au i na kahuna, a i keia poe kanaka a pau, i aku la, Ke i mai nei o Iehova penei; Mai hoolohe i na olelo a ko oukou poe kaula, ka poe wanana mai ia oukou, i ka i

ana iho, Aia hoi, e lawe hou koke ia mai na kiahā o ka hale o Iehova mai Babulona mai; no ka mea, ko wanana mai nei lakou i ka wahāhee ia oukou.

**17** Mai hoolohe ia lakou: e hookauwa aku na ke alii o Babulona, a e ola. No keaha la e anaiia'i keia kulanakauhale?

**18** Aka, ina he poe kaula lakou, a ina ia lakou ka olelo a Iehova, e nonoi uwao aku lakou ia Iehova o na kaua, i hele ole aku ai i Babulona na kiahā i waihoia iloko o ka hale o Iehova, a iloko o ka hale o ke alii o ka Iuda, a ma Ierusalema hoi.

**19** No ka mea, penei ka olelo ana mai a Iehova o na kaua, no na kia, a no ke kai, a no na kumu kiahā, a no ke koena o na kiahā, i koe mai maloko o keia kulanakauhale,

**20** Na mea a Nebukaneza i lawe ole ai i ka wa ana i lawepio ai ia Iekonia, i ke keiki a Iehoiakima, i ke alii o ka Iuda, mai Ierusalema aku a Babulona, e me na haku a pau o ka Iuda, a me Ierusalema;

**21** Oia, penei ka olelo ana mai a Iehova o na kaua ke Akua o ka Israela, no na kiahā i koe ma ka hale o Iehova, a ma ka hale o ke alii o ka Iuda, a ma Ierusalema;

**22** E laweia no lakou i Babulona, a malaila no lakou e waiho ai, a hiki i ka la e hele mai ai au e ike ia lakou, wahi a Iehova; alaila, e lawe mai no au ia lakou iluna, a e hoihoi mai ia lakou i keia wahi.

## 28

**1** I A makahiki no, i ka makamua o ke au ia

Zedekia, ke alii o ka Iuda, i ka makahiki aha, i ka malama elima, olelo mai la o Hanania, ke keiki a Azura, ke kaula, i noho ma Gibeona, i mai la ia'u maloko o ka hale o Iehova, imua o ke alo o na kahuna, a me na kauaka a pau,

- 2** Penei ka olelo ana mai a Iehova o na kaua, ke Akua o ka Israela, i mai la, Ua uhai au i ka auamo o ke alii o Babulona.
- 3** Maloko o keia mau makahiki alua, e hoihoi mai no wau iloko o keia wahi, i na kiahā a pau o ka hale o Iehova, na mea a Nebukaneza, ke alii o Babulona i lawe, mai keia wahi aku, a lawe hoi i Babulona.
- 4** A e lawe hou mai no wau i keia wahi ia Iekonia, i ke keiki a Iehoiakima, ke alii o ka Iuda, a me ka poe pio a pau o ka Iuda, ka poe i hele maloko o Babulona, wahi a Iehova; no ka mea, e uhai au i ka auamo o ke alii o Babulona.
- 5** Alaila, olelo mai la o Ieremia, ke kaula, ia Hanania ke kaula, imua i ke alo o na kahuna, a imua i ke alo o na kanaka a pau e ku ana maloko o ka hale o Iehova,
- 6** O Ieremia, ke kaula ka i olelo mai la, Amene; ina e hana mai o Iehova pela; ina e hooko mai o Iehova i kau mau olelo au i wanana'i, e lawe hou mai, mai Babulona mai, a i keia wahi, i na kiahā o ka hale o Iehova, a me na mea a pau i lawe pio ia'ku.
- 7** Aka hoi, e hoolohe oe ano i keia olelo a'u e olelo ai iloko o kou mau pepeiao, a iloko o na pepeiao o na kanaka a pau;

- 8 A o na kaula mamua o'u, a mamua ou no hoi, wanana ku e lakou, i ke kaua, a i ka hewa, a i ka mai ahulau ma na aina he nui, a ma na aupuni nui no hoi.
- 9 O ke kaula i wanana i ka maluhia, i ka wa e ko ai ka olelo a ke kaula, alaila, e ikeia ua kaula, na Iehova io no i hoouna mai ia ia.
- 10 Alaila, lawe ae o Hanania ke kaula i ka auamo ma ka a-i o Ieremia, a uhai iho la ia.
- 11 A olelo mai la o Hanania imua i ke alo o na kanaka a pau, i mai la, Ke olelo mai nei o Iehova penei; Iwaena o keia mau makahiki elua, pela no wau e uhai ai i ka auamo o Nebukaneza, ke alii o Babulona, mai ka a-i o na kanaka a pau. A hele aku la o Ieremia, ke kaula i kona wahi i hele ai.
- 12 Alaila, hiki mai la ka olelo a Iehova io Ieremia la, mahope iho o ka uhai ana o Hanania i ka auamo, mai ka a-i o ke kaula, o Ieremia, i mai la,
- 13 O hele, e hai aku ia Hanania, e i aku, Ke olelo mai nei o Iehova penei; Ua uhai oe i na auamo laau, aka, e hana no oe i na auamo hao ma ko lakou hakahaka.
- 14 No ka mea, penei ka olelo ana mai a Iehova o na kaua, ke Akua o ka Israela; Ua kau no wau i ka auamo hao ma ka a-i o keia mau aina a pau, i hookauwa lakou na Nebukaneza, ke alii o Babulona, a e malama no hoi ia ia; a ua haawi no hoi au i na holoholona o ke kula nana.

- <sup>15</sup> Alaila, olelo mai la ke kaula, o Ieremia, ia Hanania, ke kaula, E hoolohe mai oe, e Hanania; Aole i hoouna mai o Iehova ia oe, aka, ke hoohilinai nei oe i keia poe kanaka i ka wahahee.
- <sup>16</sup> Nolaila, ke olelo mai nei o Iehova penei; Aia hoi, e kipaku aku no wau ia oe, mai ka honua aku; i keia makahiki e make no oe, no ka mea, ua ao mai no oe i ke kipi aku ia Iehova.
- <sup>17</sup> A make iho la o Hanania, ke kaula, ia makahiki no, i ka hiku o ka malama.

## 29

- <sup>1</sup> EIA na olelo o ka palapala a Ieremia, a ke kaula i hoouna aku ai, mai Ierusalema aku i ke koena o ka poe lunakahiko i lawepioia'ku la, a i na kahuna, a i na kaula, a i na kanaka a pau a Nebukaneza i lawepio ai, mai Ierusalema aku a Babulona;
- <sup>2</sup> (Mahope iho o ka hele ana o Iekonia, ke alii, a me ke alii wahine, a me na luna a me na kaukaualii o ka Iuda a me Ierusalema, a me na kamana, a me na amara, a puka aku la mawaho o Ierusalema;)
- <sup>3</sup> Ma ka lima o Elasa, ke keiki a Saponia, a me Gemaria, ke keiki a Hilekia, (na mea a Zedekia, ke alii o ka Iuda i hoouna aku ai i Babulona, io Nebukaneza la, i ke alii o Babulona,) i iho la,
- <sup>4</sup> Penei ka olelo ana mai a Iehova o na kaua, ke Akua o ka Israela, i ka poe a pau i lawepioia, na mea a'u i lawepio ai, mai Ierusalema aku a Babulona;

- <sup>5</sup> E kukulu hale oukou, a e noho iho; e kanu i na mahinaai, a e ai i kolaila ai:
- <sup>6</sup> E mare i na wahine, a e hoohanau i na keikikane, a i na kaikamahine; a e lawe i na wahine na ka oukou poe keikikane, a e haawi aku hoi i ka oukou mau kaikamahine e mare i na kane, i hanau mai lakou i na keikikane, a i na kaikamahine; i kawowo oukou malaila, aole hoi e emi iho.
- <sup>7</sup> A e imi oukou i ka mea e malu ai ke kulanakauhale, kahi a'u i lawepio ai ia oukou, a e pule aku oukou ia Iehova nona; no ka mea, ma kona malu oukou e malu ai.
- <sup>8</sup> No ka mea, penei ka olelo ana mai a Iehova o na kaua, ke Akua o ka Israela; Mai puni oukou i ko oukou mau kaula, a me ko oukou mau kilokilo, na mea iwaenakonu o oukou; mai hoolohe hoi oukou i ko oukou moeuhane a oukou e hoomoe ai.
- <sup>9</sup> No ka mea, ke wanana wahahee nei lakou ia oukou ma ko'u inoa. Aole au i hoouna ia lakou, wahi a Iehova.
- <sup>10</sup> No ka mea, ke olelo mai nei o Iehova penei, Mahope o ka pau ana o na makahiki he kanahiku ma Babulona, alaila, e ike aku no au ia oukou, a e hooko i ka'u olelo maikai ia oukou, i ka hoihoi ana mai ia oukou i keia wahi.
- <sup>11</sup> No ka mea, ua ike no wau i na manao a'u e manao nei ia oukou, wahi a Iehova, he mau manao no ka hoomalu, aole no ke ahewa, e haawi ia oukou i hope maikai, a me ka hoolana.

- <sup>12</sup> Alaila oukou e hea mai ai ia'u, a e hele hoi oukou,  
a e pule mai ia'u, a e hoolohe no au ia oukou.
- <sup>13</sup> A e imi mai no oukou ia'u a loaa, i ka wa e imi  
mai ai oukou ia'u me ko oukou naau a pau.
- <sup>14</sup> A e loaa no wau ia oukou, wahi a Iehova, a  
e hoihoi aku au i ko oukou lawepioia; a e  
hoiliili hoi au ia oukou mai na aina a pau  
mai, a mai na wahi a pau mai, hahi a'u i  
kipaku aku ai ia oukou, wahi a Iehova; a e  
lawe hou no wau ia oukou i kahi malaila  
aku no wau i lawepio aku ai ia oukou.
- <sup>15</sup> No ka mea, ua olelo oukou, Na Iehova no i hoala  
mai i mau kaula no kakou ma Babulona.
- <sup>16</sup> No ka mea, ke olelo mai nei o Iehova no ke alii  
e noho ana ma ka noho alii o Davida, a no  
na kanaka a pau e noho la iloko o keia ku-  
lanakauhale, a no ko oukou poe hoahanau  
i hele pu ole me oukou iloko o ke pio;
- <sup>17</sup> Ke olelo mai nei o Iehova o na kaua penei; Aia  
hoi, e hoouna au i ka pahikaua maluna o  
lakou, a me ka wi, a me ka mai ahulau, a  
e hoolilo wau ia lakou e like me na fiku  
inoino, pono ole ke aiiia, no ko lakou inoino  
loa.
- <sup>18</sup> A e hahai no wau ia lakou i ka pahikaua, a me  
ka wi, a me ka mai ahulau, a e haawi no  
wau ia lakou a pau e laweia a iloko o na  
aupuni a pau o ka honua, i mea e poino ai,  
a i mea pilihua, a i mea hoowahawaha, a  
i mea henehene, iwaeua o na aina a pau,  
kahia'u i kipaku aku ai ia lakou:
- <sup>19</sup> No ka mea, aole lakou i hoolohe mai i ka'u  
mau olelo, wahi a Iehova, na olelo a'u i

hoouna aku ai ia lakou ma ka'u mau kauwa,  
ma na kaula hoi, e ala ana i ka wanaao  
e hoouna, aka, aole oukou i hoolohe mai,  
wahi a Iehova.

**20** E hoolohe hoi oukou i ka olelo a Iehova, e oukou  
a pau o na mea pio, na mea a'u i hoouna aku  
ai, mai Ierusalema a Babulona:

**21** Penei ka olelo ana mai a Iehova o na kaua, ke  
Akua o ka Israela, no Ahaba, ke koiki a  
Kolaia, a no Zedekia, ke keiki a Maaseia, na  
mea i wanana mai i ka wahahnee ia oukou  
ma ko'u inoa; Aia hoi, e haawi no wau ia  
laua iloko o ka lima o Nebukaneza, ke alii  
o Babulona; a e pepehi no oia ia laua imua  
o ko oukou mau maka:

**22** A ma o laua la e laweia'i ka olelo hoino e ka poe  
pio a pau o ka Iuda, na mea ma Babulona,  
me ka olelo iho, Na Iehova e hoohalike ia oe  
me Zedekia, a me Ahaba, na mea a ke alii o  
Babulona i ohinu ai ma ke ahi;

**23** No ka mea, ua hana laua i ka mea lapuwale  
maloko o ka Israela, a ua moe kolohe me  
na wahine a ko lakou hoalauna, a ua olelo i  
na olelo wahahnee ma ko'u inoa, na mea a'u  
i kauoha ole ai ia lakou; ua ike no wau, a he  
hoike no hoi, wahi a Iehova.

**24** E olelo aku no hoi oe ia Semaia, i ka mea  
moeuhane, e i aku,

**25** Ke olelo mai nei o Iehova o ua kaua, ke Akua o  
ka Israela penei, me ka i ana mai, No ko  
hoouka ana i na palapala ma kou inoa i na  
kanaka a pau ma Ierusalema, a ia Zepania,

ke keiki a Maaseia, ke kahuna, a i na kahuna  
a pau, i ka i ana ae,

<sup>26</sup> Ua hoolilo o Iehova ia oe i kahuna, ma ka haka-haka o Iehoiada, ke kahuna, i mea e noho luna'i oukou maloko o ka hale o Iehova, no kela kanaka keia kanaka hewa-hewa, a hoolilo ia ia iho i kaula, i mea e hahao aku ai oe ia ia iloko o ka halepaahao, a iloko o na laau kupee:

<sup>27</sup> A ano la, no keaha la oe i papa ole aku ai ia Ieremia no Anetota, ka mea hoolilo ia ia iho i kaula no oukou?

<sup>28</sup> No ka mea, nolaila ia i hoouna mai ai io makou ma Babulona nei, i ka i ana mai, Ua loihi keia noho ana; e kukulu hale oukou, a e noho iho; e kanu i ua mahinaai, a e ai i kolaila ai.

<sup>29</sup> A heluhelu aku la o Zepania, ke kahuna i keia palapala ma na pepeiao o Ieremia, ke kaula.

<sup>30</sup> Alaila, hiki mai la ka olelo a Iehova io Ieremia la, i mai la,

<sup>31</sup> E hoouna aku, a i ka poe a pau e noho pio ana, e i aku, Penei ka olelo ana mai a Iehova no Semaia, ka mea moeuhane; No ko Semaia wanana ana ia oukou, a hoouna ole aku au ia ia, a hoohilinai oia ia oukou i ka wahahhee;

<sup>32</sup> Nolaila, ke olelo mai nei o Iehova penei, Aia hoi, e hoopai no wau ia Semaia, ka mea moeuhane, a me kana hua; aole e loaa ia ia ke kanaka e noho mawaena o keia poe kanaka; aole hoi oia e ike i ka maikai a'u e hana'i no ko'u poe kanaka, wahi a Iehova;

no ka mea, ua ao aku oia i ke kipi ana ia Iehova.

## 30

- <sup>1</sup> KA olelo i hiki mai io Ieremia la, mai o Iehova mai, i mai la,
- <sup>2</sup> Ke olelo mai nei o Iehova, ke Akua o ka Israela penei, i mai, E kakau oe i na olelo a pau a'u i olelo ai ia oe iloko o ka buke.
- <sup>3</sup> No ka mea, aia hoi, e hiki mai ana na la, wahi a Iehova, e hoihoi no wau i ke pio ana o ko'u poe kanaka, o ka Israela, a me ka Iuda, wahi a Iehova; a e hoihoi aku wau ia lakou i ka aina a'u i haawi aku ai i ko lakou poe makua, a e noho lakou ia aina.
- <sup>4</sup> Eia no na olelo a Iehova i olelo ai no ka Israela, a no ka Iuda.
- <sup>5</sup> No ka mea, ke olelo mai nei o Iehova penei; Ua lohe no makou i ka leo o ka pihoihoi, a me ka makau, aole o ka maluhia.
- <sup>6</sup> E ninau hoi oukou, i ike oukou, ina paha e hanau ai ke kane i keiki No ke aha la wau e ike nei i kela kanaka i keia kanaka, e kau ana kona mau lima ma kona puhaka, e like me ka wahine e haakohi ana, a ua nananakea hoi na maka a pau?
- <sup>7</sup> Auwe! no ka mea, he la nui ia, aohe mea e like mea ia, o ka manawa no ia o ka popilikia o ka Iakoba; aka, e hoolaia no oia, mailoko mai o ia.
- <sup>8</sup> No ka mea, a hiki i kela la, wahi a Iehova o na kaua, e uhai no wau i kona auamo, mai kou a-i aku, a e moku hoi ia'u kou mau mea i

paa ai, aole hoi ia e hookauwa hou na na malihini:

<sup>9</sup> Aka, e hookauwa no lakou na Iehova, ko lakou Akua, a na Davida ko lakou alii, ka mea a'u e hoala'i no lakou.

<sup>10</sup> Nolaila, mai makau oe, e kuu kauwa, e Iakoba, wahi a Iehova, mai weliweli hoi, e ka Iseraela; no ka mea, aia hoi, e hoola no wau ia oe, mai kahi loihi aku, a i kau hua hoi, mai ka aina o ko lakou pio ana; a e hoi mai no o Iakoba, a e hoomaha no, a e maluhia, aohe mea e hoomakau ia ia.

<sup>11</sup> No ka mea, owau pu no me oe, wahi a Iehova, e hoola ia oe. A ina e hooki loa paha wau i ko na aina a pau, kahi a'u i hoopuehu aku ia oukou, aole wau e hooki loa ia oe; aka, e hoopai no wau ia oe ma ka pono, aole wau e kuu wale aku ia oe.

<sup>12</sup> No ka mea, ke olelo mai nei o Iehova penei, He mea ola ole kou palapu, ua nui loa hoi kou eha.

<sup>13</sup> Aohe mea hooponopono i kou hihia, e wahi ana, aole ou laau e ola'i.

<sup>14</sup> Ua poina kou mau mea aloha a pau ia oe, aole lakou imi ia oe; no ka mea, ua hooeha aku au ia oe i ka eha o ka enemi, me ka paipai ana hoi o ka mea lokoino, no ka nui loa o kou hewa; ua mahuahua no kou hala.

<sup>15</sup> No keaha la oe i kahea aku ai no kou palapu? He mea ola ole kou eha, no ka mai loa o kou hewa; i ka mahuahua ana o kou mau hala, ua hana no wau i keia mau mea ia oe.

- 16 Nolaila, o ka poe a pau i hoopau ia oe, e hoopauia lakou; a e hele no kela mea, keia mea o kou poe enemi a iloko o ke pio ana; a o ka poe i lawe pio i kau, e lilo lakou i waiwai pio, a o ka poe i hao i kau, e haawi no wau ia lakou i ka haoia.
- 17 No ka mea, e hoihoi aku au i ke ola ia oe, a e hoola no wau ia oe i kou mau eha, wahia Iehova: no ka mea, kapa aku lakou ia oe, he Kuewa, o Ziona hoi keia, ka mea imi ole ia e kekahia.
- 18 Ke olelo mai nei o Iehova penei; Aia hoi, e hoihoi no wau i ke pio ana o na halelewa o Iakoba, a e lokomaikai aku au i kona mau wahi e noho ai; a e hana hou ia ke kulanakauhale maluna o kona puu iho, a e koe no ka halealii ma kona pono.
- 19 A mailoko aku o ia e puka aku ai ka hoomaikai, a me ka leo o ka poe olioli; a e hoomahuahua wau ia lakou, aole lakou e lilo i uuku, a e hoonani wau ia lakou, aole lakou e liilii ana.
- 20 A e like auanei ka lakou poe keiki me ka wa mamua, a e hookupaaia ko lakou anaina imua o'u, a e hoopai no wau i ka poe a pau e hookaumaha ia lakou.
- 21 A no lakou iho auanei ko lakou poe luna, a e laha aku no ko lakou kiaaina mailoko aku o lakou; a e lawe mai no wau ia ia a kokoke, a e hookokoke mai no oia ia'u; no ka mea, owai keia i hooikaika i kona naau e hookokoke mai ia'u? wahia Iehova.
- 22 A o oukou auanei ko'u poe kanaka, a owau auanei ko oukou Akua.

- <sup>23</sup> Aia hoi, ke puka aku nei ka puahiohio o Iehova  
me ka huhu, he puahiohio e hoopau ana;  
me ka eha no ia e kau ai maluna o ke poo  
o ka poe hewa.
- <sup>24</sup> Aole e hoi hou ka huhu nui o Iehova, a hana oia,  
a hooko oia i ka makemake o kona naau. I  
na la mahope, e noonoo no oukou ia.

## 31

- <sup>1</sup> I A manawa, wahi a Iehova, owau auanei ke  
Akua o na ohana a pau o ka Israela, a o  
lakou auanei ko'u poe kanaka.
- <sup>2</sup> Ke i mai nei o Iehova penei, O na kanaka i koe o  
ka pahikaua, loaa no ia lakou ka lokomaikai  
ma ka waonahele, o ka Israela hoi, ia'u i  
hele ai e hoomaha ia lakou.
- <sup>3</sup> I ka wa kahiko, ike a o Iehova ia'u, i mai la, Oiaio,  
ua mau loa ko'u aloha aku ia oe; nolaila, ua  
hooliohi aku au i ka lokomaikai nou.
- <sup>4</sup> E kukulu hou ana no wau ia oe, a e kukuluia no  
oe, e ke kaikamahine puupaa o ka Israela.  
E kahiko hou ia no oe i kou mau pahu kani,  
e hele aku no i ka haa ana o ka poe olioli.
- <sup>5</sup> E kanu hou ana no oe i na kumuwaina ma na  
mauna o Samaria; e kanu no ka poe kanu,  
a e ai wale hoi.
- <sup>6</sup> No ka mea, e hiki mai auanei ka la e hea aku ai ka  
poe kiai maluna o ka mauna o Eperaima, E  
ala mai oukou, a e pii aku kakou i Ziona, io  
Iehova la, i ko kakou Akua.
- <sup>7</sup> No ka mea, ke olelo mai nei o Iehova penei; E  
mele olioli no Iehova, a e hauoli hoi ma ke  
poo o na aina; e kala aku, a e halelu, a e olelo

ihō, E Iehova, e hoola oe i kou poe kanaka i  
ke koena o ka Israela.

- <sup>8</sup> Aia hoi, e lawe no wau ia lakou, mai ka aina o  
ke kukulu akau mai, a e hoiliili hoi ia lakou,  
mai na mokuna mai o ka honua, me lakou  
pu no, ka poe makapo, a me ka poe oopa, a  
me ka wahine hapai, a me ka wahine hanau  
keiki ana; he poe nui ka i hoi pu mai.
- <sup>9</sup> E hele mai no lakou me ka uwe, ia lakou e pule  
ai, e alakai no wau ia lakou; e hoohele no  
wau ia lakou ma na kahawai, ma ke ala  
pololei; aole lakou e kulanalana malaila, no  
ka mea, he Makua no wau no ka Israela, a  
o Eperaima ka'u hiapo.
- <sup>10</sup> E hoolohe oukou i ka olelo a Iehova, e ko na  
aina, a e kala aku hoi ma na aina loihi  
e aku, a e olelo, O ka mea i hoopuehu i  
ka Israela, nana no lakou e hoiliili, a e  
malama ia lakou, e like me ke kahuhipa i  
kona poe hipa.
- <sup>11</sup> No ka mea, ua hoolapanai o Iehova ia Iakoba  
me ka uku hoopakele ia ia, mailoko mai o  
ka lima i oi aku ka ikaika i kona.
- <sup>12</sup> A e hele mai no lakou a e oli ma kahi kiekie  
o Ziona, a holo pu no lakou i ka maikai o  
Iehova, no ka huapalaoa, a no ka waina, a  
no ka aila, a no na keiki o na hipa, a me na  
bipi; a e like auanei ko lakou uhane me ka  
mahinaai i mau; aole loa lakou e kaumaha  
hou aku.
- <sup>13</sup> Alaila, e olioli no ka wahine puupaa ma ka  
haa ana, o na kanaka opio opio a me na el-  
emakule pu; no ka mea, e hoololi au i ko

lakou kaumaha ana i olioli, a e hoomaha au ia lakou, a e hoohauoli ia lakou mailoko mai o ko lakou kaumaha.

**14** A hoomaona aku au i ka uhane o na kahuna i ka momona, a e maona auanei ko'u poe kanaka i ko'u maikai, wahi a Iehova.

**15** Ke i mai nei o Iehova penei; Ua loheia ka leo ma Rama, he pihe, a me ka uwe nui ana; e uwe ana o Rahela no kana mau keiki, a hoole oia, aole e na no kana mau keiki, no ka mea, aole ae nei lakou.

**16** Ke i mai nei o Iehova penei; E uumi oe i kou leo i ka uwe ana, a me kou mau maka i ua waimaka; no ka mea, e ukuia no kau hana. wahi a Iehova; a e hele hou mai no lakou, mai ka aina mai o ka enemi.

**17** He lana no ka manao i kou hope, wahi a Iehova, i hele hou mai no na keiki i ko lakou mokuna iho.

**18** Oiaio no ua lohe au ia Eperaima e olo pihe ana, Ua paipai mai oe ia'u, a ua paipaiia mai au, e like me ka bipi maa ole. E hoohuli oe ia'u, a e hoohuliiia no wau, no ka mea, o oe no o Iehova, ko'u Akua.

**19** No ka mea, mahope o ko'u hoohuliiia, mihi no wau; a mahope o ko'u aoia mai, hahau no wau i ko'u uha. Hilahila no wau, oia, hoopalaimaka no hoi, no ka mea, kaikai no wau i ka hoowahawaha o ko'u wa opio.

**20** O Eperaima anei ka'u keiki aloha? He keiki anei ia e olioli ai? No ka mea, mai ka wa mai o kau olelo ku e ana ia ia, he oiaio, ke hoomanao mau nei au ia ia: nolaila, e

haehae nei ko'u opu nona; he oiaio no e lokomaikai aku no wau ia ia, wahi a Iehova.

- <sup>21</sup> E kukulu oe i ahu, a hana hoi i puu kiekie nou; e kau oe i kou naau ma ke kuamoo, ma ke ala au i hele ai. E huli hou oe, e ke kaikamahine puupaa o ka Isaela, e huli hou oe i keia mau kulanakauhale ou.
- <sup>22</sup> Pehea la ka loihi o kou aea ana aku, e ke kaikamahine hoi hope? No ka mea, ua hana o Iehova i ka mea hou ma ka honua, na ka wahine no e hoomalu i ke kane.
- <sup>23</sup> Penei ka olelo ana mai a Iehova o na kaua, ke Akua o ka Isaela; E olelo hou no lakou i keia mau olelo ma ka aina o ka Iuda, a ma kolaila mau kulanakauhale, i ka wa a'u e hoihoi ai i ko lakou pio ana; Na Iehova e hoopomaikai ia oe, i kahi e noho ai o ka hopono, ka mauna hoi o ka hemolele.
- <sup>24</sup> A e noho pu no maloko olaila, ma ka Iuda hoi, a maloko o kolaila mau kulanakauhale a pau ka poe mahiai, a me ka poe malama hipa.
- <sup>25</sup> No ka mea, ua hooana aku au i ka uhane i makewai, a ua hoomaona wau i na uhane a pau i niuniu.
- <sup>26</sup> Alaila, ala iho la au, a nana ae la, a ua oluolu ko'u hiame ana ia'u.
- <sup>27</sup> Aia hoi, e hiki mai ana na la, wahi a Iehova, e lulu iho ai au i ka ohana a Iuda, i ka hua a ke kanaka a me ka hua a ka holoholona.
- <sup>28</sup> A e like no me ka'u i kiai iho ai maluna o lakou, e uhuki ae, a e uhai iho, a e hoohiolo, a e

luku, a e hoopilikia; pela no hoi au e kiai ai maluna iho, e kukulu, a e kanu, wahi a Iehova.

**29** Ia mau la la, aole lakou e olelo hou ae, Ua ai na makuakane i ka huawaina awahia, a ua oi na niho o na keiki.

**30** Aka, e make auanei kela mea keia mea no kona hewa iho: o kela kanaka keia kanaka e ai ana i ka huawaina awahia, o kona mau niho no ke oi.

**31** Aia hoi, e hiki mai ana na la, wahi a Iehova, e hana aku ai au i berita hou me ka ohana a Israela, a me ka ohana a Iuda:

**32** Aole e like ana me ka berita a'u i hana aku ai me ko lakou poe makaukane, i ka la a'u i lalau aku ai ia lakou ma ka lima, e lawe ia lakou mai ka aina o Aigupita mai; o ua berita la a'u ka lakou i uhai ai, ia'u i noho ai he Kane na lakou, wahi a Iehova:

**33** Aka, o keia ka berita a'u e hana'i me ka ohana a Israela; Mahope iho o ia mau la, wahi a Iehova, e kau no wau i ko'u kanawai maloko o lakou, a e kakau iho ma ko lakou naau; a owau auanei ko lakou Akua, a o lakou hoi ko'u poe kanaka.

**34** Aole lakou e ao hou aku o kela mea keia mea i kona hoalauna, a o kela mea keia mea i kona hoahanau, e olelo ana, E ike ia Iehova; no ka mea, e ike auanei lakou a pau ia'u, mai ka mea liili loa o lakou a hiki i ko lakou mea nui loa, wahi a Iehova; no ka mea, e kala aku auanei au i ko lakou hala, aole hoi au e hoomanao hou aku i ko lakou hewa.

- <sup>35</sup> Penei ka olelo a Iehova, a ka mea haawi mai i ka la i lama no ke ao, a me na kanawai no ka mahina a me na hoku ma ka po, o ka mea hoaleale hoi i ke kai a halulu kona mau ale; o Iehova Sabaota kona inoa.
- <sup>36</sup> Ina e neenee aku keia mau kanawai mai ko'u alo aku, wahi a Iehova, alaila e pau auanei na mamo a Israela, aole ia he lahuikanaka imua o'u, a mau loa aku.
- <sup>37</sup> Ke olelo mai nei o Iehova penei; Ina e hiki ke anaia ka lani iluna, a e huliia hoi na kumu o ka honua ilalo, alaila, e haalele no au i na mamo a pau o ka Israela, no na mea a pau a lakou i hana'i, wahi a Iehova.
- <sup>38</sup> Aia hoi, e hiki mai ana na la, wahi a Iehova, e kukuluia'i ke kulanakauhale no Iehova, mai ka halekiai o Hananeela a hiki i ka pukapa o ke kihi.
- <sup>39</sup> A e hele aku ke kaula-anā ma o aku maluna o ka puu Gareba, a e poai mai i Goata.
- <sup>40</sup> A o ke awawa a pau o na kupapau, a o ka lehuahi, a o na kula a pau a hiki i kahawai o Kiderona, a hiki i ka puka lio ma ka hikina, e laa ia no Iehova; aole ia e uhuki hou ia, aole hoi e hoohiolo hou ia a mau loa aku.

## 32

- <sup>1</sup> KA olelo i hiki mai io Ieremia la mai o Iehova mai la, i ka umi o ka makahiki o Zedekia ke alii o ka Iuda, oia ka makahiki umikumamawalu o Nebukaneza.
- <sup>2</sup> Ia manawa, hoopilikia mai la ka poe kaua o ke alii o Babulona ia Ierusalema: a ua hoopaaia o Ieremia ke kaula ma kahi paa

o ka halepaahao iloko o ka hale o ke alii o Iuda.

- 3** No ka mea, hoopaa iho la o Zedekia ke alii o Iuda ia ia, e olelo mai ana, No ke aha la oe e wanana mai nei, i ka i ana mai, Penei ka olelo a Iehova, Aia hoi e haawi aku no au i keia kulanakauhale iloko o ka lima o ke alii o Babulona, a nana ia e hoopio:
- 4** Aole hoi e pakele o Zedekia ke alii o Iuda mai ka lima aku o ka poe Kaleddea; he oiaio e haawiia oia iloko o ka lima o ke alii o Babulona, a e kamailio oia me ia he waha he waha, a e ike auanei kona mau maka i ko ia la mau maka;
- 5** A e kai aku oia ia Zedekia i Babulona, a ilaila oia e noho ai a ike hou au ia ia, wahi a Iehova: ina e kaua aku oukou me ka poe Kaleddea, aole oukou e pomaikai.
- 6** Olelo ae la o Ieremia, Hiki mai la ka olelo a ke Akua io'u nei, i mai,
- 7** Aia hoi, e hele mai ana iou la o Hanameela ke keiki a Saluma kekahī makuakane ou, e i mai ana, E kuai oe nou i kuu aina ma Anatota; no ka mea, o ka pono no ka hoopanai, nou no ia e kuai.
- 8** A hele mai la io'u nei o Hanameela ke keiki a kekahī makuakane o'u, iloko o ka pahale o ka halepaahao, e like me ka olelo a ke Akua; i mai la ia ia'u, Ke noi aku nei au ia oe, e kuai oe i kuu aina ma Anatota ma ka moku o ka Beniamina; no ka mea, nou no ka hooili ana, a nou hoi ka hoopanai ana; e kuai oe nou. Alaila, ike iho la au o ka olelo ia a ke Akua.

<sup>9</sup> A kuai iho la au i ka aina me Hanameela ke keiki a kekahī makuakane o'u, ka mea i noho ma Anatota, a kaupaona iho nona i ke kala, i na sekela kala he umikumamahiku.

<sup>10</sup> Kakau iho la au ma ka palapala, a hoopaa iho la i ka wepa, a lawe iho la na mea ike maka, a kau iho la i ke kala ma na mea kaupaona.

<sup>11</sup> Lawe ae la au i ka palapala hoike i ke kuai ana, i ka mea i paa i ka wepa, a me ka mea i hoopaa ole ia, mamuli o ke kanawai a me ka oihana;

<sup>12</sup> A haawi aku la au i ka palapala hoike i ke kuai ana ia Baruka ke keiki a Neria, ke keiki a Maaseia, ma ke alo o Hanameela ke keiki a kekahī makuakane o'u, a ma ke alo hoi o na mea hoike, o ka poe i kakau inoa ma ka palapala o ke kuai ana, imua hoi o ka poe Iudaio a pau e noho ana ma ka pahale o ka halepaahao.

<sup>13</sup> Kauoha aku la au ia Baruka imua o lakou, i aku la,

<sup>14</sup> Ke olelo mai nei o Iehova o na kaua ke Akua o ka Israela penei; E lawe i keia mau palapala hoike, o ka palapala no ke kuai ana i paa i ka wepa, a me keia palapala hoike aole i paa, a e hahao iloko o ka ipu lepo, i malamaia'i ia mau mea i na la he nui.

<sup>15</sup> No ka mea, ke olelo mai nei o Iehova o na kaua, ke Akua o ka Israela, penei; E komo hou ia na hale, na aina a me na pawaina ma keia aina.

- 16** A pau ae la i ka haawia o ka palapala hoike ia  
Baruka ke keiki a Neria, pule aku la au ia  
Iehova, i ka i ana aku,
- 17** Auwe, e ka Haku, e Iehova e! aia hoi, nau no i  
hana ka lani a me ka honua, ma kou mana  
nui, a me ka lima kakauha, aohe mea i hiki  
ole ia oe.
- 18** Ke hoike mai nei oe i ka lokomaikai i na tausani,  
a ke hoopai nei hoi i ka hala o na makua  
maloko o ka poli o ka lakou mau keiki ma-  
hope o lakou; ke Akua nui a me ka mana, o  
Iehova Sabaota kona inoa.
- 19** He nui ka naauao, he mana hoi i ka hana: no ka  
mea, e kaakaa ana kou mau maka maluna  
iho o na aoao a pau o na keiki a kanaka; e  
uku mai i kela mea i keia mea e like me kona  
mau aoao, a e like hoi me ka hua o kana  
hana ana;
- 20** Ka mea nana i hoonoho i na hoailona a me  
na mea kupaiannahā ma ka aina o Aigupita,  
a hiki i neia la, iloko hoi o ka Israela, a  
iwaena o kanaka; a i hookaulana i kou inoa,  
me ia i keia la;
- 21** A i lawe mai i kou poe kanaka o ka Israela mai  
ka aina o Aigupita mai me na hoailona, a me  
na mea kupaiannahā, a me ka lima ikaika, a  
me ka lima kakauha, a me ka weliweli nui;
- 22** A haawi mai la no lakou i keia aina, au i hoohiki  
ai i ko lakou poe kupuna e haawi mai no  
lakou, he aina e kahe ana ka waiu a me ka  
meli;
- 23** A komo mai la lakou a noho iho la; aka, aole  
lakou i hoolohe i kou leo, aole hoi i hele ma  
kou kanawai: aole lakou i hana iki i ka mea  
a pau au i kauoha mai ai ia lakou e hana;

nolaila ua kau mai ai oe i keia popilikia a pau maluna iho o lakou.

- <sup>24</sup> Aia hoi na puu kaua, ua hiki mai i ke kulanakauhale e lawepio ia ia, a ua haawiia ke kulanakauhale iloko o ka lima o ka poe Kaleddea e kaua ku e mai ana, no ka pahikaua, a me ka wi, a me ka ahulau: a ua ko io no ka mea au i olelo mai ai; aia hoi, ke ike mai nei oe.
- <sup>25</sup> E ka Haku, Iehova e, ua olelo mai oe ia'u, E kuai i ka aina me ke kala, a e lalau i na mea ike maka; aka, ua lilo ke kulanakauhale iloko o ka lima o ka poe Kaleddea.
- <sup>26</sup> Alaila hiki mai ka olelo a Iehova io Ieremia la, i mai la,
- <sup>27</sup> Aia hoi, owau no o Iehova, ke Akua o na mea io a pau: e hiki ole anei kekahī mea ia u?
- <sup>28</sup> Nolaila, ke olelo nei o Iehova; Aia hoi, e haawi no wau i keia kulanakauhale iloko o ka lima o ka poe Kaleddea, a iloko o ka lima o Nebukaneza ke alii o Babulona, a e hoopio auanei oia ia.
- <sup>29</sup> A o ka poe Kaleddea e kaua mai ana i keia kulanakauhale, e hele mai lakou, a e puhi i keia kulanakauhale, a e hoopau lakou ia i ke ahi, me na hale hoi, maluna olaila kahi i puhi ai lakou nei i ka mea ala na Baala, a ninini iho ai i na mohaiinu no na akua e, i mea e hoonaukiuki mai ai ia'u.
- <sup>30</sup> No ka mea, ua hana hewa wale no na mamo a Israela a me na mamo a Iuda imua o'u mai ko lakou wa kamalii mai: no ka mea, ua hoonaukiuki wale mai no na mamo a

Iseraela ia'u, i ka hana a ko lakou mau lima,  
wahi a Iehova.

- 31 No ka mea, he mea hoonaukiuki. a me ka hoooinaina ia'u keia kulanakauhale, mai ka la mai i kukulu ai lakou ia a hiki i keia la, i mea e hoonee aku ai au ia mai ko'u alo aku;
- 32 No ka hewa a pau o na mamo a Iseraela, a o na mamo a Iuda, ka mea a lakou i hana'i e hoonaukiuki mai ia'u, o lakou, o ko lakou poe alii, a me na luna o lakou, a me ko lakou poe kahuna, a me ko lakou poe kaula, a me na kanaka o ka Iuda, a me ka poe e noho ana ma Ierusalema.
- 33 A ua huli lakou i ke kua ia'u, aole i ka maka: owau nae ka mea nana lakou i ao aku e ala ana i ka wanaao e ao aku; aole nae lakou i hoolohe mai, i loaa ia lakou ke akamai.
- 34 A kau no lakou i ko lakou mea haumia iloko o ka hale i kapaia ma ko'u inoa, e hoohaumia ia.
- 35 A hana no hoi lakou i na wahi kiekie o Baala, na mea ma ke awawa o ke keiki a Hinoma, i mea e hele ai ka lakou keikikane a me ka lakou kaikamahine i Moleka, ka mea a'u i kauoha ole aku ai ia lakou, aole hoi ia i komo iloko o ko'u manao e hana lakou i keia mea haumia e hewa'i o ka Iuda.
- 36 Nolaila, ke olelo mai nei o Iehova, ke Akua o ka Iseraela no keia kulanakauhale, ka mea a oukou i olelo ai, E haawia oia iloko o ka lima o ke alii o Babulona, no ka pahikaua, a no ka wi, a no ka mai ahulau; peneia,
- 37 Aia hoi, e hoiliili mai nei au ia lakou mai loko mai o na aina a pau, kahi a'u i kipaku aku ai ia lakou i ko'u huhu, a i ko'u ukiuki, a me ka

inaina nui; a e hoihoi hou mai au ia lakou i keia wahi, a e hoonoho au ia lakou i ka maluhia.

**38** A e lilo mai lakou i poe kanaka no'u, a owau auanei ko lakou Akua.

**39** A e haawi aku no wau ia lakou i hookahi naau, a i hookahi aoao, i makau mau lakou ia'u, i mea e pono ai lakou, a me ka lakou poe keiki mahope iho o lakou.

**40** A e hana wau i berita mau loa me lakou, aole hoi au o huli ae mai o lakou aku, me ka hana ia lakou i ka maikai, a e kau no au i ka makau ia'u iloko o ko lakou naau, aole hoi lakou e haalele mai ia'u.

**41** E olioli no wau ia lakou, e hana maikai ia lakou, a e hoonoho paa ia lakou ma keia aina, mo ko'u naau a pau, a me ko'u uhane a pau.

**42** No ka mea, ke olelo mai nei o Iehova penei; E like me ko'u lawe ana i keia hewa nui a pau maluna o keia poe kanaka, pela no wau e lawe maluna o lakou i ka maikai a pau a'u i olelo aku ai ia lakau.

**43** E kuaiia auanei na mahinaai ma keia aina, kahi a oukou i olelo ai, Ua mehameha, aohe kanaka, aohe holoholona; ua haawiia iloko o ka lima o ko Kaledaea.

**44** E kuai no na kanaka i na mahinaai i ke kala, a kakau i palapala e akaka'i, a hoopaa i ka wepa, a e lawe i poe ike, ma ka aina o ka Beniamina a ma na wahi e puni ana ia Ierusalema, a ma na kulanakauhale o ka Iuda, a ma na kulanakauhale o na mauna, a ma na kulanakauhale o ke awawa, a ma na kulanakauhale o ke kukuluhema; no ka

mea, e hoihoi mai au i ko lakou pio ana,  
wahi a Iehova.

### 33

- <sup>1</sup> A LAILA, hiki lua mai la ka ole lo a Iehova io Ieremia la, i kona paa ana iloko o ka pahale o ka halepaahao, i mai la,
- <sup>2</sup> Penei ka olelo ana mai a Iehova, a ka mea hana, o Iehova ka mea i hoonohonoho ia mea, i mea e paa ai; o Iehova kona inoa;
- <sup>3</sup> E hea mai oe ia'u, a e o aku no wau ia oe, a e hoike aku ia oe i na mea nui a paakiki, au i ike ole ai.
- <sup>4</sup> No ka mea, ke olelo mai nei o Iehova, ke Akua o ka Israela penei, no na hale o keia kulanakauhale, a no na hale o na'lii o ka Iuda, na mea i hoohioloia e na puu, a me ka pahikaua:
- <sup>5</sup> Ke hele mai nei lakou e kaua me ko Kaledea, he mea nae ia e hoopiha ai ia lakou i na kupapau o na kanaka, ka poe a'u i luku ai i ko'u huhu, a i ko'u ukiuki, a ua hunu hoi au i ko'u maka mai keia kulanakauhale aku, no ka hewa a pau o lakou.
- <sup>6</sup> Aia hoi, e lawe mai no au io na la i ka wahi, a me ka mea e ola'i, a e hoola no wau ia lakou, a e hoike aku au ia lakou i ka maluhia nui, me ka oiaio.
- <sup>7</sup> A e hoihoi mai au i ke pio ana o Iuda, a me ke pio ana o ka Israela, a kukulu no au ia lakou, e like me ka wa mamua.
- <sup>8</sup> A e hoomaemae au ia lakou i ko lakou hewa a pau a lakou i hana hewa mai ai ia'u: a e

kala no hoi au i ko lakou hala a pau a lakou  
i lawehala'i, a kipi mai hoi ia'u.

- <sup>9</sup> A e lilo mai ia ia'u i inoa e olioli ai, no ka maikai,  
a no ka nani imua o na lahuikanaka a pau  
o ka honua, ka poe e lohe ana i ka maikai a  
pau a'u e hana aku ai ia lakou. A e makau  
auanei lakou a e haalulu hoi no ka maikai a  
pau, a no ka pomaikai a pau a'u e haawi aku  
ai ia wahi.
- <sup>10</sup> Ke olelo mai nei o Iehova; Ma keia wahi,  
kahia oukou i olelo ai, ua mehameha,  
aohe kanaka, aohe holoholona, ma na ku-  
lanakauhale o ka Iuda, a ma na alanui o  
Ierusalema, ua mehameha, aohe kanaka,  
aohe mea nana e noho, aohe holoholona;
- <sup>11</sup> E lohe hou ia no ka leo o ka olioli, a me ka leo  
o ka hauoli; ka leo o ke kanemare, a me  
ka leo o ka wahinemare; ka leo hoi o ka  
poe e olelo ana, E hoomaikai ia Iehova o  
na kaua, no ka mea, ua maikai o Iehova no  
kona lokomaikai mau loa; o ko ka poe hoi  
e lawe ana i na mohai hoomana iloko o ka  
hale o Iehova. No ka mea, e hoihoi no wau  
i na pio o ka aina, e like me ka wa mamua,  
wahi a Iehova.
- <sup>12</sup> Ke olelo mai nei o Iehova o na kaua penei; Ma  
keia wahi mehameha, kanaka ole, a holoholona ole,  
a ma kona mau kulanakauhale  
a pau, e loaa hou no kahi noho no na  
kahuhipa, e hoomoe ana i ka lakou poe  
hipa.

- 13 Ma na kulanakauhale o na mauna, a ma na kulanakauhale o ke awawa, a ma na kulanakauhale o ke kukuluuhema, a ma ka aina o ka Beniamina, a ma na wahi e puni ana ia Ierusalema, a ma na kulanakauhale o ka Iuda, e hele hou ae no na poe hipamalalo iho o ka lima o ka mea helu, wabi a Iehova.
- 14 Aia hoi, e hiki mai ana no na la, wahi a Iehova, e hana aku ai au i ka mea maikai a'u i olelo ai i ko ka hale o ka Israela, a i ko ka hale o ka Iuda.
- 15 Ia mau la, a ia manawa, na'u no e houlu no Davida i ka Lala o ka pono; a nana no e hana i ka hoopono, a me ka pololei ma ka aina.
- 16 Ia mau la, e hoolaia o ka Iuda, a e noho maluhia hoi o ka Ierusalema, a o kona e kapaia'i, O Iehova ko kakou pono.
- 17 No ka mea, ke olelo mai nei o Iehova penei; Aole e nelo o Davida i ke kanaka e noho ma ka nohoalii o ko ka hale o ka Israela.
- 18 Aole hoi e nele imua o'u o na kahuna, o na Levi i ke kanaka e kaumaha aku i ka mohaikuni, a e kuni aku i na mohai makana, a e hana i ka mohai mau.
- 19 Alaila hiki mai ka olelo a Iehova io Ieremia la, i mai la,
- 20 Ke i mai nei o Iehova penei; Ina hiki ia oukou ke uhai i ka'u berita o ke ao, a me ka'u berita o ka po, i ole ai he ao, a he po i ko laua manawa;

- 21** Alaila e uhaiia no hoi ka'u berita me Davida ka'u kauwa, i loaa ole ia ia ke keiki, e noho aupuni maluna o kona nohoalii; a me na Levi, ka poe kahuna, ko'u poe lawelawe.
- 22** E like hoi me na hoku o ka lani hiki ole ke helu, a me ke one o ke kai hiki ole ke ana; pela no wau e hoonui ai i ka pua a Davida, a ka'u kauwa, a me na Levi, ka poe lawelawe na'u.
- 23** Alaila hiki mai ka olelo a Iehova io Ieremia la, i mai la,
- 24** Aole anei oe i noonoo i ka mea a keia poe kanaka i olelo ai, i ka i ana'e, O na ohana elua a Iehova i koho ai, ua hoole oia ia lakou? Pela lakou i hoowawahawa'i i ko'u poe kanaka, i pau ae ko lakou noho lahuikanaka ana imua o lakou.
- 25** Ke i mai nei o Iehova penei; Ina aohe a'u berita me ke ao a me ka po, aole hoi i kau i na kanawai o ka lani a me ka honua;
- 26** Alaila, e hoole no wau i ka pua a Iakoba, a me Davida ka'u kauwa, aole hoi e lawe i kana mamo i alii maluna o ka pua a Aberahama, a me Isaaka, a me Iakoba; no ka mea, e hoihoi no wau i ko lakou pio ana, a e lokomaikai aku no hoi au ia lakou.

## 34

- 1** KA olelo i hiki mai io Ieremia la, mai o Iehova mai, i ka wa i kaua'i o Nebukaneza, ke alii o Babulona, a me kona poe kaua a pau, a me na aupuni a pau o ka honua, na aupuni malalo iho o kona lima, a kaua na

kanaka a pau ia Ierusalema, a i kona mau kulanakauhale a pau, i mai la,

- <sup>2</sup> Ke olelo mai nei o Iehova, ke Akua o ka Israela, penei: O hele, a e olelo aku ia Zedekia, ke alii o ka Iuda, a e haiaku ia ia, Ke i mai o Iehova penei; Aia hoi, e haawi no wau i keia kulanakauhale iloko o ka lima o ke alii o Babulona, a e puhi no oia ia wahi i ke ahi.
- <sup>3</sup> Aole hoi oe e pakale mai kona lima aku, aka, e pio io no oe, a e haawia iloko o kona lima; a e ike aku no kou mau maka i na maka o ke alii o Babulona, a e kamailio no kona waha me kou waha, a e hele no oe i Babulona.
- <sup>4</sup> E Zedekia, ke alii o ka Iuda, e hoolohe mai oe i ka olelo a Iehova; Ke olelo mai nei o Iehova nou, Aole oe e make i ka pahikaua;
- <sup>5</sup> E make no oe maloko o ka malubia. Me ke kuni ana no na makua ou, na'lii kahiko mamua ou, pela no lakou e kuni ai i na mea ala nou. A e kanikau lakou ia oe, Auwe ka haku! Ua haiaku no wau i ka olelo, wahi a Iehova.
- <sup>6</sup> Alaila, olelo aku no o Ieremia ke kaula i keia mau olelo a pau ia Zedekia, ko alii o ka Iuda ma Ierusalema;
- <sup>7</sup> A kaua ko alii o ko Babulona poe kaua ia Ierusalema, a i ua kulanakauhale a pau i koe o ka Iuda, ia Lakisa, a ia Azeka; no ka mea, o keia mau kulanakauhale i paa i ka pa i koe o na kulanakauhale o ka Iuda.
- <sup>8</sup> O ka olelo i hiki mai io Ieremia la, mai o Iehova mai, mahope iho o ka Zedekia hana ana i berita me ka poe kanaka a pau ma

Ierusalema, e kala aku i ko lakou noho kauwa ole ana;

- <sup>9</sup> I kuu wale aku kela kanaka keia kanaka i kana kauwakane, a o kela kanaka keia kanaka i kana kauwawahine, ina he Heberakane, a ina he Heberawahine, i hoopaa ole ai kekahi i kona hoahanau Hebera i kauwa luhi wale nana.
- <sup>10</sup> A lohe na'lii a pau, a me na kanaka a pau i komo i ka berita, e hookuu ana kela mea keia mea i kana kauwakane, a o kela mea keia mea i kana kauwawahine, i ole lakou e hoopaa ia lakou i kauwa, alaila hoolohe ae la lakou, a kuu ae la.
- <sup>11</sup> A mahope iho, huli lakou, a hoihoi ae la lakou i na kauwakane, a me na kauwawahine a lakou i kuu iho ai, a hookauwa ae la ia lakou i kauwakane, a i kauwawahine.
- <sup>12</sup> Alaila, hiki mai ka olelo a Iehova io Ieremia la, mai o Iehova mai, i mai la,
- <sup>13</sup> Ke i mai nei o Iehova, ke Akua o ka Israela penei; Hana aku la au i berita me ko oukou poe kupuna, i ka la a'u i lawe mai ai ia lakou, mai ka aina o Aigupita mai, a mai ka hale mai o ka poe kauwa, i mai la,
- <sup>14</sup> I ka pau ana o na makahiki ehiku e kuu aku oukou, o kela kanaka keia kanaka i kona hoahanau i ka Hebera i kuaiia nou; a hookauwa mai oia nau no na makahiki eono, alaila e kuu wale aku oe ia ia, mai ou aku la; aole nae i hoolohe mai ko oukou mau kupuna i ka'u, aole hoi i haliu mai i ko lakou pepeiao.

- 15 Ano iho nei, ua hoohuliia oukou, a ua hana pono kela kanaka keia kanaka imua ou i ke kukala ana aku i ka hookuu wale ia o kona hoalauna: a ua hana hoi oukou i berita imua o'u ma ka hale i heaia ko'u inoa maluna ona:
- 16 Aka, ua huli oukou, a ua hoohaumia i ko'u inoa, a ua hoihoi mai kela kanaka keia kanaka i kaua kauwakane, o kela kanaka keia kanaka i kana kauwawahine a lakou i kuu wale ai ma ko lakou makemake, a ua hookauwa hou ia lakou, i lilo lakou i kauwakane a i kauwawahine na oukou.
- 17 Nolaila, ke olelo mai nei o Iehova penei; Aole oukou i hoolohe mai ia'u ma ke kukala ana i ke kuu wale ia o kela kanaka no kona hoahanau, o kela kanaka no kona hoalauna. Aia hoi, ke kukala aku nei au i ke kuu wale ia oukou i ka pahikaua, a i ka mai ahulau, a i ka wi, a e hooauhee aku au ia oukou iloko o na aupuni a pau o ka honua.
- 18 A e haawi no wau i na' kanaka i lawehala i ka'u berita, o ka poe i hana ole ma na olelo o ka berita a lakou i hana'i imua o'u, ia lakou i oki ae i ke keikihipa mawaena, a hele ae mawaena o kona mau apana.
- 19 O na'lii o ka Iuda a me na'lii o Ierusalema, na luna a me na kahuna, a me na kanaka a pau o ka aina, ka poe i hele mawaena o na apana o ke keikibipi;
- 20 E haawi no wau ia lakou iloko o ka lima o ko lakou poe enemi, a iloko o ka lima o ka poe e imi ana i ko lakou ola. A e lilo no ko lakou

kupapau i mea ai na na manu o ka lani, a na na holoholona o ka honua.

- <sup>21</sup> A e haawi no hoi au ia Zedekia, ke alii o ka Iuda, a me kana poe alii i ka lima o ko lakou poe enemi, iloko o ka lima o ka poe e imi ana i ko lakou ola, a iloko o ka lima o ka poe kaua o ke alii o Babulona, ka poe i pii aku, mai o oukou aku nei.
- <sup>22</sup> Na'u no e kauoha aku, wahi a Iehova, a e hoihoi mai ia lakou i keia kulanakauhale; a e kaua mai lakou ia wahi, a e hoopio, a e puhi ia wahi i ke ahi. A e hoolilo wau i na kulanakauhale o ka Iuda i mehameha, aohe mea e noho ana.

## 35

- <sup>1</sup> KA olelo i hiki mai io Ieremia la, mai o Iehova mai i na la o Iehoiakima ke keiki a Iosia, ke alii o ka Iuda, i mai la,
- <sup>2</sup> O hele oe i ka hale o ka Rekaba, a e olelo aku ia lakou, a e lawe mai ia lakou i ka hale o Iehova, a iloko o kekahikeena, a e hoohainu ia lakou i ka waina.
- <sup>3</sup> Alaila, kii aku la au ia Iaazania i ke keiki a Ieremia, ke keiki a Habazinia, a me kona poe hoahanau, a me kana mau keikikane a pau, a me ko ka hale a pau o ka Rekaba;
- <sup>4</sup> A lawe ae la au ia lakou iloko o ka hale o Iehova, a iloko o ke keena o na keiki a Hanana, ke keiki a Igdedalia, he kanaka no ke Akua, aia kokoke i ke keena o na'lii, maluna hoi o ke keena o Maaseia ke keiki a Saluma, ke kiaipuka.

- <sup>5</sup> A imua o na kanaka o ka hale o ka Rekaba, kauaku la au i mau ipu i piha i ka waina, a me na kiaha, a i aku la au, E inu oukou i ka waina.
- <sup>6</sup> Alaila, olelo mai la lakou, Aole makou e inu i ka waina; no ka mea, kauoha mai la o Ionadaba ke keiki a Rekaba ko makou kupuna ia makou, i mai la, Mai inu oukou i ka waina, o oukou, a me ka oukou poe keiki, a i ka manawa pau ole.
- <sup>7</sup> Mai kukulu hale hoi oukou, mai lulu hua, mai kanu pawaina, aole na oukou ia; aka, i ko oukou mau la a pau, e noho oukou ma na halelewa, i nui na la o ko oukou ola ana ma ka aina a oukou i noho malihini ai.
- <sup>8</sup> Pela makou i hoolohe ai i ka leo o Ionadaba, ke keiki a Rekaba, ko makou kupunakane, ma na mea a pau ana i kauoha mai ai ia makou, e inu ole i ka waina i ko makou mau la a pau, o makou a me ka makou poe wahine, a me ka makou poe keikikane a me ka makou poe kaikamahine.
- <sup>9</sup> Aole hoi e kukulu hale no makou e noho ai iloko; aole hoi o makou pawaiua, aole mahinaai, aole hua.
- <sup>10</sup> Aka, ua noho makou ma na halelewa, a ua hoolohe, a ua hana e like me na mea a pau a Ionadaba, ko makou kupuna i Kauoha mai ai ia makou.
- <sup>11</sup> A i ka manawa i pii mai ai i kela aina o Nebukaneza ke alii o Babulona, alaila, i iho la makou, Ea, o haele kakou i Ierusalema no ka makau i ka poe kaua o ko Kaleddea, a no ka makau i ka poe kaua o ko Suria; nolaila makou e noho nei i Ierusalema.

- 12** Alaila, hiki mai la ka olelo a Iehova ia Ieremia, i mai la,
- 13** Ke olelo mai nei o Iehova o na kaua, ke Akua o ka Israela penei; O hele e hai aku i na kanaka, i ka Iuda, a me ka poe noho ma Ierusalema, Aole anei oukou e ae i ke ao ana, aole anei oukou e hoolohe i ka'u mau olelo? wahi a Iehova.
- 14** O na olelo a Ionadaba, ke keiki a Rekaba ana i kauoha iho ai i kana poe keiki, aole e inu i ka waina, ua malamaia. No ka mea, a hiki mai i keia la, ua inu ole lakou, a ua malama hoi i ke kauoha a ka makua. Aka, ua olelo aku no wau ia oukou, e ala ana i ka wanaao e olelo, aole nae oukou i hoolohe mai ia'u.
- 15** Ua hoouna aku no hoi au io oukou la, i ka'u poe kauwa a pau, i na kaula, e ala ana i ka wanaao e hoouna, me ka olelo aku, E hoi mai kela mea keia mea o oukou, mai kona aoao hewa mai, a e hooponopono i ka oukou hana ana; a mai hele mahope o na akua e, e malama ia lakou, a e noho no oukou ma ka aina a'u i haawi aku ai ia oukou, a i ko oukou poe makua; aole nae oukou i haliu mai i ko oukou pepeiao, aole i hoolohe mai ia'u.
- 16** No ka mea, ua malama na keiki a Ionadaba, ke keiki a Rekaba i ke kauoha o ko lakou makua, ana i kauoha ai ia lakou; a ua hoolohe ole keia poe kanaka ia'u:
- 17** Nolaila, ke olelo mai nei o Iehova, ke Akua o na kaua, ke Akua o ka Israela; Aia hoi, E lawe mai no wau maluna o ka Iuda, a maluna o ka poe a pau e noho la ma Ierusalema i ka hewa a pau a'u i olelo ai ia lakou: no ka mea,

ua olelo no wau ia lakou, aole lakou i lohe mai; ua hea aku au ia lakou, aole lakou i o mai.

- <sup>18</sup> Olelo ae la o Ieremia i ko ka hale o ka Rekaba, Ke olelo mai nei o Iehova o na kaua, ke Akua o ka Israela, penei; No ka mea, ua hoolohe oukou i ke kauoha a Ionadaba, ko oukou kupunakane, a malama hoi i kona mau kanawai, a ua hana e like me ua mea a pau aua i kauoha mai ai ia oukou;
- <sup>19</sup> Nolaila, ke olelo mai nei o Iehova o na kaua, ke Akua o ka Israela, Aole e nele o Ionadaba, ke keiki a Rekaba, i ke kanaka e ku imua o'u, a hiki i ka manawa pau ole.

## 36

- <sup>1</sup> I KA makahiki eha o Iehoiakima, ke keiki a Iosia, ke alii o ka Iuda, hiki mai keia olelo io Ieremia la, mai Iehova mai, i mai la,
- <sup>2</sup> E lawe oe i owili palapala nau, a e kakau iloko i na olelo a pau a'u i olelo aku ai ia oe no ka Israela, a no ka Iuda, a no na lahuikanaka a pau, mai na la mai a'u i olelo aku ai ia oe, mai na la mai o Iosia, a hiki mai i keia la.
- <sup>3</sup> E lohe auanei paha ko ka hale o ka Iuda i ka hewa a pau a'u e manao nei e hana aku ai ia lakou; a nolaila e huli kela kanaka keia kanaka mai kona aoao hewa mai, i kala aku ai au i ko lakou hala, a me ko lakou hewa.
- <sup>4</sup> Alaila, hea ae la o Ieremia ia Baruka, i ke keiki a Neria, a kakau iho la o Baruka, mai ka waha

mai o Ieremia, i na olelo a pau a Iehova ana  
i olelo ai ia ia.

<sup>5</sup> A kauoha ae la o Ieremia ia Baruka, i ae la, Ua paa  
wau, aole hiki ia'u ke hele iloko o ka hale o  
Iehova;

<sup>6</sup> Nolaila, o hele oe e heluhelu i ka owili au i kakau  
ai mamuli o ko'u waha, i na olelo hoi a  
Iehova ma na pepeiao o na kanaka maloko  
o ka hale o Iehova, i ka la e hookeai ai. A  
e heluhelu no hoi oe ia ma na pepeiao o  
ka Iuda a pau i hele mai, mailoko mai o ko  
lakou mau kulanakauhale.

<sup>7</sup> Ina paha e nonoi lakou ia Iehova, a huli kela  
mea keia mea, mai koua aoao hewa mai. No  
ka mea, ua nui ka huhu a me ka inaina a  
Iehova i hai aku ai ia lakou.

<sup>8</sup> A hana iho la o Baruka ke keiki a Neria, e like me  
na mea a pau a Ieremia, ke kaula i kauoha  
mai ai ia ia, e heluhelu ana ma ka palapala,  
i na olelo a pau a Iehova maloko o ka hale o  
Iehova.

<sup>9</sup> A i ka makahiki elima o Iehoiakima, ke keiki a  
Iosia, ke alii o ka Iuda, i ka iwa o ka malama,  
kala ae la lakou i ka hookeai o na kanaka a  
pau ma Ierusalema imua o Iehova, a o na  
kanaka a pau i hele mai i Ierusalema, mai  
na kalanakauhale o ka Iuda mai.

<sup>10</sup> Alaila, heluhelu aku la o Baruka maloko o ka  
buke, i na olelo a pau a Ieremia, iloko o  
ka hale o Iehova, maloko o ke keena o  
Gemaria ke keiki a Sapana, ke kakauolelo,  
ma ke kahua maluna, ma ke komo ana o  
ka pukapa hou o ka hale o Iehova, ma na  
pepeiao o na kanaka a pau.

- 11 A lohe o Mikaia, ke keiki a Gemaria ke keiki a Sapana, i na olelo a pau a Iehova maloko mai o ka buke;
- 12 Alaila, iho iho la ia ilalo i ka hale o ke alii, i ke keena o ke kakauolelo. Aia hoi, e noho ana na'lii a pau malaila, o Elisama ke kakauolelo, o Delaia ke keiki a Semaia, o Elenatana ke keiki a Akebora, o Gemaria ke keiki a Sapana, a me Zedekia ke keiki o Hanenia, a me na'lii a pau.
- 13 Alaila, hai ae la o Mikaia ia lakou i na olelo a pau ana i lohe ai, ia Baruka i heluhelu ai i ka buke ma na pepeiao o na kanaka.
- 14 Hoouna aku la na'lii a pau ia Iehudi, ke keiki a Netania, ke keiki a Selemia, ke keiki a Kusi, io Baruka la, i aku la, E lawe oe ma kou lima i ka owili, ka mea au i heluhelu ai ma na pepeiao o na kanaka, a e hele mai. Alaila, lawe iho la o Baruka, ke keiki a Neria i ka owili ma kona lima, a hele ae la io lakou la.
- 15 I mai la lakou ia ia, E noho iho oe, a e heluhelu mai ia mea ma ko makou pepeiao. Heluhelu iho la o Baruka ma ko lakou pepeiao.
- 16 A i ko lakou lohe ana i na oleie a pau, makau ae la lakou, o kekahī, a me kekahī, a olelo mai la ia Baruka, Oiaio no e hai aku no makou i ke alii i keia mau olelo a pau.
- 17 Ninau mai la lakou ia Baruka, i mai la, E hai mai oe, ea, pehea kau kakau ana i keia mau olelo a pau na kona waha?
- 18 Alaila, haiaku la o Baruka ia lakou, Nana no i olelo mai ia'u i keia mau olelo a pau ma kona waha, a na'u no i kakau i ka inika ma ka buke.

- <sup>19</sup> Alaila, olelo mai la na'lili ia Baruka, o hele, a pee, o oe, a me Ieremia. Mai hoike i kekahi kanaka i kahi o olua.
- <sup>20</sup> A komo aku la lakou iloko i ke alii maloko o ke kahua, ua kau aku la nae lakou i ka owili maloko o ke keena o Eliasama, ke kakauolelo, a hai aku la lakou i na olelo a pau ma na pepeiao o ke alii.
- <sup>21</sup> Alaila hoouna ae la ke alii ia Iehudi e lawe mai i ka owili; a lawe ae la oia ia mea mailoko aku o ke keena o Elisama, ke kakauolelo. A heluhelu iho la o Iehudi ia mea ma na pepeiao o ke alii, a ma na pepeiao o na'lili a pau e ku pu ana me ke alii.
- <sup>22</sup> E noho ana no ke alii maloko o ka hale hoilo, i ka malama eiwa; a e a ana ke ahi ma ka ipu ahi imua ona.
- <sup>23</sup> A heluhelu o Iehudi i ekolu, a i eha paha lalani, alaila, okioki ae la oia ia mea i ka pahipeni, a hoolei aku la iloko o ke ahi ma ka ipu ahi, a pau ka owili i ke ahi maluna o ka ipu ahi.
- <sup>24</sup> Aole nae lakou i makau, aole i haehae i ko lakou aahu, aole ke alii, aole kekahi o kana mau kauwa i lohe i keia mau olelo a pau.
- <sup>25</sup> Aka, ua nonoi aku a Elenatana a me Delaia a me Gemaria i ke alii i ole ia e puhi i ka owili. Aole ia i hoolohe mai i ka lakou.
- <sup>26</sup> Alaila, kena ae la ke alii ia Ierameela, ke keiki a Hameleka, a me Seraia, ke keiki a Azeriela, a me Selemia, ke keiki a Abedeela, e kii ia Baruka i ke kakauolelo, a me Ieremia ke kaula; huna nae o Iehova ia laua.

- 27 Alaila hiki mai ka olelo a Iehova io Ieremia la,  
     mahope iho o ka puhi ana o ke alii i ka owili,  
     a me na olelo o Baruka i kakau ai mai ka  
     waha mai o Ieremia, i mai la,
- 28 E lawe oe i owili hou nau, a e kakau iho maloko  
     olaila i na olelo a pau o ka owili mua, ka mea  
     a Iehoiakima ke alii o ka Iuda i puhi ai.
- 29 A e olelo aku oe ia Iehoiakima, i ke alii o ka Iuda,  
     Ke olelo mai nei o Iehova, penei; Ua puhi oe  
     i keia owili, me ka ninau iho, No ke aha la  
     oe i palapala maloko, i ka i ana ae, E oiaio  
     no e hele mai ke alii o Babulona a e luku i  
     keia aina, a e hoopau i ke kanaka a me ka  
     holoholona, mai ia wahi aku?
- 30 Nolaila, ke olelo mai nei o Iehova, no  
     Iehoiakima ke alii o ka Iuda penei; Aole  
     e loaa ia ia ka mea nana e noho maluna  
     o ka nohoalii o Davida: a e hoolei wale ia  
     kona kupapau mawaho i ke ao ma ka wela,  
     a i ka po ma ke hau.
- 31 A nau no e hoopai aku ia ia, a me kana poe  
     mamo, a me kana mau kauwa, no ko lakou  
     hewa; a na'u no e lawe aku maluna o lakou,  
     a maluna o ka poe e noho la ma Ierusalema,  
     a maluna o na kanaka o ka Iuda, i ka hewa  
     a pau a'u i olelo ai no lakou; aole nae lakou  
     i hoolohe mai.
- 32 Alaila, lawe ae la o Ieremia i owili hou, a haawi  
     ae la ia ia Baruka, i ke kakauolelo, ke keiki  
     a Neria; a kakau iho la oia mai ka waha  
     mai o Ieremia, i na olelo a pau o ka buke a  
     Iehoiakima ke alii o ka Iuda i puhi ai iloko o  
     ke ahi; a nui na olelo like i hoopili pu ia me  
     lakou.

## 37

- <sup>1</sup> NOHO aupuni iho la o Zedekia ke alii, ke keiki a Iosia, ma ka hakahaka o Konia, ke keiki a Iehoiakima. na Nebukanēza i hoonoho ia ia i alii ma ka aina o ka Iuda.
- <sup>2</sup> Aole oia, aole kana poe kauwa, aole hoi na kanaka o ka aina i hoolohe i na olelo a Iehova, ana i olelo mai ai ma ke kaula ma Ieremia.
- <sup>3</sup> A hoouna ae la o Zedekia, ke alii ia Iehukala, ke keiki a Selemia, a me Zepania, ke keiki a Maaseia ke kahuna, io Ieremia la, i ae la, E pule oe ia Iehova, i ko kakou Akua, no kakou.
- <sup>4</sup> Hele mai la o Ieremia iloko. a puka aku la iwaho iwaena o na kanaka; no ka mea, ia manawa aole lakou i hoolei ia ia iloko o ka hale paahao.
- <sup>5</sup> Alaila, ua hele mai ka poe kaua o Parao, mai Aigupita mai; a lohe ko Kaledea, ka poe e hoopilikia ana ia Ierusalema i ka olelo no lakou, alaila haalele lakou ia Ierusalema.
- <sup>6</sup> Alaila, hiki mai ka olelo a Iehova i ke kaula, ia Ieremia, i mai la,
- <sup>7</sup> Ke olelo mai nei o Iehova ke Akua o ka Israela; Penei oe e olelo aku ai i ke alii o ka Iuda, ka mea i hoouna mai ia oe io'u nei e ninau mai ia'u; Aia hoi, o ka poe kaua o Parao i hele e kokua ia oukou, e hoi hou no lakou i ko lakou aina iho.
- <sup>8</sup> A e hele hou mai no ko Kaledea e kaua i keia kulanakauhale, a e hoopio no lakou i keia wahi, a e puhi hoi i ke ahi.

- <sup>9</sup> Ke olelo mai nei o Iehova penei; Mai hoop-unipuni oukou ia oukou iho, me ka olelo, E hele aku ko Kaleddea, mai o kakou aku; no ka mea, aole lakou e hele aku.
- <sup>10</sup> Ina paha, ua luku oukou i ka poe kaua a pau o ko Kaleddea, na mea i kaua mai ia oukou, a koe kekahia mau kanaka wale no i hoehaia, e ku hou mai no kela mea keia mea iloko o kona halelewa, a e puhi i keia kulanakauhale i ke ahi.
- <sup>11</sup> A i ka wa i pii aku ai ka poe kaua o Kaleddea mai Ierusalema aku no ka makau i ka poe kaua o Parao,
- <sup>12</sup> Alaila, hele aku la o Ieremia iwaho o Ierusalema e hele i ka aina o ka Benamina, e hookaawale ia ia iho malaila iwaena o na kanaka.
- <sup>13</sup> A hiki oia i ka pukapa o ka Benamina, aia malaila kekahia luna, o Iriia kona inoa, he keiki na Selemia, ke keiki a Hanania. A lalau iho la oia ia Ieremia i ke kaula, i ae la, Ke iho aku nei oe i ko Kaleddea.
- <sup>14</sup> Alaila, olelo aku la o Ieremia, he wahahée, aole e iho aku i ko Kaleddea. Aole nae ia i hoolohe mai i kana; aka, lalau mai la o Iriia ia Ieremia, a lawe aku la ia ia i na'lii.
- <sup>15</sup> A huhu mai la na'lii ia Ieremia, a hahau mai la ia ia, a hoolei ia ia iloko o ka halepaahao, ma ka hale o Ionatana, ke kakauolelo; no ka mea, ua hoolilo lakou ia hale, i wahi paahao.
- <sup>16</sup> A ua komo o Ieremia iloko o ka luapaahao, a iloko o na keena, a he nui na la o kona noho

ana malaila;

- <sup>17</sup> Alaila, hoouna mai la o Zedekia, ke alii, a lawe mai la ia ia iwaho. A ninau malu mai la ke alii ia ia ma kona hale, i mai la, He olelo anei mai Iehova mai? Iaku la o Ieremia, He olelo no; no ka mea, ua olelo mai oia, E haawiia no oe iloko o ka lima o ke alii o Babuloua.
- <sup>18</sup> Olelo aku la no hoi o Ieremia i ke alii ia Zedekia, Heaha ka hewa a'u i hana aku ai ia oe, a i kau poe kauwa, a i keia poe kanaka, i hahao ai oukou ia'u iloko o ka halepaahao?
- <sup>19</sup> Auhea ko oukou poe kaula, ka poe i wanaua mai ia oukou me ka olelo iho, Aole hele ku e mai ke alii o Babulona ia oukou, aole hoi ku e i keia aina?
- <sup>20</sup> Nolaila, ke nonoi aku nei au ia oe e hoolohe mai, e kuu Haku ke alii. Ke nonoi aku nei au, i aeia mai ka'u nonoi ana imua ou, i ole oe e hoihoi ia'u i ka hale o Ionatana, ke kakauolelo, o make auanei au malaila.
- <sup>21</sup> Alaila, kauoha ae la o Zedekia, ke alii, e hoonoho lakou ia Ieremia ma ke kahua o ka halepaahao, i haawi hoi lakou nana, i kela la i keia la i hookahi apana berena, mai ke alanui mai o ka poe kahu palaoa, a hiki i ka manawa e hoopauia'i ka berena o ke kulanakauhale. A noho iho la o Ieremia ma ke kahua o ka halepaahao.

## 38

- <sup>1</sup> A LOHE o Sepatia, ke keiki a Matania, a me Gedalia ke keiki a Pasura, a me Iukala, ke keiki a Selemia, a me Pasura, ke keiki a

Malekia, i na olelo a Ieremia i olelo ai i na kanaka a pau, i ka I ana ae,

- 2** Ke olelo mai nei o Iehova penei, O ka mea hoomau i kona noho ana ma keia kulanakauhale, e make no ia i ka pahikaua, a i ka wi, a i ka mai ahulau. Aka, o ka mea hele aku i ko Kaledea, e ola ia; no ka mea, e haawiia kona ola i waiwaipio nona, a e ola ia.
- 3** Ke olelo mai nei o Iehova penei, Oiaio no, e haawiia keia kulanakauhale iloko o ka lima o ka poe kaua o ke alii o Babulona, a na lakou e hoopio ia wahi.
- 4** Nolaila, olelo ae la na'lii i ke alii nui, Ke nonoi aku nei makou ia oe, e make keia kanaka; no ka mea, pela oia e hoonawaliwali nei i na lima o na kanaka kaua, ka poe e koe nei ma keia kulanakauhale, a me ka lima o na kanaka a pau, i kana olelo ana ia lakou i na olelo e like me ia: no ka mea, aole imi keia kanaka i ka mea e maluhia ai keia poe kanaka, aka, i ka mea e poino ai.
- 5** Alaila, olelo ae la o Zedekia, ke alii, Aia hoi, aia no ia iloko o ko oukou mau lima; no ka mea, aole hiki i ke alii ke hana i kekahia mea ku e ia oukou.
- 6** Alaila, lalau mai la lakou ia Ieremia, a hahao ae la ia ia iloko o ka luawai o Malekia ke keiki a ke alii, ma ke kahua o ka halepaahao; a kuu iho la lakou ia Ieremia ilalo ma na kaula. Aohe wai iloko o ka luawai, he nenelu nae, a poho o Ieremia iloko o ka nenelu.
- 7** A lohe o Ebedemeleka, ka Aitiopa, he mea no ka hale o ke alii i poaia, ua hahao lakou ia

- Ieremia iloko o ka luawai; e noho ana no ke alii ma ka pukapa o Beniamina;
- <sup>8</sup> Alaila, hele ae la o Ebedemeleka mailoko aku o ka hale o ke alii, a olelo ae la i ke alii, i ae la,
- <sup>9</sup> E kuu haku, e ke alii, ua hana hewa keia poe kauaka, ma na mea a pau a lakou i hana aku ai ia Ieremia, i ke kaula, i ka mea a lakou i hoolei ai iloko o ka luawai, a e make auanei oia i ka pololi ma kahi e noho ana oia; no ka mea, aohe berena e koe ma ke kulananakauhale.
- <sup>10</sup> Alaila, kauoha ae la ke alii ia Ebedemeleka i ka Aitiopa, i ae la, E lawe oe i kanakolu kanaka me oe, mai keia wahi aku, a hapai ia Ieremia, i ke kaula, mailoko mai o ka luawai, mamua o kona make ana.
- <sup>11</sup> Alaila, lawe o Ebedemeleka i mau kanaka me ia, a komo aku la iloko o ka hale o ke alii, malalo iho o ka waihona kala, a lawe aku la i mau welu kahiko a me na apana lole popopo, a kuu iho la ia mau mea ilalo i ka luawai io Ieremia la ma na kaula.
- <sup>12</sup> Olelo mai la o Ebedemeleka, ka Aitiopa ia Ieremia, E kau oe i keia mau welu kahiko, a me na apana lole popopo ma kou mau poee, malalo o na kaula. A hana iho la o Ieremia pela.
- <sup>13</sup> A huki mai la lakou ia Ieremia, ma na kaula, a lawe ia ia mawaho aku o ka luawai. A noho o Ieremia ma ke kahua o ka hale paahao.
- <sup>14</sup> Alaila, hoouna mai la o Zedekia, ke alii, a lawe ae la ia Ieremia, i ke kaula io na la ma ke keena komo ekolu, aia ma ka hale o Iehova; a i mai

la ke alii ia Ieremia, E ninau ana au ia oe i kekahi mea, mai huna iki mai oe ia'u.

- <sup>15</sup> Iaku la o Ieremia ia Zedekia, Oiaio anei, ina hai aku au ia oe, aole anei oe e pepehi mai ia'u? A ina ao aku au ia oe, aole anei e hoolohe mai ia'u?
- <sup>16</sup> Alaila, hoohiki malu o Zedekia, ke alii ia Ieremia, i mai la, Ma ko Iehova ola ana, ma ka mea nana i hana i keia uhane no kaua, aole au e pepehi ia oe, aole hoi au e haawi aku ia oe iloko o ka lima o keia poe kanaka e imi nei i kou ola.
- <sup>17</sup> Alaila, haiaku la o Ieremia ia Zedekia, Ke i mai nei o Iehova ke Akua o na kaua, ke Akua o Iseraela, penei; Ina hele ioaku oe i na luna o ke alii o Babulona, alaila, e ola no oe, aole hoi e puhiia keia kulanakauhale; a pela no oe e ola'i, a me ko kou hale.
- <sup>18</sup> Aka, ina aole oe e heleaku i na luna o ke alii o Babulona, alaila, e haawiia no keia kulanakauhale i ka lima o ko Kaledea, a e puhi no lakou i keia wahi i ke ahi, aole hoi oe e pakele mailokoaku o ko lakou lima.
- <sup>19</sup> Imai la o Zedekia ke alii ia Ieremia, Ua makau wau i na Iudaio i haule i ko Kaledea, o haawi auanei lakou ia'u iloko o ko lakou lima, a hana ino mai lakou ia'u.
- <sup>20</sup> Iaku la o Ieremia, Aole lakou o haawi. Ke nonoiaku nei au ia oe, e malama i ka leo o Iehova a'u e haiaku nei ia oe; pela e pomaikai ai oe, a e ola no oe.
- <sup>21</sup> A ina hoole oe, aole heleaku, eia ka olelo a Iehova ana i hoike mai ai ia'u.

- 22 Aia hoi, o na wahine a pau i koe ma ka hale o ke alii o ka Iuda, e laweia'ku lakou i na luna o ke alii o Babulona, a e olelo no lakou, O kou mau makamaka ka i hooikaika ia oe a ua lanakila lakou maluna ou, a ua poho kou mau wawae ilalo i ka lepo, a ua hele hope laua.
- 23 A e lawe aku no lakou i kau mau wahine a pau, a me kau mau keiki a pau i ko Kaleddea; aole oe e pakele, mai ko lakou lima aku, aka, e paa auanei oe i ka lima o ke alii o Babulona, a nau no e puhiia'i keia kulanakauhale i ke ahi.
- 24 Olelo mai la o Zedekia ia Ieremia, Mai hoike aku i keia mau olelo i kekahi kanaka, alaila, aole oe e make.
- 25 Aka, ina lohe na'lii ua kamailio pu kaua me oe, a hele mai lakou iou nei, a olelo mai ia oe, Ea, e hai mai oe ia makou i ka mea au i hai aku ai i ke alii, mai huna ia mea ia makou, alaila, aole makou e pepehi aku ia oe; a i ka mea hoi a ke alii i olelo mai ai ia oe.
- 26 Alaila, e olelo aku oe ia lakou, Nonoi aku au i ke alii i ole au e hoihoiia'ku i ka hale o Ionatana e make malaila.
- 27 A hele mai na'lii a pau io Ieremia la, a ninau mai la ia ia, a hai aku no oia ia lakou, e like me na olelo a pau a ke alii nui i kauoha mai ai: nolaila, haalele lakou ia ia, no ka mea, aole i ikeia ia mea.
- 28 A noho o Ieremia ma ke kahua o ka halepaahao a hiki i ka la i pio ai o Ierusalema; a malaila no oia i ka wa i pio ai o Ierusalema.

## 39

- <sup>1</sup> I KA iwa o ka makahiki o Zedekia, ke alii o ka Iuda, i ka umi o ka malama, hele mai la o Nebukaneza ke alii o Babulona, a me kona poe kaua a pau, e ku e ia Ierusalema, a hoopilikia iho la oia ia wahi.
- <sup>2</sup> A i ka umikumamakah i o ka makahiki o Zedekia i ka ha o ka malama, i ka iwa o ka la o ka malama, pio ke kulanakauhale.
- <sup>3</sup> A komo mai la na luna a pau a ke alii o Babulona, a noho iho la ma ka pukapa waena, o Neregalesareza, a me Samegarenebo, a me Saresekima, ka luna o ka poe i poaia, a me Neregalesareza, ka luna o na Magoi, a me na luna i koe a pau o ke alii o Babulona.
- <sup>4</sup> A ike aku la o Zedekia, ke alii o ka Iuda ia lakou, a me na kanaka kaua a pau, alaila pee aku la lakou, a hele aku la iwaho o ke kulanakauhale i ka po ma ke ala o ka mahinaai o ke alii, ma ka pukapa iwaena o na pa elua; a hele aku la oia ma ke ala o ka papu.
- <sup>5</sup> A hahai aku la ko Kaledaea poe kaua ia lakou, a loaa o Zedekia ma na papu o Ieriko. A hoopaa lakou ia ia a lawe aku la ia ia io Nebukaneza la ke alii o Babulona, ma Ribela, ma ka aina ma Hamata, a malaila oia i hoohewa ai ia ia.
- <sup>6</sup> A pepehi ae la ke alii o Babulona i na keiki a Zedekia, ma Ribela imua hoi o kona mau maka. A pepehi no hoi ke alii o Babulona i na kanaka alii a pau o ka Iuda.

- 7** A poalo no hoi oia i na maka o Zedekia, a hoopaa  
iho la ia ia i na kaula keleawe elua, e lawe  
aku ia ia i Babulona.
- 8** A puhi aku la ko Kaledaea i ka hale o ke alii a me  
na hale o na kanaka i ke ahi, a hoohiolo hoi  
i na pa o Ierusalema.
- 9** Lawepio aku la no hoi o Nebuzaradana, ka luna  
kaua, i ke koena o na kanaka e noho ana ma  
ke kulanakauhale, a me ka poe hele, na mea  
i hele io na la, a me ka poe i koe a pau e koe  
ana, a i Babulona.
- 10** Waiho mai nae o Nebuzaradana, ka luna kaua i  
ka poe ilihune o na kanaka, na mea waiwai  
ole, ma ka aina o ka Iuda, a haawi mai la  
ia lakou i na pawaina a me na mahinaai ia  
manawa.
- 11** Ua kauoha ae la o Nebukaneza, ke alii o Babu  
lona ia Nebuzaradana, i ka luna kaua no  
Ieremia, i ae la,
- 12** E lawe oe ia ia, a e nana lokomaikai aku oe ia ia,  
mai hana hewa aku ia ia; e hana no ia ia e  
like me kana e olelo mai ai ia oe.
- 13** Alaila, hoouna mai la o Nebuzaradana, ka luna  
kaua, a me Nebusasebana, ka luna keen  
amoe, a me Neregalesareza, ka luna Magoi,  
a me na luna a pau o ke alii o Babulona;
- 14** Hoouna ae la lakou, a lawe mai la ia Ieremia mai  
ke kahua mai o ka halepaahao, a haawi ia  
ia, ia Gedalia, i ke keiki a Ahikama, i ke keiki  
a Sapana, i lawe oia ia ia i ka hale; a noho  
iho la oia iwaena o na kanaka.

<sup>15</sup> Hiki mai la ka olelo a Iehova io Ieremia la ia ia i paa ai ma ke kahua o ka halepaahao, i mai la,

<sup>16</sup> O hele a e olelo aku ia Ebedemeleka i ka Aitiopa, i ka i ana aku, Ke olelo mai nei o Iehova o na kaua, ke Akua o ka Israela; Aia hoi, e hookau mai no wau i ka'u mau olelo maluna o keia kulanakauhale no ka hewa, aole no ka maikai; a e hiki mai no ia imua ou i kela la.

<sup>17</sup> E hoopakele nae au ia oe i kela la, wahi a Iehova; aole e haawia'ku oe iloko o na lima o ka poe kanaka au e makau nei.

<sup>18</sup> No ka mea, e koopakele io no wau ia oe, aole oe e make i ka pahikaua, o kou ola no kou waiwaipio; no ka mea, ua hilinai mai oe ia'u, wahi a Iehova.

## 40

<sup>1</sup> KA olelo i hiki mai io Ieremia la, mai o Iehova mai, mahope iho o ko Nebuzaradana, ko ka lunakaua lawepio ana ia ia, a ua hookuu aku ia ia mai Ramaaku, no ka mea, ua hoopaa oia ia ia i na kaulahao, me ka poe pio a pau o Ierusalema, a me ka Iuda, ka poe i lawe pio ia i Babulona.

<sup>2</sup> Lawe ae la ka lunakaua ia Ieremia, i mai la ia ia, Ua olelo no o Iehova kou Akua, i keia hewa no keia wahi.

<sup>3</sup> Na Iehova hoi ia i lawe mai, a hana e like me kana olelo ana. No ka oukou hana hewa ana ia Iehova, me ka hoolohe ole i kona leo, nolaila i hiki mai ai keia mea maluna o oukou.

- 4** Aia hoi, ke kala aku nei au ia oe i keia la, i na kaulahao ma kou lima. Ina he mea maikai i kou mau maka, ke hele pu me au i Babulona, o hele, a e kau no ko'u mau maka maluna ou. Aka, ina he mea ino i kou mau maka ke hele pu me au i Babulona, ua oki no: e nana hoi, aia no ka aina a pau imua ou, ma kahi maikai a pono i kou mau maka ke hele oe, malaila oe e hele ai.
- 5** A mamua o kona hoi ana, i ae la ia, E hoi aku oe ia Gedalia, i ke keiki a Ahikama, ke keiki a Sapana, ka mea a ke alii o Babulona i hoonoho ai i kiaaina maluna o na kulanakauhale o ka Iuda, a e noho oe me ia iwaena pu me na kanaka; a ma kahi pono i kou mau maka ke hele, malaila oe e hele ai. A haawi mai la ka lunakaua, i ai nana, a i makana no hoi, a hookuu mai la ia ia.
- 6** Alaila, hele ae la o Ieremia io Gedalia la i ke keiki a Ahikama, ma Mizepa; a noho pu me ia iwaena o na kanaka i koe ma ka aina.
- 7** A lohe na luna o ka poe koa a pau ma na papu, o lakou a me ko lakou poe kanaka, ua hoonoho ke alii o Babulona ia Gedalia i kiaaiua no ka aina, a ua haawi mai i kanaka nona, a me na wahine a me na kamalii, i na mea hune hoi o ka aina, i ka poe i lawe pio ole ia i Babulona;
- 8** Alaila, hele mai la ia Gedalia, ma Mizepa, o Isemaela, ke keiki a Netania, a me Iohanana, a me Ionatana, na keiki a Karea, a me Saraia, ke keiki a Tanehumeta, a me na keiki a Epai no Netopati, a me Iezania, ke keiki a ka Maaka, o lakou a me ko lakou poe kanaka.

- <sup>9</sup> A hoohiki o Gedalia, ke keiki a Ahikama, ke keiki a Sapana, ia lakou, a me ko lakou poe kanaka, i ae la, Mai makau ke hookauwa aku no ko Kaleddea. E noho no ma ka aina, a e hookauwa aka no ke alii o Babulona, a e pomaikai auanei oukou.
- <sup>10</sup> Owau hoi, e noho no wau ma Mizepa, e hoolaulea i ko Kaleddea i hele mai ia kakou. A o oukou hoi, e hoiliili oukou i ka waina, a me na hua o ke kau, a me ka aila, a e ukuhi iloko o ko oukou hue, a e noho ma na kulanakauhale a oukou e noho nei.
- <sup>11</sup> Alaila, o na Iudaio a pau, e noho ana ma Moaba, a iwaena hoi o ka Amona, a me Edoma, a ma na aina a pau, ia lakou i lohe ai, ua waiho mai ke alii o Babulona i koena o ka Iuda, a ua hoonoho ia Gedalia ke keiki a Ahikama, ke keiki a Sapana, maluna o lakou;
- <sup>12</sup> Hoi ae la na Iudaio a pau, mai loko mai o na wahi a pau a lakou i kipakuia'i, a hele mai la io Gedalia la, ma Mizepa, a hoiliili i ka waina a me na hua o ke kau he nui loa.
- <sup>13</sup> Alaila, hele mai la o Iohanana, ke keiki a Karea, a me na luna o na koa a pau e noho ana ma na papu io Gedalia la, ma Mizepa,
- <sup>14</sup> I mai la ia ia, Ua ike pono anei oe, ua hoouna mai o Baalisa, ke alii o ka Amona, ia Isemaela, i ke keiki a Netania, e pepehi ia oe? Aole i manao o Gedalia, ke keiki a Ahikama, he oiaio ka lakou.
- <sup>15</sup> A olelo malu mai la o Iohanana, ke keiki a Karea ia Gedalia, ma Mizepa, i mai, Ke nonoi aku nei au ia oe, e ae mai ia'u, e hele, a e pepehi no wau ia Isemaela i ke keiki a Netania, me

ka ike ole o kekahi kanaka. No ke aha la oia e pepehi ai ia oe, i hooauheeia'i na Iudaio a pau i akoakoa mai iou la, a make hoi ke koena o ka Iuda?

- <sup>16</sup> Alaila, olelo aku la o Gedalia, ke keiki a Ahikama, ia Iohanana, ke keiki a Karea, Mai hana oe ia mea, no ka mea, he wahahee kau e olelo mai nei no Isemaela.

## 41

<sup>1</sup> I KA hiku o ka malama, hiki mai la keia mau mea; o Isemaela, ke keiki a Netania, ke keiki a Elisama, no ka hanauna alii, a me na luna o ke alii, he umi kanaka pu me ia, hele mai la lakou ia Gedalia, i ke keiki a Ahikama, ma Mizepa; a malaila lakou i ai pu ai i ka berena ma Mizepa.

<sup>2</sup> Alaila, ku mai la o Isemaela, ke keiki a Netania, a me na kanaka he umi e noho pu ana me ia, a pepehi iho la ia Gedalia i ke keiki a Ahikama, i ke keiki a Sapana i ka pahikaua, a make oia, o ka mea hoi a ke alii o Babulona i hoolilo ai i kiaaina o ia aina.

<sup>3</sup> A pepehi no hoi o Isemaela i na Iudaio a pau e noho pu ana me ia, me Gedalia hoi ma Mizepa, a me ko Kaleddea i loaa ia ia malaila, o na kanaka kaua hoi.

<sup>4</sup> A i ka lua o ka la mahope iho o kona pepehi ana ia Gedalia, aole kanaka i ike,

<sup>5</sup> Alaila, hele mai la kekahi mau kanaka, mai Sekema, a mai Silo, a mai Samaria mai, he kanawalu lakou, ua kahi ko lakou nmiumi, ua haehaeia ko lakou aahu, ua okioki ia

- lakou iho: he mau mohai, a he mea ala ma ko lakou lima e lawe i ka hale o Iehova.
- 6** A hele aku la o Isemaela, ke keiki a Netania, mai Mizepa aku, e halawai me lakou, a uwe no hoi i kona hele ana; a i kona halawai ana me lakou, i ae la ia ia lakou, E hele mai ia Gedalia, i ke keiki a Ahikama.
- 7** A ia lakou i hele ai iloko o ke kulauakauhale, Pepehi aku la o Isemaela ke keiki a Netania ia lakou, a hoolei aku la iloko o ka lua, oia, a me na kanaka pu me ia.
- 8** A loaa iwaena o lakou, he umi kanaka, i mai la lakou ia Isemaela, Mai pepehi ia makou; no ka mea, he waiwai ko makou ma ka papu, he huapalaoa, he huabale, a he aila, a he meli. Nolaila, oki iho la oia, aole i pepehi pu ia lakou me ko lakou poe hoahanau.
- 9** O ka lua, kahi o Isemaela i hoolei ai i na kupapau a pau o na kanaka ana i pepehi aku ai me Gedalia, oia ka mea a Asa ke alii i hana'i no ka makau ia Baasa, ke alii o ka Israela; a hoopihia iho la o Isemaela ke keiki o Netania ia wahi i ka poe i make.
- 10** Alaila, lawepio aku la o Isemaela i ke koena a pau o na kanaka ma Mizepa, i na kaikamahine a ke alii, a me na kanaka a pau i koe ma Mizepa, ka poe a Nebuzaredana, ka lunakaua i haawi ai ia Gedalia, ke keiki a Ahikama; lawepio aku la o Isemaela ke keiki a Netania ia lakou, a hele aku la, i hiki i ka Amona.
- 11** A lohe o Iohanana, ke keiki a Karea, a me na luna a pau o na koa me ia, i ka hewa a pau a

- Isemaela ke keiki a Netania i hana'i,  
 12 Alaila, lawe ae la ia i na kanaka a pau, a hele aku  
     la, e kaua me Isemaela, i ke keiki a Netania,  
     a loaa oia ma na wai nui ma Gibeona.  
 13 A hiki i ka manawa a na kanaka a pau me  
     Isemaela i ike mai ai ia Iohanana, i ke keiki  
     a Karea, a me na luna a pau o na koa me ia,  
     alaila, olioli iho la lakou.  
 14 O na kanaka a pau a Isemaela i lawepio ai, huli  
     lakou, a hoi, a hele ia Iohanana i ke keiki a  
     Karea.  
 15 Pakele aku la o Isemaela ke keiki a Netania mai  
     Iohanana aku, oia a me na kanaka ewalu i  
     hele pu me ia i ka Amona.  
 16 Alaila, lawe o Iohanana, ke keiki a Karea a me  
     na luna a pau o na koa me ia, i ke koena  
     a pau o na kanaka i loaa ia ia ma Mizepa  
     mai Isemaela mai, ke keiki a Netania mai,  
     mahope iho o kona pepehi ana ia Gedalia,  
     i ke keiki a Ahika ma, o na kanaka kaua a  
     me na wahine, a me na Keiki, a me ua mea i  
     poaia, ka poe ana i lawe ae ai, mai Gibeona  
     mai;  
 17 A hele aku la lakou, a noho ma kahi noho o  
     Kimehama, aia kokoke i Betelehema, ma ke  
     ala e komo aku ai i Aigupita,  
 18 No ko Kaledea; no ka mea, ua makau ia lakou, no  
     ko Isemaela, ke keiki a Netania pepehi ana  
     ia Gedalia, i ke keiki a Ahikama, ka mea a ke  
     alii o Babulona i hoonoho ai i kiaaina no ia  
     aina.

## 42

<sup>1</sup> A LAILA, hookokoke mai la na luna o ka poe

koa, a me Iohanana, ke keiki a Karea, a me Iezania, ke keiki a Hosaia, a me na kanaka a pau, mai ka mea uuku a ka mea nui,

<sup>2</sup> A olelo mai la lakou ia Ieremia i ke kaula, Ke noiaku nei makou ia oe e ae mai i ka haule ana o ko makou nonoi imua ou, a e pule aku hoi ia Iehova, i kou Akua no makou, no keia koena a pau; (no ka mea, ua koe mai makou, he poe uuku noloko mai o na mea nui, e like me ka ike ana o kou mau maka ia makou;)

<sup>3</sup> I hoike mai ai o Iehova, kou Akua ia makou i ke ala e pono ai makou ke hele, a i ka mea hoi e pono ai makou ke hana.

<sup>4</sup> Alaila, olelo aku la o Ieremia, ke kaula ia lakou, Ua lohe an, aia hoi, e pule no wau ia Iehova, i ko oukou Akua, e like me na olelo a oukou; a o ka mea a Iehova e olelo mai ia oukou, oia ka'u e hai aku ai ia oukou; aole au e huna i kekahī mea ia oukou.

<sup>5</sup> Alaila, olelo mai la lakou ia Ieremia, O Iehova no ka mea hoike oiaio, a pono iwaena o kakou, ke hana ole makou e like me na mea a pau a Iehova e hoouna mai ai ia oe io makou nei;

<sup>6</sup> Ina he maikai, a ina he hewa, e hoolohe no makou i ka leo o Iehova ko makou Akua, ka mea ia ia makou e hoouna aku ai ia oe, i pomaikai ai makou i ka wa e hoolohe ai makou i ka leo o Iehova ko makou Akua.

<sup>7</sup> A mahope iho o na la he umi, alaila hiki mai ka olelo a Iehova ia Ieremia.

<sup>8</sup> Alaila, hea aku oia ia Iohanana, i ke keiki a Karea, a me na luna a pau o na koa, e noho pu ana me ia, a me na kanaka a pau, mai ka mea uuku, a ka mea nui;

- <sup>9</sup> I mai la oia ia lakou, Ke olelo mai nei o Iehova ke Akua o ka Israela, ka mea ia ia oukou i houna aku ai ia'u, e hookau i ko oukou nonoi ana imua ona;
- <sup>10</sup> Ina e noho oukou ma keia aina, alaila, e kukulu no wau ia oukou, aole e hoohiolo, e hoonipa'a loa wau ia oukou, aole au e uhuki; no ka mea, na mihi au i ka ino a'u i hana aku ai ia oukou.
- <sup>11</sup> Mai makau i ke alii o Babulona, i ka mea a oukou e makau nei; mai makau ia ia, wahi a Iehova; no ka mea, owau pu me oukou e hoola ia oukou, a e hoopakele hoi ia oukou mai kona lima aku.
- <sup>12</sup> A e hoike aku au i ka lokomaikai ia oukou, i lokomaikai ai oia ia oukou, a hoihoi mai ia oukou i ko oukou aina iho.
- <sup>13</sup> Aka, ina olelo oukou, Aole makou e noho ma keia aina, aole hoi e hoolohe i ka leo o Iehova, ko oukou Akua;
- <sup>14</sup> A olelo hoi, Aole; e hele no makou i ka aina o Aigupita, ma kahi e ike ole ai makou i ke kaua, aole hoi e lohe i ke kani ana o ka pu, aole hoi e pololi i ka berena; a malaila no makou e noho ai;
- <sup>15</sup> No ia mea la, ea, e hoolohe oukou i ka olelo a Iehova, e ke koena o ka Iuda; Ke i mai nei o Iehova o na kaua, ke Akua o ka Israela, Ina ikaika ke kau ana o ko oukou maka e hele i Aigupita, e hele hoi a noho malaila;
- <sup>16</sup> Alaila, e hiki mai no keia, o ka pahikaua a oukou i makau ai, e loaa no ia oukou ia malaila, ma ka aina o Aigupita; a o ka wi, ka mea a oukou i makau ai, e pipili no ia ia oukou

malaila, ma Aigupita, a malaila oukou e make ai.

**17** E hiki no ia i na kanaka a pau e kau ana i ko lakou maka e hele i Aigupita e noho malaila: e make no lakou i ka pahikaua, a i ka wi, a i ka mai ahulau; aohe mea e koe, aole hoi e pakele i ka hewa a'u e lawe ai maluna o lakou.

**18** No ka mea, ke olelo mai nei o Iehova o na kaua, ke Akua o ka Israela, E like me ka ninini ana o ko'u huhu, a me ko'u ukiuki maluna o ka poe e noho la ma Ierusalema: pela no e nininiia'i ko'u ukiuki maluna o oukou. i ka wa e hiki aku ai oukou iloko o Aigupita; a e lilo oukou i mea hailiiliia, a i mea e kahaha'i, a i mea poino, a i mea hoowahawahaia; aole hoi oukou e ike hou mai i keia wahi.

**19** Ua olelo no o Iehova no oukou, E, oukou ke koena o ka Iuda, Mai hele oukou i Aigupita; e ike pono oukou, ua hoike aku au ia oukou i keia la.

**20** Ua hele hewa oukou e pilikia ai ko oukou ola, i ka wa i hoouna aku ai oukou ia'u io Iehova la, i ko oukou Akua, i ka i ana mai la, E pule aku oe ia Iehova i ko makou Akua no makou; a e like me na mea a pau a Iehova, ko makou Akua e olelo mai ai, pela no oe e hai mai ia makou, a e hana no makou.

**21** A ua hai aku au ia oukou i keia la; aole oukou i hoolohe i ka leo o Iehova o ko oukou Akua, aole ma kekahī mea ana i hoouna mai ai ia'u, io oukou la.

**22** No ia mea la, ea, e ike pono oukou, e make oukou  
i ka pahikaua, a i ka wi, a i ka mai ahulau,  
ma kahi a oukou e makemake ai e hele, a e  
noho.

## 43

- 1** A I ka hoopau ana o Ieremia e olelo aku i na kanaka a pau, i na olelo a pau a Iehova ko lakou Akua, i na mea a Iehova ko lakou Akua i hoouna mai ai ia ia io lakou la, i keia mau olelo hoi,
- 2** Alaila, olelo mai la o Azaria, ke keiki a Hosaia, a me Iohanana, ke keiki a Karea, a me na kanaka hookiekie a pau, i mai la ia Ieremia, Ke olelo wahahee mai nei oe; aole i hoouna mai nei o Iehova ko makou Akua ia oe, e olelo, Mai hele i Aigupita e noho malaila;
- 3** Aka, ke hooikaika mai nei o Baruka, ke keiki a Neria ia oe e ku e ia makou, e haawi hoi ia makou iloko o ka lima o ko Kaledea, i pepehi mai lakou ia makou, a lewepio hoi ia makou i Babulona.
- 4** Aole i hoolohe o Iohanana, ke keiki a Karea, a me na luna a pau o ka poe koa, a me na kanaka a pau, i ka leo o Iehova, e noho ma ka aina o ka Iuda.
- 5** A o Iohanana ke keiki a Karea, a me na luna o ka poe koa, lawe lakou i ke koena o ka Iuda, ka poe i hoi mai, mai na aina a pau mai kahi a lakou i kipakuia'ku ai, a ua hoi mai e noho ma ka aina o ka Iuda:
- 6** I na kanē, a me na wahine, a me na kamalii, a me na kaikamahine a ke alii, a me na kanaka a pau a Nebuzaredana, na ka lunakaua i

waiho pu ai me Gedalia, ke keiki a Ahikama, ke keiki a Sapana, a me Ieremia ke kaula, a me Baruka, i ke keiki a Neria.

<sup>7</sup> A hele mai lakou i ka aina o Aigupita, no ka mea, aole lakou i hoolohe i ka leo o Iehova; a hele lakou i Tahepanesa.

<sup>8</sup> Alaila, hiki mai ka olelo a Iehova io Ieremia la, ma Tahepanesa, i mai la,

<sup>9</sup> Elawe oe i mau pohaku nui ma kou lima, a e huna ia mau mea maloko o ka lepo ma ka puu pohaku lepo, aia ma ke komo ana o ka hale o Parao, ma Tahepanesa; imua o na maka o na kanaka o ka Iuda;

<sup>10</sup> A e i aku no hoi ia lakou, Ke olelo mai nei o Iehova o na kaua, ke Akua o ka Israela, penei; Aia hoi, e hoouna aku no wau a e lawe mai ia Nebukaeza, i ke alii o Babulona, i ka'u kanwa, a e kau no wau i kona nohoalii maluna o keia mau pohaku, a'u i huna'i; a e kaulai oia i kona paku alii maluna o ia mau mea.

<sup>11</sup> A hiki mai oia, e anai no oia i ka aina o Aigupita, a make ka poe no ka make, a pio ka poe no ka noho pio ana, a lilo i ka pahikaua ka poe no ka pahikaua.

<sup>12</sup> A e hoaa no wau i ke ahi maloko o na hale o na akua o Aigupita; a e puhi no oia ia mau mea, a e lawe pio aku ia lakou; a e aahu no oia ia ia iho i ka aina o Aigupita, e like me ka ke kahuhipa aahu ana i kona lole; a e hele aku oia malaila aku me ka maluhia.

**13** E wawahī no hoi oia i na kii o Betesemesa, aia ma ka aina o Aigupita: a e puhi no hoi oia i na hale kii o ko Aigupita, i ke ahi.

## 44

- 1** O KA olelo i hiki mai io Ieremia la no na Iudaio a pau e noho ana ma ka aina o Aigupita, ka poe hoi e noho ana ma Migidola, a ma Tahepanesa, a ma Nopa, a ma ka aina i Paterosa, i mai la,
- 2** Ke i mai nei o Iehova o na kaua, ke Akua o ka Israela, Ua ike no oukou i ka hewa a pau a'u i lawe mai ai maluna o Ierusalema, a maluna o na kulanakauhale a pau o ka Iuda; a aia hoi lakou i keia la, ua anaiia, aohē kanaka e noho ana maloko,
- 3** No ko lakou hewa a lakou i hana'i e hoonaukiuki mai ai ia'u, i ko lakou hele ana e puhi i ka mea ala, a e malama i na'kua e a lakou i ike ole ai, aole lakou, aole oukou, aole hoi ko oukou mau makua.
- 4** A hoouna aku no hoi au i ka'u mau kauwa a pau, i na kaula e ala ana i ka wanaao e hoouna, me ka olelo aku, Ke noi aku nei au ia oukou, mai hana i kela mea ino loa, a'u e ukiuki nei.
- 5** Aole lakou i hoolohe, aole hoi i haliu mai i ko lakou pepeiao, e huli, mai ko lakou hewa aku, e puhi ole i ka mea ala no na akua e.
- 6** Nolaila, i nininia'i ko'u huhu, a me ko'u ukiuki, a ua hoaaia maloko o na kulanakauhale o ka Iuda, a ma na alanui o Ierusalema, a ua anaiia, a ua olohelohē, me ia i keia la.
- 7** Nolaila, ke olelo mai nei o Iehova, ke Akua o na kaua, ke Akua o ka Israela, No ke aha la

oukou e hana nei i keia hewa nui i ko oukou uhane iho, e hooki ae mai o oukou aku, i ke kane a me ka wahine, a me ke kamalii, a me ke keiki ai waiu, mai ka Iuda aku i koe ole kekahī no oukou;

<sup>8</sup> I ko oukou hoonaukiuki ana ia'u, i na hana a ko oukou lima, e puhi ana i ka mea ala no na akua e, ma ka aina o Aigupita, kahi o oukou i hele aku ai e noho, i hooki ae oukou ia oukou iho, i lilo hoi oukou i mea poino, a i mea hoowahawaha, ma na aina a pau o ka honua?

<sup>9</sup> Ua poina anei ia oukou ka hewa o ko oukou poe makua, a me ka hewa o na'lii o ka Iuda, a me ka hewa o ka lakou poe wahine, a me ko oukou hewa iho, a me ka hewa o ka oukou poe wahine, a lakou i hana'i ma ka aina o ka Iuda, a ma na alanui o Ierusalema?

<sup>10</sup> Aole nae lakou i mihi, a hiki i keia la, aole hoi i makau, aole hoi i hele ma ko'u kanawai, aole hoi ma ka'u mau kauoha, a'u i kau ai imua o oukou, a imua hoi o ko oukou mau makua.

<sup>11</sup> Nolaila, ke olelo mai nei o Iehova o na kaua, ke Akua o ka Israela, Aia hoi, e kauaku au i ko'u maka ku e ia oukou, no ka hewa, a e hooki ae au i ka Iuda a pau.

<sup>12</sup> A e lalau aku au i ke koena o ka Iuda, ka poe i huli ko lakou maka e hele i ka aina o Aigupita, e noho malaila, a e hoopauia lakou a pau, a e haule hoi ma ka aina o Aigupita. E hoopauia lakou i ka pahikaua, a i ka wi, a e make lakou, mai ka mea uuku a ka mea nui, i ka pahikaua, a i ka wi; a e lilo lakou i mea

hailiiliia, a i mea e kahaha'i, a i mea poino,  
a i mea hoowawahawa.

<sup>13</sup> No ka mea, e hoopai no wau i ka poe e noho la  
ma ka aina o Aigupita, me ha'u i hoopai ai i  
ko Ierusalema, i ka pahikaua, a i ka wi, a i  
ka mai ahulau.

<sup>14</sup> Aole hoi e pakele a koe kekahi koena o ka Iuda, i  
hele aku nei i Aigupita e noho malaila, aole  
hoi hou i ka aina o ka Iuda, kahi i makemake  
ai ko lakou naau e hoi a noho malaila; aoe  
mea e hoi, o na mea pakele wale no.

<sup>15</sup> Alaila, o na kanaka a pau i ike i ka puhi ana o  
ka lakou wahine i ka mea ala no na akua e,  
a me na wahine a pau e ku mai ana, he poe  
nui, o na kanaka a pau hoi i noho ma ka aina  
o Aigupita, a ma Paterosa, olelo mai la lakou  
ia Ieremia, i mai la,

<sup>16</sup> O ka olelo au i olelo mai ai ia makou ma ka inoa  
o Iehova, aole makou e hoolohe aku ia oe.

<sup>17</sup> Aka, oiaio no, o hana makou i na mea a pau i  
puka aku, mai ko makou waha aku, e puhi  
i ka mea ala no ke alii wahine o ka lani, a e  
ninini hoi i na mohai inu ia ia, me makou i  
hana'i, o makou a me ko makou poe makua,  
a me ko makou poe alii, a me ko makou  
poe luna, ma na kulanakauhale o ka Iuda,  
a ma na alanui o Ierusalema: no ka mea,  
ia manawa he nui ka makou ai, aole hoi o  
makou mai, aole makou i ike i ka ino.

<sup>18</sup> Aka, mahope mai o ko makou hooki ana e kuni  
i ka mea ala no ke alii wahine o ka lani, a e  
ninini hoi i mohai inu nona, ua nele makou

i na mea a pau, a ua oki loa makou i ka pahikaua a me ka wi.

**19** I ka wa i kuni ai makou i ka mea ala no ke alii wahine o ka lani, a ninini i mohai inu nona, aole anei a makou kane, ia makou i hana'i i papa berena nana, i mea hoomana, a ia makou i ninini ai i mohai inu nona?

**20** Alaila olelo aku la o Ieremia i na kanaka a pau, i na kane a me na wahine, a me na kanaka a pau loa, ka poe i olelo mai ia ia, i aku la ia,

**21** O ka mea ala a oukou i kuni ai ma na kulanakauhale o ka Iuda, a ma na alanui o Ierusalema, o oukou, a me ko oukou poe makua, a me ko oukou poe alii, a me ko oukou poe luna, a me na kanaka o ka aina, aole anei i hoomanao o Iehova ia mau mea, aole anei i komo ia iloko o kona manao?

**22** Aole i hiki ia Iehova ke hoomanawanui hou aku, no ka hewa o ka oukou hana ana, a no na mea hoopailua a oukou i hana'i; nolaila, ua lilo ko oukou aina i olohelohe, i mea e kahaha'i, i wahi poino, me ka mea ole nana e noho, me ia i keia la.

**23** No ka mea, ua kuni oukou i ka mea ala, a ua hana hewa oukou ia Iehova, aole hoi i hoolohe i ka leo o Iehova, aole hoi i hele mamuli o kona kanawai, aole mamuli o kana mau kauoha, a me kana hoike ana; nolaila i hiki mai ai keia hewa maluna o oukou, me ia i keia la.

**24** Olelo aku no hoi o Ieremia i na kanaka a pau, a i na wahine a pau, E hoolohe mai oukou i ka leo o Iehova, e ka Iuda a pau ma ka aina o Aigupita.

- 25 Olelo mai o Iehova o na kaua, ke Akua o ka Israela, penei; i mai la, Ua olelo no oukou, a me ka oukou wahine, ma ko oukou mau waha, a ua hana hoi ko oukou mau lima, ua i mai oukou, Oiaio no e hooko no makou i ko makou hoohiki ana a makou i hoohiki ai, e kuni i ka mea ala no ke alii wahine o ka lani, a e ninini i mohaiinu nona; e hooko io no oukou i ko oukou hoohiki ana, a e hana io no oukou i na mea a oukou i hoohiki ai.
- 26 No ia mea la, ea, e hoolohe mai oukou i ka olelo a Iehova, e ka Iuda, ka poe e noho la ma ka aina o Aigupita; Aia hoi, ua hoohiki no wau ma ko'u inoa nui, wahi a Iehova, aole e hea hou ia ko'u inoa, ma ka waha o kekahī kanaka o ka Iuda, ma ka aina o Aigupita, i ka i ana ae, Ke ola la no o Iehova, ke Akua.
- 27 Aia hoi, e kiai no wau ia lakou, no ka hewa, aole no ka maikai; a e hoopauia na kanaka a pau o ka Iuda, ka poe noho ma ka aina o Aigupita, i ka pahikaua, a i ka wi, a pau wale lakou.
- 28 E hoi nae kekahī poe uuku, mai ka aina o Aigupita ae a i ka aina o ka Iuda, o ka poe hoi i pakele i ka pahikaua; aka, o ke koena o ka Iuda a pau i hele i ka aina o Aigupita e noho malaila, e ike auanei lakou i ka olelo kupaa, o ka'u paha, o ka lakou paha.
- 29 A o keia hoi ka hoailona no oukou, wahi a Iehova, e hoopai aku au ia oukou ma keia wahi, i ike auanei i ka oiaio o ke kupaa ana o ka'u olelo ku e ia oukou;

**30** Ke olelo mai nei o Iehova, penei; Aia hoi, e haawi aku no wau ia Parao-hopera, ke alii o Aigupita, iloko o ka lima o kona poe enemi, a iloko o ka lima o ka poe imi i kona ola, me ka'u i haawi ai ia Zedekia, ke alii o ka Iuda, iloko o ka lima o Nebukaneza, ke alii o Babulona, i kona enemi, i ka mea hoi nana i imi i kona ola.

## 45

- 1** O KA olelo a Ieremia, a ke kaula i olelo ai ia Baruka ke keiki a Neria, ia ia i kakau ai i keia mau olelo maloko o ka buke, no ka waha mai o Ieremia, i ka makahiki eha o Iehoiakima, ke keiki a Iosia, ke alii o ka Iuda, i mai la,
- 2** Ke olelo mai nei o Iehova, ke Akua o ka Israela ia oe, E Baruka, penei;
- 3** Ua olelo mai no oe, Ano la, auwe ia'u! no ka mea, ua hooili mai o Iehova i ke kaumaha maluna o ko'u eha: Maule no au i ko'u kaniuhu ana, aole loaa ia'u ka hoomaha.
- 4** Penei oe e olelo ai ia ia, Ke olelo mai nei o Iehova penei; Aia hoi, o ka mea a'u i kukulu ai, oia ka'u e wawahi ai, a o ka mea a'u i kanu ai, oia ka'u e uhuki ai, o keia aina hoi a pau.
- 5** Ke imi nei anei oe i mea nui nou! Mai imi oe; no ka mea, aia hoi, e lawe mai no wau i ka hewa maluna a na mea ola a pau, wahi a Iehova; aka, e haawi no wau i kou ola ia oe, i waiwai pio nou, ma na wahi a pau au e hele aku ai.

## 46

- <sup>1</sup> KA olelo a Iehova i hiki mai io Ieremia la i ke kaula, e ku e i ko na aina;
- <sup>2</sup> E ku e ia Aigupita, i ka poe kaua hoi o Parao-neko, ke alii o Aigupita, aia ma ka muliwai o Euperate, ma Karekemisa, ka poe a Nebukaneza i luku ai i ka makahiki aha o Iehoiakima, ke keiki a Iosia, ke alii o ka Iuda.
- <sup>3</sup> E hoomakaukau oukou i ka paku a me ka palekaua, a e hookokoke i ke kaua.
- <sup>4</sup> E kahiko i na lio, a e ee ae, e na hololio, a e ku mai me na mahiole; e hookala i na ihe, e komo na paleumaumaunahi.
- <sup>5</sup> No ko aha la wau i ike aku ai ia lakou ua makau a hoi hope? ua hahauia na mea ikaika o lakou, a ua hee loa, aole i nana ihope; puni lakou i ka makau, wahi a Iehova.
- <sup>6</sup> Aole e hiki i ka mea mama e holo, aole hoi e pakelē ka poe ikaika; e okupe no lakou a hina ma ke kukulu akau, ma ka muliwai o Euperate.
- <sup>7</sup> Owai keia mea e hele mai nei, me he wai pii la, a kupikipikio na wai, e like me ka wai kahe la?
- <sup>8</sup> Ke pii nei o Aigupita, me he wai pii la, a ua kupikipikio kona mau wai me he wai kahe la; a olelo no hoi oia, E pii aku no wau, e uhi no wau i ka honua; e luku no wau i ke kulanakauhale, a me ka poe e noho ana ilaila.
- <sup>9</sup> E pii mai, e na lio, e holo ikaika hoi, e na kaakaua; e hele mai na kanaka ikaika, o ko Atiopa, a me ko Libua, ka poe lawelawe

i ka palekaua, a me ka Ludia, o ka poe i lawelawewe, a lena ke kakaka.

**10** Oia no ka la o ka Haku, o Iehova o na kaua, ka la o ka hoopai ana, e hoopai ai i kona poe enemi nona; e ai no ka pahikaua, a e maona no, a e ona no hoi i ko lakou koko; no ka mea, he mohai ko ka Haku, ko Iehova o na kaua ma ka aina o ke kukuluakau, ma ka muliwai o Euperate.

**11** E pii aku oe i Gileada, a e lawe mai oe i nini, e ka wahine puupaa, ke kaikamahine o Aigupita; he make hewa nae kou lawe ana i ka laaulapaau a nui, no ka mea, aole loaa ia oe ke ola.

**12** Ua lohe ko na aina i kou hilahila, a ua hoop-ihia kou uwe ana i ka aina; no ka mea, ua okupe kekahī kanaka ikaika i kekahī kanaka ikaika, a ua hina pu laua.

**13** Ka olelo a Iehova i olelo mai ai ia Ieremia, i ke kaula, no ka hele ana mai o Nebukaneza, ke alii o Babulona, e anai i ka aina o Aigupita.

**14** E hai aku oukou ma Aigupita, e kala aku hoi ma Migidola, e kala aku ma Nopa, a ma Tape-hanesa; e i aku, E kupaa, a e hoomakaukau ia oe; no ka mea, e ai no ka pahikaua a puni oe.

**15** No ke aha la i hoohinaia'i kou poe koa, aole lakou i kupaa, no ka mea, hooauhee o Iehova ia lakou.

**16** Nana no i hoohina i na mea he nui loa; oia, hina no kekahī maluna o kekahī; olelo no nae lakou, E ku kakou iluna, e hoi hou kakou i ko

kakou kanaka iho, a i ko kakou aina i hanau ai, mai ke alo aku o ka pahikaua luku.

**17** Uwe no lakou malaila, he walaau wale o Parao, ke alii o Aigupita, ua hala kona manawa pono.

**18** Me au e ola nei, wahi a ke Alii, nona ka inoa, o Iehova o na kaua, Oiaio, me Tabora iwaena o na mauna, a me Karemela ma kahakai, e hele mai no ia.

**19** E ke kaikamahine e noho la ma Aigupita, e hoomakaukau oe i kahiko no kou hele pio ana; no ka mea, e olohelohoe auanei, a e mehameha hoi o Nopa, aohe mea noho malaila.

**20** He keiki bipi wahine maikai o Aigupita, ke hele mai nei kona make, mai ka akau mai ka hele ana.

**21** O kona poe paaua iwaenakonu ona, ua like me na keikibipi kupaluia; no ka mea, ua hee lakou, ua auhee pu aku no; aole lakou i ku paa, no ka mea, ua hiki mai ka la o ko lakou poino maluna o lakou, o ka manawa hoi o ko lakou hoopaiia.

**22** E loheia ka leo ona me ko ka nahesa la; no ka mea, e hele mai no lakou me ka poe kaua, a e hele ku e ia ia me na lipi, e like me ka poe kualaau.

**23** E kua lakou i kona ululaau ilalo, wahi a Iehova, ina no e hiki ole ke nana ia ia a pau; no ka mea, ua oi aku ko lakou lehulehu i ko na uhini, hiki ole ke heluia aku.

**24** E hoohilahilaia ke kaikamahine o Aigupita; e haawiia oia iloko o ka lima o na kanaka o ke kukuluakau.

- <sup>25</sup> Ke i mai nei o Iehova o na kaua, ke Akua o ka Israela, penei; Aia hoi, e hoopai no wau ia Amona o No, a me Parao, a me Aigupita, a me ko lakou poe Akua, a me ko lakou poe alii, ia Parao no, a me ka poe a pau e hilinai ia ia.
- <sup>26</sup> A e haawi no wau ia lakou iloko o ka lima o ka poe imi i ko lakou ola, a iloko o ka lima o Nebukaneza, ke alii o Babulona, a iloko o ka lima o kana poe kauwa. A mahope iho e nohoia no ia e like me ka wa kahiko, wahia Iehova.
- <sup>27</sup> Mai makau oe. e ka'u kauwa, e Iakoba, mai weliweli hoi, e ka Israela; no ka mea, aia hoi, e hoola no wau ia oe, mai kahi loihi mai, a me kau poe mamo hoi, mai ka aina mai o ko lakou noho pio ana; a e hoi no ka Iakoba, a e noho hoomaha, a e oluolu no, aohe mea nana e hoomakau ia ia.
- <sup>28</sup> Mai makau oe, e Iakoba, e ka'u kauwa, wahia Iehova; no ka mea, owau pu me oe; no ka mea, e hoopau ana au i ko na aina a pau, kahi a'u i kipaku ai ia oe: aka, aole au e hoopau ia oe, e hoouku pono aku no nae wau ia oe, aole au e hooki loa aku ia oe.

## 47

- <sup>1</sup> KA olelo a Iehova i hiki mai ia Ieremia, i ke kaula, e ku e i na Pilisetia mamua o ko Parao anai ana ia Gaza.
- <sup>2</sup> Ke i mai nei o Iehova penei; Aia hoi, ke pii mai nei na wai, mai ke kukulu akau mai, a e lilo i wai kahe, a e halana mai no maluna

o ka aina, a maluna o kona mau mea a pau e piha'i, o ke kulanakauhale, a me ka poe e noho la maloko; alaila, e uwe ai na kanaka, a e aoa hoi ka poe a pau o noho la ma ka aina.

- <sup>3</sup> No ka halulu o ka hahi ana o na maiuu o kona mau lio, a no ka holo ikaika ana o kona mau kaakaua, a me ke kani ana o kona mau kaa, aole e nana ihopo na makuakane i na keiki, no ka nawaliwali o na lima.
- <sup>4</sup> No ka la e hiki mai ana, e anai loa i na Pilisetia a pau, a e hooki aku, mai Turo, a mai Zidona aku i na mea kokua a pau i koe; no ka mea, e anai loa no o Iehova i na Pilisetia, i ke koena hoi o ka moku o Kapetora.
- <sup>5</sup> Ua hiki mai ka ohule maluna o Gaza, ua hooki loa ia o Asekelona, o ke koena hoi o ke awawa. Pehe la ka loihi o kou okioki ana ia oe iho?
- <sup>6</sup> E ka pahikaua o Iehova, pehe la ka loihi, a moe oe? e hoihoi ae ia oe iho ma kau wahi; e hoomaha, a e noho malie.
- <sup>7</sup> Pehe la e hiki ai ia ia ke moe? No ka mea, ua kauoha o Iehova ia ia e ku e ia Asekelona, i ko kahakai. Malaila kona kuhikuhi ana ia ia.

## 48

- <sup>1</sup> MA ke ku e ia Moaba, ke olelo mai nei o Iehova o na kaua, ke Akua o ka Israela, penei; Auwe oe, e Nebo! no ka mea, ua anaiia oia; ua hoohilahilaia o Kiriataima, a ua pio hoi; ua hoohilahilaia o Misegaba, a ua makau.
- <sup>2</sup> Aole e hookiekie hou ia o Moaba ma Hesebona; na noonoo hewa lakou ia ia; e hele mai.

e hooki kakou i kona aupuni ana. E okiia no hoi oe, e Mademena, e hahai no ka pahikaua ia oe.

<sup>3</sup> He leo no ka uwe ana, mai Horonaima mai, he anaia, a me ka hiolo nui ana.

<sup>4</sup> Ua anaiia o Moaba; ua uwe na kamalii uuku a loheia.

<sup>5</sup> I ka pii ana o Luhita, e pii mai no ka uwe nui ana, a i ka iho ana o Horonaima, ua lohe no na enemi i ka uwe ana o ka make.

<sup>6</sup> E pee, e malama i ko oukou ola, i like auanei oe me ka mea noho wale o ka waonahele.

<sup>7</sup> No ka mea, ua hilinai oe i kau mau hana, a i kou waiwai, e pio auanei oe; a e hele aku ko Kemoso iloko o ke pio ana, me ko lakou poe kahuna, a me ko lakou poe alii.

<sup>8</sup> E hele mai no ka mea anai, maluna o na kulanakauhale a pau, aole pakele kekahi kulanakauhale; e make pu no ke awawa, e lukuia hoi ka papu, o like me ka Iehova i olelo mai ai.

<sup>9</sup> E haawi i eheu no Moaba, i pee aku oia a pakele; no ka mea, e oki loa auanei kona mau kulanakauhale, aohe mea nana e noho maloko.

<sup>10</sup> E poino auanei ka mea hana molowa i ka hana o Iehova: e poino no hoi ka mea keakea i kona pahikaua i ke koko.

<sup>11</sup> Ua moe malie o Moaba, mai kona wa opioipo mai, ua laua malie no maluna o kona maku, aole i ukuhiiia, mai kekahi hue a i kekahi hue, aole hoi ia i hele iloko o ke pio ana,

nolaila i koe mai ia ia kona ono, aole hoi i hoopauia kona ala.

- <sup>12</sup> Nolaila, aia hoi, e hiki mai auanei na la, wahi a Iehova, e hoouna aku ai au io na la i mau mea hoohio, e hoohio ia ia, a e ninini i ko kona mau hue, a o wawahi i ko lakou mau huewai.
- <sup>13</sup> A e hilahila auanei o Moaba ia Kemoso, e like me ka Israela i hilahila ia Betela, i ko lakou mea i hilinai ai.

<sup>14</sup> Peheka oukou olelo ana, He poe kanaka ikaika makou, a koa i ke kaua?

- <sup>15</sup> Ua anaiia o Moaba, a ua pii aku, mai kona kulanakauhale aku, a o kona poe opioipo i waeia, ua iho aku lakou ilalo i ka make, wahi a ke Alii, o Iehova o na kaua kona inoa.
- <sup>16</sup> Ua kokoke no ka poino o Moaba e hiki mai, Ke wikiwiki mai nei kona pilikia.

<sup>17</sup> E uwe oukou ia ia, e ka poe a pau e hoopuni ana ia ia;  
E olelo oukou, e ka poe a pau i ike i kona inoa,  
Nani ka uhia ana o ke kookoo ikaika, a me ka laau maikai!

- <sup>18</sup> E ke kaikamahine e noho la ma Dibona,  
E iho mai oe, mai kou nani mai,  
E noho hoi maloko o ka makewai;  
No ka mea, e pii mai no ka mea anai ia Moaba maluna ou,

E hoohiolo hoi i kou mau pakaua.

- <sup>19</sup> E ka wahine e noho la ma Aroera,  
E ku ma ke alanui, a e nana;  
E ninau aku i ka mea e hee ana,  
A i ka wahine hoi i pakele,  
E i aku, Heaha ka mea i hanaia?

20 Ua hoohilahilaia o Moaba,  
 No ka mea, ua hooauhee loa ia:  
 E aoa, a e uwe aku no hoi,  
 E haiaku ma Arenona, ua anaiia o Moaba,  
 21 Ua hiki mai ka hoopai ana maluna o ka aina  
     papu,  
 Maluna o Holona, a maluna o Iaheza, a maluna  
     hoi o Mepaata,  
 22 A maluna o Dibona, a maluna o Nebo, a maluna  
     hoi o Beta-Dibelataima,  
 23 A maluna o Kiriataima, a maluna o Beta-  
     Gamula, a maluna o Beta-Meona,  
 24 A maluna o Keriota, a maluna o Bozera,  
 A maluna hoi o na kulanakauhale a pau o ka aina  
     o Moaba,  
 Ma kahi loihi aku, a kokoke mai hoi.  
 25 Ua hookiia ka pepeiaohao o Moaba,  
 Ua hai hoi kona lima, wahi a Iehova.  
  
 26 E hoohainu oukou ia ia a ona,  
 No ka mea, ua hookiekie oia imua o Iehova;  
 E haluku hoi o Moaba maloko o kona luai,  
 A e lilo oia i mea e heneheneia'i.  
 27 Aole anei o ka Israela he mea henehene nou?  
 Ua loaa anei oia iwaena o ka poe aihue?  
 No ka mea, mai ka wa mai o kau olelo ana nona,  
 Ua luliluli oe i ke poo.  
 28 E ka poe e noho la ma Moaba,  
 E haalele oukou i na kulanakauhale,  
 E noho hoi oukou ma kahi pohaku,  
 E like hoi oukou me ka manu nunu  
 I hana i kana punana ma na aoao o ka waha o ka  
     lua.  
 29 Ua lohe no makou i ka hookiekie loa ana o  
     Moaba,

(Ua hookano loa oia,)

I kona maoi, a me ka haanui ana,

I kona hooahaha, a me ke kiekie o kona naau.

<sup>30</sup> Ua ike no wau i kona huhu, wahi a Iehova,

A me kona kaena wale ana;

Aole e hiki ke hooko ia mea.

<sup>31</sup> Nolaila, e aoa no wau no Moaba,

A e hooho no wau no Moaba a pau;

E kanikau no hoi i na kanaka o Kireheresa.

<sup>32</sup> Me ke uwe ana o Iazera, e uwe aku au ia oe, e ke  
kumu waina o Sibema.

Ua hala'e la kou mau lala, a kela aoao o ka moana,

Ua hiki aku i ka moana o Iazera.

O ka mea nana e hao, ua haule mai ia maluna o  
kau hua o ke kau,

A maluna hoi o kou pawaina.

<sup>33</sup> Ua laweia ka olioli, a me ka hauoli, mai ka  
mahinaai aku,

A mai ka aina o Moaba aku hoi.

Ua hooki au i ka waina o na luakaomi waina;

Aohe mea nana e hahi me ka hooho,

E lilo ko lakou hooho i hooho ole.

<sup>34</sup> Ua hookiekie lakou i ko lakou leo iluna,

Mai ka uwe ana o Hesebona, a hiki i Eleale, a i  
Iahaza hoi,

A mai Zoara aku a hiki i Horonaima,

Me he keiki bipi wahine la, ekolu ona makahiki;

No ka mea, e pau auanei na wai o Nimerima.

<sup>35</sup> Maloko o Moaba, wahi a Iehova,

E hooki aku au i ka mea e mohai ana ma na wahi  
kiekie,

A me ka mea kuni i ka mea ala no kona poe akua.

<sup>36</sup> Nolaila, e kani no ko'u naau me he ohe kani la  
no Moaba,

A me he ohe kani la e kani ai ko'u naau no na  
 kanaka o Kireheresa;  
 No ka mea, ua lilo ka waiwai ana i loaa'i.  
 37 E ohule auanei kela poo, keia poo,  
 E kahia na umiumi a pau,  
 E okiokiia auanei na lima a pau,  
 A e humeia na puhaka i ka lole inoino.  
 38 He uwe nui ana maluna o na hale a pau o  
 Moaba,  
 A ma kona mau alanui no hoi;  
 No ka mea, ua wawahī au ia Moaba, wahi a  
 Iehova,  
 Me he ipu la i makemake ole ia.  
 39 E uwe aku lakou penei,  
 Nani kona oki loa i ka makau!  
 Nani ko Moaba huli hope ana i ka hilahila!  
 E lilo no o Moaba i mea e akaakaia'i,  
 I mea hoi e makau ai ka poe a pau a puni ona.  
 40 No ka mea, ke i mai nei o Iehova penei,  
 Aia hoi, e lele no oia, me he aito la,  
 A e hohola aku i kona mau eheu maluna o Moaba.  
 41 Ua hoopioia o Keriota, ua hoopioia no na  
 pakaua,  
 A i kela la, e like auanei na naau o na kanaka  
 ikaika o Moaba,  
 Me ka naau o ka wahine nahukuakoko.  
 42 E anaiia auanei o Moaba a lilo i aupuni ole,  
 No ka mea, ua hookiekie oia imua o Iehova.  
 43 E loohia auanei oe i ka makau, a me ka lua, a me  
 ka pahele,  
 E ka mea noho ma Moaba, wahi a Iehova.  
 44 O ka mea holo, mai ka makau aku,  
 E haule no ia ilko o ka lua;  
 A o ka mea pii, mai ka lua mai,

E pau auanei ia i ka pahele:  
 No ka mea, e lawe mai no wau maluna ona,  
     maluna hoi o Moaba,  
 I ka makahiki o ka hoopai ana, wahi a Iehova.

**45** Ku no ka poe i hee ma ka malu o Hesebona no  
     ka ikaika ole;

E puka mai no nae ke ahi mai Hesebona mai,  
 O ka lapalapa ahi hoi maloko mai i Sihona,  
 E hoopau no ia i ka mokuna o Moaba,  
 A me ka piko poo o na kanaka hoohaunaele.

**46** Auwe oe, e Moaba! ua make na kanaka o  
     Kemosa:

No ka mea, ua laweia kau mau keikikane, i pio  
     kane,  
 A me kau mau kaikamahine hoi, i pio wahine.

**47** Aka, e hoihoi no wau i ke pio ana o Moaba,  
 Ke hiki i na la mahope, wahi a Iehova.  
 Oia no ka hoopaiia'na o Moaba.

## 49

**1** NO na keiki a Amona, ke olelo mai nei o Iehova  
 penei; Aole anei a Israela na keiki? Aohe  
 anei ona hooilina? No ke aha la hoi i noho ai  
 o Malekama ma ko Gada? A noho hoi kona  
 poe kanaka ma kona mau kulanakauhale?

**2** Nolaila, aia hoi, e hiki mai auanei na la, wahi  
 a Iehova, Na'u no e hana aku, a e loheia  
 ka hooho kaua ma Raba o ka Amona; A e  
 lilo ia i puu neoneo, A e puhiia kana mau  
 kaikamahine i ke ahi. Alaila, e lilo o Israela  
 i hooilina no ka poe i noho hooilina nona,  
 wahi a Iehova.

- <sup>3</sup> E aoa, e Hesebona, no ka mea, ua anaiia o Ai; E uwe aku, e na kaikamahine o Raba, E kaei oukou ia oukou iho i ke kapa inoino; E kumakena hoi, a e holoholo ma na pa; No ka mea, e hele o Malekama iloko o ke pio ana, O kona poe kahuna a me kana mau ali.
- <sup>4</sup> No ke aha la oe e hookiekie ai ma kou mau awawa? A ma kou awawa e kahe ana, e ke kaikamahine hoihope? Ka mea hilinai ma kou mau waiwai, i ka i ana iho, Owai ka mea hele mai io'u nei?
- <sup>5</sup> Aia hoi, e lawe mai no wau i ka makau maluna ou, Wahi a Iehova, ke Akua o na kaua, Mai ka poe a pau e noho puni ana ia oe; A e kipakuia oukou, kela kanaka, keia kanaka mai kona maka aku. Aohe mea nana e hoihoi mai i ka mea hele hewa.
- <sup>6</sup> A mahope iho, e hoihoi no wau i ke pio ana o na keiki a Amona, wahi a Iehova.
- <sup>7</sup> No Edoma, ke olelo mai nei o Iehova o na kaua penei; Aole anei he akamai i koe ma Temana? Ua oki anei ke ao ana o ka poe ike? Ua hanini anei ko lakou akamai?
- <sup>8</sup> E hee oukou, e huli, e hana i ko oukou noho ana a hohonu, e ka poe noho ma Dedana; No ka mea, e lawe mai no wau i ka poino o Esau maluna ona, I ka manawa a'u e hoopai ai ia ia.
- <sup>9</sup> Ina hele mai iou la ka poe hoiliili huawaina, Aole anei lakou e hookoe i kekahī koena hua? Ina he poe aihue i ka po, Hao iho no lakou, a pau ko lakou makemake.
- <sup>10</sup> Ua hookohana no wau ia Esau, Ua wehe aku no wau i kona mau wahi huna, Aole hiki ia ia

ke pee; Ua oki loa kona hua, a me kona poe hoahanau, O kona poe hoalauna hoi, a oia hoi, aole.

<sup>11</sup> E waiho mai i ka oukou keiki makua ole ia'u, Na'u no lakou e hoola: E hilinai hoi ia'u kou poe wahinekanemake.

<sup>12</sup> No ka mea, ke olelo mai nei o Iehova penei; Aia hoi, o ka poe hoohewa ole ia e inu i ke kiahā, Ua inu loa no lakou: O oe anei ka mea e pakēle loa ana? Aole oe e pakēle, e inu loa no oe.

<sup>13</sup> No ka mea, ua hoohiki no wau ia'u iho, wahī a Iehova, E lilo auanei o Bozera i waonahele, i mea e hoowahawahaia'i, I waoakua hoi, i mea e hoinoia'i, A e lilo no kona mau kulankauhale i mau waoakua mau loa.

<sup>14</sup> Ua lohe no wau i ka lono, mai Iehova mai, Ua hoounaia'ku hoi ka elele i ko na aina e, E akoakoa mai oukou, E hele mai e ku e ia ia, e ku mai hoi e kaua.

<sup>15</sup> No ka mea, aia hoi, e hoolilo no wau ia oe i mea uuku iwaena o na aina, A e hoowahawahaia no oe e na kanaka.

<sup>16</sup> O kou mea makau ia oe a me ka hookiekie o kou naau, Ka mea i hoopunipuniia'i oe, e ka mea e noho la ma na ana pohaku, Ka mea hoi nona na wahī kiekie o ka pali: Ina paha e hana oe i kou wahī punana Ma kahi i like ke kiekie me ko ka aeto, Malaila mai no wau e hoohiolo ai ia oe, wahī a Iehova.

<sup>17</sup> E lilo no hoi o Edoma i waonahele; A e kahaha auanei ka poe a pau e hele ae ma ia wahī, E hoowahawaha hoi no kona mau ino a pau.

- 18 E like me ka hiolo ana o Sodoma, a me Gomora,  
 A me na wahi e pili ana ilaila, wahi a Iehova,  
 Aohe kanaka e noho malaila, Aole hoi e  
 hoomoana na keiki a kanaka ma ia wahi.
- 19 Aia hoi, e pii mai no oia, e like me ka liona mai  
 ka nani o Ioredane mai, E ku e i ka noho  
 ana o ka mea ikaika; Aka i ke amo ana o ka  
 maka, e holo aku no oia, mailaila aku. Owai  
 ka'u mea i waeia, e hoonoho no wau ia ia  
 maluna ona? Owai ka mea like me au nei?  
 Owai hoi ka mea e halawai me au? A owai  
 ke kahuhipa e hiki ia ia ke ku imua o'u?
- 20 No ia mea, e hoolohe oukou i ka manao o  
 Iehova, Ana i manao ai ia Edoma: A me  
 kona noonoo ana i noonoo ku e i na kanaka  
 o Temana. Oiaio no, e uhuki oia ia lakou me  
 na mea liili o ka ohana; Oiaio no, hooneo-  
 neo oia i ko lakou wahi noho a puni lakou.
- 21 I ka halulu o kona haule ana, naueue no ka  
 honua; Ma ke Kaiula, lohea no ka leo o kona  
 uwe ana.
- 22 Aia hoi, e pii mai no oia, a e lele hoi e like me  
 ka aeto, A e hohola aku i kona mau eheu  
 maluna o Bozera; A i kela la, e like auanei ka  
 naau o ka poe ikaika o Edoma Me ka naau o  
 ka wahine i kona nahukuakoko ana.
- 23 No Damaseko. Ua hoohilahilaia o Hamata, a me  
 Arepada hoi, No ka mea, ua lohe lakou i ka  
 lono poino. Ua maule lakou, he weliweli ma  
 ka moana; Aole hiki ia ia ke hoomalielie.
- 24 Ua emi iho o Damaseko, ua huli oia e hee, Ua  
 loohia oia i ka makau, Ua loaa oia i ke nahu  
 kuawili, a me ka eha, me ko ka wahine  
 hanau keiki.

- 25 Nani ke kuu ole ia o ke kulanakauhale kaulana,  
Ke kulanakauhale hoi o ko'u olioli ana!
- 26 Nolaila, e haule ai kona poe kanaka opioipo ma  
kona mau alanui, A e hooki loa ia na kanaka  
kaua a pau i kela la, Wahi a Iehova o na  
kaua.
- 27 E hoaa na wau i ke ahi ma ka pa o Damaseko, A  
e hoopau no ia i na halealii o Benehadada.
- 28 No Kedara, a no na aupuni o Hazora, na mea a  
Nebukaneza, ke alii o Babulona e luku ai, Ke  
i mai o Iehova penei; E ku oukou iluna, E pii  
aku i Kedara, a e luku aku i na kanaka o ka  
hikina.
- 29 E lawe aku no lakou i ko lakou halelewa, a me ka  
lakou poe hipa: E lawe hoi lakou no lakou  
iho i ko lakou mau paku, I ko lakou mau  
kiaha hoi, a me ka lakou poe kamelo; E  
kahea aku no keia poe ia lakou, He makau  
no ma na aoao a puni.
- 30 E holo, a hiki oukou i kahi loihi, E hana oukou  
i ko oukou noho ana ma kahi hohonu, E  
ka poe noho ma Hazora, wahi a Iehova:  
No ka mea, ua noonoo hewa ia oukou o  
Nebukaneza, ke alii o Babulona, A ua imi  
oia i ka manao ku e ia oukou.
- 31 E ku iluna, e hele i ka lahuikanaka waiwai, I ka  
poe noho malama ole, wahi a Iehova; I ka  
poe aole o lakou pani pukapa, aole kikaola,  
Ua noho mehameha hoi.
- 32 E lilo ka lakou poe kamelo i waiwaipio, A me  
ka nui o ka lakou holoholona i waiwai lawe  
wale. E hoopuehu no wau ma na kukulu  
makani a pau, I ka poe e kahi ana i na kihi o

ka umiumi; A e lawe mai no wau i ko lakou poino, mai kela aoao keia aoao a pau, wahi a Iehova.

**33** E lilo no hoi o Hazora i wahi noho no na ilio hihiu, I wahi neoneo mau loa hoi; Aohe kanaka e noho malaila, Aole hoi e hoomoana ke keiki a ke kanaka ma ia wahi.

**34** O ka olelo a Iehova i hiki mai io Ieremia la ke kaula, no Elama, i ka makamua o ke au ia Zedekia ke alii o ka Iuda, i mai la,

**35** Ke olelo mai nei o Iehova o na kaua penei; Euhai no wau i ke kakaka o Elama, I ke poo hoi o ko lakou ikaika.

**36** E lawe mai no hoi au maluna o Elama i na makani eha, Mai na kihi eha o ka lani mai, A e hoopuehu hoi ia lakou ma ia mau makani a pau; Aohe aina e koe, kahi e hiki ole aku ai ka poe kuewa o Elama.

**37** No ka mea, e hooweliweli aku au ia Elama imua o ko lakou poe enemi, Imua hoi o ka poe imi i ko lakou ola: A lawe aku no hoi au i ka hewa maluna o lakou, I ka wela no o ko'u ukiuki, wahi a Iehova: Ae hoouna aku au i ka pahikaua mahope o lakou, A hoopau wau ia lakou.

**38** E hoonoho wau i ko'u nohoalii ma Elama, A e anai aku hoi, mai ia wahi aku, i ke alii a me na luna, Wahi a Iehova.

**39** A hiki i na la mahope, e hoihoi no wau i ke pio ana o Elama, wahi a Iehova.

## 50

- <sup>1</sup> KA olelo a Iehova i olelo ai no Babulona, a no ka aina o ko Kaleddea, ma o Ieremia la, ke kaula.
- <sup>2</sup> E hai aku oukou iwaena o na lahuikanaka, A kala aku hoi, e kau i ka hae; E kala aku, mai huna, e i aku hoi, Ua hoopioia o Babulona, ua hoohilahilaia o Bela, Ua uhaiia o Merodaka, ua hoohilahilaia kona mau akua wahahee, Ua ubaiia kona mau kii.
- <sup>3</sup> No ka mea, ke pii mai nei ka lahuikanaka, mai ka akau mai, e ku e ia ia, Nana no e hoolilo i ka aina i wahia alaneo, Aole noho kekahi mea malaila; Mai ke kanaka a i ka holoholona, e neenee, a e hele aku no.
- <sup>4</sup> Ia mau la, a i kela manawa, wahi a Iehova, E hele mai no na mamo a Israela, O lakou a me na mamo a Iuda pu, E hele no lakou, a e uwe iho i ko lakou hele ana; A e imi ia Iehova i ko lakou Akua.
- <sup>5</sup> E ninau no lakou i ke ala e hiki aku ai i Ziona, Me na maka o lakou e huli ana ilaila, i ka i ana iho, Ea, e hoopili kakou ia kakou iho ia Iehova Ma ka berita mau loa nalowale ole i ka poina.
- <sup>6</sup> O ko'u poe kanaka, he poe hipa nalowale lakou; Na ko lakou mau kahu i alakai hewa ia lakou, Ua kuu wale aku na kahu ia lakou ma na mauna; Ua hele lakou, mai kekahi puu, a i kekahi puu, Ua poina ia lakou ko lakou wahi e hoomaha'i.
- <sup>7</sup> O na mea a pau i halawai me lakou, Ua ai no ia poe ia lakou; Olelo ae la ko lakou poe enemi, Aole makou e hewa, No ka mea, ua lawe hala lakou ia Iehova, I kahi i noho ai o ka

hoopono, Ia Iehova hoi, i ka Mea i lana ai ka manao o ko lakou poe makua.

<sup>8</sup> E puka aku oukou mai waena aku o Babulona, A e hele aku hoi mawaho o ka aina o ko Kaledea, E like hoi oukou me na kao kane imua o ka poe kao.

<sup>9</sup> No ka mea, aia hoi, e hoala no wau, a e alakai ku e ia Babulona I na lahuikanaka nui, mai ka aina ma ka akau mai; A e hoonohonoho lakou ia lakou iho e kaua ia ia, Alaila, e lawe pio ia oia; E like auanei ko lakou mau pua me ko ke kanaka ikaika, Aole e hoihoi nele a make hewa ia mai.

<sup>10</sup> A e lilo o Kaledea i waiwai pio: E ana auanei ka poe lawe pio i kana, wahi a Iehova.

<sup>11</sup> No ka mea, lealea no oukou, no ka mea hoi, hauoli oukou, E ka poe hao wale i ko'u hooilina; No ka mea, ua lelele olioli oukou, me he bipi wahine ai i ka mauu, A ua uhu-uhu oukou e like me na lio kane.

<sup>12</sup> E hoohilahilaia auanei kou makuwahine; E hoopalaimaka ka mea nana oe i hanau: Aia hoi, e lilo no ka welelau o na aina i waonahele, I aina maloo hoi, a i auakua.

<sup>13</sup> No ka huhu o Iehova, aole ia e nohoia, Aka, e alaneo loa auanei oia; E kahaha ka naau o ka poe a pau e maalo ae i Babulona, E hoowahawaha lakou no kona mau ino a pau.

<sup>14</sup> E hoonohonoho oukou ia oukou iho e kaua ia Babulona a puni: E ka poe a pau, e lena i ke kakaka, E pana aku ia ia, mai aua i na pua; No ka mea, ua lawehala oia ia Iehova.

- 15 E hooho ku e ia ia a puni, ua haawi oia i ka lima; Ua hiolo kona mau kia, ua wawahiiia kona mau pa; No ka mea, o ka ukiuki no ia o Iehova: E hoopai oukou ia ia, Me kana i hana'i, pela oukou e hana aku ai ia ia.
- 16 E hooki aku i ka mea luluhua, mai Babulona aku, A me ka mea lawelawe i ka pahi oki palaoa i ka manawa hoiliili ai. E huli no ke kanaka i kona poe iho, mai ka maka aku o ka pahikaua luku, A e holo no ke kanaka i kona aina iho.
- 17 He poe hipa puehu o ka Israela, Ua kipaku na liona ia ia; O ke alii o Asuria ka i ai mua ia ia; A mahope na keia Nebukaneza, ke alii o Babulona i uhai i kona mau iwi.
- 18 Nolaila, ke olelo mai nei o Iehova o na kaua, ke Akua o ka Israela penei; Aia hoi, e hoopai no wau i ke alii o Babulona, a me kona aina, Me ka'u i hoopai ai i ke alii o Asuria.
- 19 A e lawe hou mai no wau i ka Israela i kona wahi e noho ai, A e ai no ia maluna o Karemela, a me Basana, A e aua no kona naau maluna o ka mauna o Eperaima, a me Gileada.
- 20 A ia mau la, a i kela manawa, wahi a Iehova, E imi wale ia ka hewa o ka Israela, aohe hewa, A me na hala o ka Iuda, aole ia e loaa; No ka mea, e kala aku au i ko ka poe a'u e hookoe ai.
- 21 E pii aku oe e ku e i ka aina o Merataima; E ku e ia wahi, a e ku e i ka poe e noho la ma Pekoda; E luku aku, a e hooki loa iho mahope o lakou, wahi a Iehova, E hana hoi

- e like me na mea a pau a'u i kauoha aku ai ia oe.
- <sup>22</sup> He walaaau no ke kaua ma ka aina, a he luku nui hoi.
- <sup>23</sup> Nani ka wawahia a nahaha o ka hamare o ka honua a pau! Nani hoi ka lilo ana o Babulona i wahi alaneo iwaena o na aina!
- <sup>24</sup> Ua hoopahele au ia oe, a ua paa hoi oe, E Babulona, a ike ole nae oe: Ua loaa no oe, a ua paa hoi, No ka mea, ua hooikaika oe ma ke ku e ia Iehova.
- <sup>25</sup> Ua wehe o Iehova i kona waihona mea kaua, A ua lawe mai iwaho i na mea kaua o kona ukiuki; No ka mea, o ka hana no keia a ka Haku, a Iehova o na kaua, ma ka aina o ko Kaledaea.
- <sup>26</sup> E hele ku e mai oukou ia ia, mai kela kih Mai, E wehe i kona mau halepapa; E houka ae ia ia e like me na puu, E anai loa aku ia ia, mai hookoe i kekahī mea.
- <sup>27</sup> E luku aku i kona mau bipi a pau, E kuu ia lakou e iho ilalo i ka lukuia: Auwe hoi lakou! no ka mea, ua hiki mai ko lakou la, Ka manawa hoi o ko lakou hoopaiia.
- <sup>28</sup> Ka leo o ka poe holo a pakeie mawaho o ka aina o Babulona, E hai aku ma Ziona i ka hoopai ana o Iehova, o ko kakou Akua, I ka hoopai ana no kona luakini.
- <sup>29</sup> E kena i ka poe pana e ku e ia Babulona; E ka poe a pau e lena ai ke kakaka, E hoomoana ku e ia ia a puni, Mai hoopakele i kekahī mea olaila; E uku aku ia ia e like me kana hana ana; E like me na mea a pau ana i hana'i, Pela e hana aku ai ia ia: No ka mea,

ua hookiekie oia e ku e ia Iehova, E ku e hoi i ka Mea hemolele o ka Israela.

**30** Nolaila, e haule ai kona poe kanaka opiopio ma na alanui, A i kela la, e anaiia kona poe kanaka kaua a pau, Wahi a Iehova.

**31** Aia hoi, Owau no ka i ku e ia oe, e ka mea hookiekie loa, Wahi a ka Haku, Iehova o na kaua: No ka mea, ua hiki mai kou la, O ka manawa hoi a'u e hoopai aku ai ia oe.

**32** E okupe no ka poe hookiekie loa, a e hina hoi, Aohe mea nana e hoala ia ia: E hoaa no wau i ke ahi ma kona mau kulanakauhale, A e hoopau no ia i na mea a pau a puni ona.

**33** Ke olelo mai nei o Iehova o na kaua penei; Ua hookaumaha pu ia na mamo a Israela, a me na mamo a Iuda; O ka poe a pau i lawe pio ia lakou, Hoopaa loa no ia poe ia lakou; Hoole hoi lakou, aole e hookuu i ko'u poe kanaka,

**34** Ua ikaika no ko lakou Kalahaia, o Iehova o na kaua kona inoa; Ia lakou e hoopiiia nana lakou e hooponopono io, I mea e hoomaha'i oia i ka aina, A e hoopihoihoi ai i ka poe e noho la ma Babulona.

**35** He pahikaua no, aia maluna o ko Kaledea, wahi a Iehova, A maluna hoi o ka poe e noho la ma Babulona, A maluna o kona poe alii, a maluna o kona poe akamai.

**36** He pahikaua, aia maluna o ka poe wahahee, A e lapuwale auanei lakou: He pahikaua, aia maluna o kona poe kanaka ikaika, A e makau auanei lakou.

- 37 He pahikaua, aia maluna o na lio o lakou, A maluna hoi o ko lakou mau kaakaua, A maluna o na malihini mawaenakonu ona; A e like auanei lakou me na wahine. He pahikaua, aia maluna o ko lakou waihona waiwai, A e haoia lakou.
- 38 Ua pio no kona wai, a e maloo loa auanei ia: No ka mea, he aina kii kalaiia no ia, A ua pupule lakou mamuli o ko lakou akua wahahee.
- 39 No ia mea, e noho no na holoholona hihiu o ka waonahele malaila, A me na holoholona hihiu o na mokupuni, A e noho hoi na pueo maloko olaila; E kanaka ole auanei ia aina, a i ka manawa pau ole; E noho ole ia hoi ia, a ia hanauna aku, ia hanauna aku.
- 40 Me ka ke Akua i hoohiolo ai ia Sodoma a me Gomora, A me kona mau wahi e kokoke mai ana, wahi a Iehova; Pela no, aole e noho kekahi kanaka malaila, Aole e hoomoana ke keiki a ke kanaka maloko o ia wahi.
- 41 Aia hoi, o hele mai no kekahi lahuikanaka mai ke kukulu akau mai, A o hoalaia ka lahuikanaka nui, a me na'lii he lehulehu, Mai na mokuna mai o ka honua.
- 42 E paa no ia lakou ke kakaka a me ka ihe; Ua lokoino lakou, aole lakou e lokomaikai mai; E halulu no ko lakou leo, e like me ke kai, E holo no lakou maluna o na lio i hoonohono-hoia, E like me kanaka no ke kaua, E ku e ia oe, e ke kaikamahine o Babulona.
- 43 Ua lohe ke alii o Babulona i ka lono no lakou, A ua nawaliwali kona mau lima: Loohia no

oia i ka pilikia, a me ka nahu kuakoko, Me ko ka wahine hanau keiki la.

<sup>44</sup> Aia hoi, e pii mai no ia e like me ka liona mai ka nani o Ioredane mai, A iloko o kahi noho o ka mea ikaika: Aka, i ka amo ana o ka maka, e holo aku no lakou mai laila aku, Owai ka mea i waeia, e hoonoho wau ia ia maluna ona? Owai ka mea like me au nei? Owai hoi ka mea e halawai me au? A owai ke kahuhipa e hiki ia ia ke ku imua o'u?

<sup>45</sup> No ia mea, e hoolohe oukou i ka manao o Iehova, Ana i manao ai ia Babulona; A me kona noonoo ana i noonoo ai i ka aina o ko Kaledea: Oiaio no, e uhuki oia ia lakou me na mea liilii o ka ohana, Oiaio no, e hooneoneo no oia i ko lakou wahi noho a puni lakou.

<sup>46</sup> Naueue no ka honua i ka halulu no ke pio ana o Babulona, Ua lohea kona uwe ana ma na aina e.

## 51

<sup>1</sup> KE i mai nei o Iehova, penei; Aia hoi, e hoala no wau i ka makani luku e ku e ia Babulona, E ku e hoi i ka poe e noho la iwaenakonu, Ka poe i ala ku e mai ia'u.

<sup>2</sup> E hoouna aku au i na malihini i Babulona, A e hoopuehu lakou i kona, a e ninini aku i ko kona aina; No ka mea, e ku e no lakou ia ia a puni i ka la poino.

<sup>3</sup> E lena ke kakaka o ka mea pana, E ku e i ka mea i hoolena i kona; E ku e i ka mea hookiekie maloko o kona paleumaumaunahi;

- Mai hookoe i kona poe kanaka opio, E  
luku loa aku i kona mau kaua a pau.
- <sup>4</sup> E hina no ka poe make ma ka aina o ko Kaledaea,  
A e houia ma kona mau alanui.
- <sup>5</sup> No ka mea, ua haalele ole ia ka Israela, A o ka  
Iuda hoi e kona Akua e Iehova o na kaua; Ua  
piha nae ko lakou aina i ka lawehala imua o  
ka Mea Hemolele o ka Israela.
- <sup>6</sup> E holo oukou mai waenakonu aku o Babulona, E  
hoopakele kela kanaka keia kanaka i kona  
ola iho: Mai noho oukou a lukuia iloko o  
kona hewa, No ka mea, o ka manawa keia  
o ko Iehova ukiuki; Nana no e hoouku aku  
ia ia
- <sup>7</sup> He wahi kiahā gula o Babulona ma ka lima o  
Iehova, O ka mea ia i ona'i ka honua a pau:  
Ua inu ko na aina i kona waina, Nolaila i  
pupule ai ko na aina.
- <sup>8</sup> Ua haule hoohikilele o Babulona, a ua anaiia; E  
aoa nona, e kii hoi i wahi nini no kona eha,  
Ina paha e hoolaia oia.
- <sup>9</sup> Hoola aku no makou ia Babulona, aole ia i ola: E  
haalele ia ia, e hele hoi kela mea keia mea  
o kakou i kona aina iho; No ka mea, ua pa  
aku kona hoopaiia i ka lani, Ua hapaiia hoi,  
a i na aouli.
- <sup>10</sup> Ua hoopuka mai o Iehova i ko kakou pono; E  
hele mai hoi, e hai aku kakou ma Ziona i ka  
hana a Iehova ko kakou Akua.
- <sup>11</sup> E anai i na pua, e lalau i na palekaua; Ua  
hooikaika o Iehova i ka manao o na'lii o  
Media: No ka mea, he manao ku e kona ia  
Babulona e luku ia wahi; No ka mea, o ka

hoopai ana ia o Iehova, O kana hoopai ana hoi, no kona luakini.

- <sup>12</sup> E kau i ka hae ma na pa o Babulona, E hoomahuahua i ka poe kaua, E hoonohonoho i na kiai, E hoomakaukau i ka poe hoohalua; No ka mea, ua noonoo o Iehova, a ua hana hoi i na mea ana i olelo ku e ai i ka poe e noho la ma Babulona.
- <sup>13</sup> E ka mea e noho la ma na wai nui, Ka mea waiwai nui hoi, Ua hiki mai kou hope, a me ke ana o kou hao ana.
- <sup>14</sup> Ua hoohiki o Iehova o na kaua ia ia iho, Oiaio, e hoopihā no wau ia oe i na kanaka e like me na enuhe, A e hookiekie lakou i ka hooho ku e ia oe.
- <sup>15</sup> Ua hana oia i ka honua i kona mana, Ua hookumu oia i ke ao nei i kona akamai, A ua uhola'i i na lani i kona ike.
- <sup>16</sup> I ka poha ana o kona leo, Nui na wai ma na lani; Oia ka mea e pii aku ai ka ohu, mai na kihi ae o ka honua: Nana no i hana ka uwila, me ka ua, A hoopuka mai la oia i ka makaui, Mailoko mai o kona waihona waiwai.
- <sup>17</sup> Me he holoholona la na kanaka a pau ma ka ike, Ua hoohilahilaia na mea hoohehee kala a pau, ma na kii i hooheheeia; No ka mea, he wahahēe kona kii hooheheeia, Aohe hanu iloko o lakou.
- <sup>18</sup> He lapuwale lakou, he hana na ka wahahēe; I ko lakou wa e hoopaiia mai ai, e make no lakou.
- <sup>19</sup> Aole i like ka Puu o Iakoba me lakou, No ka mea, nana no i hana na mea a pau; O ka Israela

ke kookoo o kona hooilina; O Iehova o na  
kaua kona inoa.

<sup>20</sup> He hamare no oe no'u, A me ko'u mau mea kaua  
e kaua'i: No ka mea, ia oe no wau e wawahi  
ai i na aina, A ia oe no hoi e luku aku ai au i  
na aupuni;

<sup>21</sup> Ia oe no wau e uhai i ka lio, A me kona mea nana  
e holo; Ia oe no wau e uhai ai i ke kaakaua,  
A me kona mea nana e holo;

<sup>22</sup> Ia oe no wau e uhai ai i ke kane a me ka wahine;  
Ia oe no hoi au e uhai ai i ka elemakule a me  
ka mea opiopio; A ia oe no e uhai ai au i ke  
kanaka opiopio, a me ke kaikamahine:

<sup>23</sup> Ia oe no e uhai aku ai au i ke kahuhipa, a me  
kona ohana; Ia oe no wau e uhai aku ai i ke  
kauaka mahiai, A me kona mau bipi kauo;  
A ia oe no wau e uhai aku ai i na kiaaina, A  
me ko lakou poe alii.

<sup>24</sup> A maluna o Babulona, a maluna o ka poe e noho  
la ma Kaledea, E hoihoi no wau i ka hewa a  
pau a lakou i hana'i, Ma Ziona, imua o kou  
mau maka, wahi a Iehova.

<sup>25</sup> Aia hoi, owau ka i ku e ia oe, e ka mauna  
hoomake, Wahi a Iehova; Ka mea i anai i ka  
honua a pau: A e kakauha aku au i ko'u lima  
maluna ou, A e olokaa aku au ia oe ilalo, mai  
na pohaku aku, A e hoolilo au ia oe i mauna  
a.

<sup>26</sup> Aole hoi lakou e lawe i kekahi pohaku ou i  
pohaku kihi, Aole hoi i pohaku hookumu:  
Aka, e neoneo mau loa aku no oe, wahi a  
Iehova.

- 27 E kau oukou i ka hae ma ka aina, E puhi i ka pu iwaena o ko na aina, E hoomakaukau i ko na aina, e ku e ia ia; E kena i na aupuni o Arerata e ku e ia ia, Ia Mini, a me Asekenaza; E hoonoho i alihī kaua e ku e ia ia; E hoouna i na lio e like me na enuhe huluhulu.
- 28 E hoomakaukau ku e ia ia i ko na aina a me ua'lii o ko Media, I kona poe kiaaina hoi a me kona mau luna, A me ka aina a pau o kona aupuni.
- 29 E haalulu no ka aina, a e mihi hoi; No ka mea, e hanaia maluna o Babulona na manao a pau o Iehova, E hoolilo i ka aina o Babulona i wahi neoneo, Me ka mea ole nana e noho.
- 30 Ua haalele na kanaka ikaika o Babulona i ke kaua, Ua noho lakou ma na puu kaua; Ua pio hoi ko lakou ikaika, Ua like no hoi lakou me na wahine; Ua hoopau lakou i ko lakou wahi noho i ke ahi, Ua uhaiia kona mau kikaola.
- 31 E holo auanei kekahī luna e halawai me ka kekahī luna, A me kekahī elele e halawai me kekahī elele, E hai aku i ke alii i ke pio ana o ke kulanakauhale ma kekahī pea:
- 32 I ka lilo ana o na alanui kiaiia, A ua hoopau no lakou i na ohe i ke ahi, Ua auhee hoi na kanaka kaua.
- 33 No ka mea, ke olelo mai nei o Iehova o na kaua, ke Akua o ka Israela penei; Ua like ke kaikamahine o Babulona me kahi hahi palaoa, Ua hiki mai ka manawa e hahi ai ia ia; He manawa iki e koe, a hiki mai kona hoiliili ai ana.

- 34** Ua ai mai o Nebukaneza ke alii o Babulona ia'u,  
 A ua hooki loa mai ia'u, Ua hoolilo mai oia  
 ia'u i ipu mea ole iloko, Ua moni mai oia ia'u,  
 e like me ka moonui, Ua hoopihia oia i kona  
 opu i ka'u mea maikai, Ua kipaku mai oia  
 ia'u.
- 35** Maluna hoi o Babulona, ka hookaumahaia o'u a  
 me ko'u kino, Wahi a ka mea e noho la ma  
 Ziona; A o ko'u koko hoi maluna o ka poe e  
 noho la ma Kaledea, Wahi a Ierusalema.
- 36** Nolaila, ke olelo mai nei o Iehova penei; Aia hoi,  
 na'u no e hooponopono i kou hoopiiia, Na'u  
 hoi e hoopai aku nou; A e hoomaloo no wau  
 i kona moana, A e hoopio no hoi au i kona  
 waipuna.
- 37** A e lilo o Babulona i mau puu, He wahi noho  
 no na iliohihiu, He mea e kahaha ai, a e  
 hoowahawaha ai hoi, Me ka mea ole nana  
 e noho.
- 38** E uwo pu no lakou e like me na liona, A e hoonui  
 hoi i ko lakou leo e like me na keiki liona.
- 39** Ia lakou e wela'i, e hana no wau i ko lakou  
 ahainu, A e hooona aku wau ia lakou, i mea  
 e lealea ai lakou, A e moe no lakou i ka  
 hiamoe mau loa, Aole lakou e ala hou, wahi  
 a Iehova.
- 40** E hooiho aku au ia lakou e like me na keikihipa  
 i ka make, E like hoi me na hipa kane, a me  
 na kaokane.
- 41** Nani ka hopuia o Sesaka! A ua hoopioia hoi ka  
 mea nani o ka honua a pau! Nani ka lilo ana  
 o Babulona i mea kupaiianaha iwaena o na  
 aina!

- 42 Ua pii mai ke kai maluna o Babulona; Ua uhia  
oia i ka nui o kona mau ale.
- 43 Ua lilo kona mau kulanakauhale i wahi neoneo,  
He aina maloo hoi, a he waonahele, He aina  
noho ole ia e kekahī kanaka, Aole hoi e hele  
ae ke keiki a ke kanaka ilaila.
- 44 Na'u no e hoopai aku ia Bela ma Babulona, A e  
hoopuka aku no hoi au iwaho o kona waha,  
I ka mea ana i moni ai; Aole e akoakoa hou  
mai na lahuikanaka io na la; Oia, e hiolo ana  
ka pa o Babulona.
- 45 E ko'u poe kanaka, e hele oukou maiwaena aku  
ona, A e hoopakele kela kanaka keia kanaka  
i kona ola iho, Mai ka ukiuki nui o Iehova;
- 46 O maule auanei ko oukou naau, a makau hoi  
oukou, no ka lono e loheia ana ma ia aina;  
E hiki mai no ka lono i kekahī makahiki, A  
he lono hou i kekahī makahiki, He haunaele  
ma ka aina, O kekahī alii e ku e ana i kekahī  
alii.
- 47 Nolaila, aia hoi, e hiki mai ana na la, E hoopai  
aku ai au i na kii kalaiia o Babulona; A e  
hoohilahilaia kona aina a pau, A e haule hoi  
iwaenakonu ona, kona poe a pau i houia.
- 48 Alaila e hookani olioli ai ka lani, a me ka honua,  
a me na mea a pau oloko, no Babulona; No  
ka mea, mai ke kukulu akau mai e hele mai  
ai io na la ka poe hao wale, wahi a Iehova.
- 49 Me Babulona i hoohina'i i ka poe i houia o ka  
Iseraela, Pela no ma Babulona e hina'i ka  
poe i houia o ka honua a pau.
- 50 E hele oukou, e ka poe i pakele i ka pahikaua,  
Mai ku malie; e hoomanao ia Iehova

ma kahi loihi aku, E hoomanao hoi ia Ierusalema iloko o ko oukou naau.

- 51 Ua hoohilahilaia makou, no ka mea, ua lohe makou i ka hoowahawaha: Ua uhiia ko makou maka i ka hilahila; No ka mea, ua hiki mai na malihini iloko o na keenakapu o ka hale o Iehova.
- 52 No ia mea, aia hoi, e hiki mai auanei na la, wahi a Iehova, E hoopai aku ai au i kona mau kii kalaiia; A ma kona aina a puni e kaniuhu ai no ka poe i oia.
- 53 Ina paha i pii aku o Babulona a i ka lani, A ina i hoopaa loa oia i na puu kaua o kona ikaika, E hele aku nae ka poe hao wale, mai o'u aku nei a io na la, wahi a Iehova.
- 54 Mai Babulona mai, kui mai ka lono no ka uwe ana, A me ka luku nui ia, mai ka aina o ko Kaledea mai.
- 55 No ka mea, ua hao wale o Iehova ia Babulona, A ua hooki hoi i ka walaau nui mai ona aku; A halulu kona mau ale e like me na wai nui, Kani no ka leo o kona walaau.
- 56 No ka mea, ua hele mai ka mea hao wale maluna ona, Maluna hoi o Babulona; Ua lawepioia kona poe kanaka ikaika, Ua hai hoi na kakaka a pau o lakou; No ka mea, o Iehova ke Akua hoopai, Oiaio no, e hoopai oia.
- 57 A e hooona aku au i kona poe alii, a me kona poe akamai, I kona poe kiaaina, a me kona mau luna, a me kona poe kanaka ikaika: A e moe no lakou i ka hiamoe mau loa, Aole lakou e ala hou, wahi a ke alii, Nona ka inoa, o Iehova o na kaua.

- 58 Ke olelo mai nei o Iehova o na kaua; E oiaio no e hoohiolo loa ia na pa nui o Babulona, A e puhiia i ke ahi kona mau pukapa kiekie; E hooikaika na kanaka a make hewa ka luhi, A o na lahuikanaka hoi, no ke ahi, A e maloeloe lakou.
- 59 O ka olelo a Ieremia a ke kaula i kauoha'i ia Seraia, i keiki a Neria, i ke keiki a Maaseia, i ka manawa ana i hele pu aku ai i Babulona me Zedekia, ke alii o ka Iuda, i ka makahiki aha o kona noho alii ana. He luna noho malie o ua Seraia nei.
- 60 A kakau no Ieremia iloko o ka buke i ka hewa a pau e hiki mai ana maluna o Babulona, i keia mau olelo a pau hoi i palapalaia no Babulona.
- 61 Olelo mai la o Ieremia ia Seraia, A hiki aku oe i Babulona, a ike, a heluhelu hoi i keia mau olelo a pau;
- 62 Alaila, e i aku oe, E Iehova, ua olelo ku e mai oe i keia wahine, e hooki iho, i mea e koe ole ai kekahi mea iloko ona, aohe kanaka, aohe holoholona, aka, e neoneo mau loa aku no.
- 63 A hiki i ka manawa e hoopau ai oe i ka heluhelu ana i keia buke, alaila e nakinaki i ka po-haku me ka buke, a e hoolei aku iwae-nakonu o Euperate.
- 64 A e i aku oe, Pela e poho ai o Babulona, aole o ala hou, mai ka hewa a'u e lawe ai maluna ona. A e maloeloe lakou. A ia nei na olelo a Ieremia.

## 52

<sup>1</sup> HE iwakaluakumamakahina na makahiki o

Zedekia, ia ia i hoomaka ai e noho aupuni; a noho aupuni iho la oia ma Ierusalema, he umikumamakahī makahiki. O Hamutala ka inoa o kona makuwahine; o ke kaikamahine ia a Ieremia no Libena.

<sup>2</sup> Hana hewa iho la oia imua o na maka o Iehova, e like me na mea a pau a Iehoiakima i hana'i.

<sup>3</sup> No ka ukiuki o Iehova i hiki ai keia mau mea ma Ierusalema, a ma Iuda, a kipaku aku oia ia lakou mai kona alo aku, a kipi o Zedekia i ke alii o Babulona.

<sup>4</sup> A hiki i ka makahiki eiwa o ka makahiki o kona noho aupuni ana, i ka malama umi, i ka umi o ka la o ka malama, hele mai la o Nebukaneza, ke alii o Babulona, oia, a me kona poe kaua a pau e ku e ia Ierusalema, a hoomoana ku e oia ia wahi, a hana iho la i mau puu kaua a puni ia.

<sup>5</sup> Pela i hoopilikiaia ke kulanakauhale a hiki i ka makahiki umikumamakahī o ke alii o Zedekia.

<sup>6</sup> A i ka malama aha, i ka iwa o ka la o ka malama, nui loa ka wi iloko o ke kulanakauhale, aohe berena no na kanaka o ka aina.

<sup>7</sup> Alaila wahia ke kulanakauhale, a hee na kanaka kaua a pau, a puka aku la iwaho o ke kulanakauhale, ma ke ala o ka pukapa mawaena o na pa elua, aia ma ka mahinaai o ke alii: (ua puni hoi ke kulanakauhale i ko Kaledēa;) a hele ae la lakou ma ke ala o ka papu.

<sup>8</sup> Alaila, hahai ka poe kaua o ko Kaledēa, mahope o ke alii, a loaa o Zedekia ia lakou ma na

papu o Ieriko, a ua hoopuehuia'ku la kona  
poe kaua, mai ona aku la.

- <sup>9</sup> Alaila, hoopio lakou i ke alii, a lawe aku la ia ia i  
ke alii o Babulona, ma Ribela, ma ka aina o  
Hamata; a malaila oia i hoohewa'i ia ia.
- <sup>10</sup> A pepehi ke alii o Babulona i na keiki a Zedekia  
imua o kona maka; a pepehi no hoi oia i na  
luna a pau o ka Iuda ma Ribela.
- <sup>11</sup> A poalo iho la oia i na maka o Zedekia, a hoopaa  
no hoi ke alii o Babulona ia ia i na kupe  
keleawe, a lawe aku la ia ia i Babulona, a  
waiho aku la ia ia iloko o ka halepaahao, a i  
ka la o kona make ana.
- <sup>12</sup> A i ka malama elima, i ka umi o ka la o  
ka malama, oia hoi ka makahiki umiku-  
mamaiwa o Nebukaneza, ke alii o Babu-  
lona, alaila hele mai la i Ierusalema o Neb-  
uzaredana, ka lunakaua, nana i hookauwa  
na ke alii o Babulona.
- <sup>13</sup> A puhi iho la oia i ka hale o Iehova, a me ka hale  
o ke alii, a me na hale a pau o Ierusalema,  
a me na hale o ka poe koikoi, puhi no oia ia  
mau mea i ke ahi.
- <sup>14</sup> A o na kanaka kaua a pau o ko Kaledea, ka poe  
mamuli o ka lunakaua, hoohiolo lakou i na  
pa a pau o Ierusalema a puni.
- <sup>15</sup> Alaila, lawe pio aku la o Nebuzaredana, ka  
lunakaua i na kanaka hune, a me na kanaka  
i koe ma ke kulanakauahale, a me ka poe i  
hele, na mea hoi i hele i ke alii o Babulona,  
a me ka nui o ka poe i koe.

- 16 Waiho no nae o Nebuzaredana, ka lunakaua i kekahi poe hune o ka aina i poe paipai kumuwaina, a i poe mahiai hoi.
- 17 Wawahī no hoi ko Kaledea i na kia keleawe iloko o ka hale o Iehova, a me na poho a me na ipu auau keleawe, ka mea maloko o ka hale o Iehova, a lawe lakou i ke keleawe a pau o ia mau mea i Babulona,
- 18 A lawe aku no hoi lakou i na ipu wai nui, a me na kopelehu, a me na upa kukui, a me na paipu a me na puna a me na ipu keleawe a pau, na mea lawelawe o lakou.
- 19 A lawe aku no hoi ka lunakaua i na ipu, a me na paahi, a me na paipu, a me na ipu wai nui, a me na ipukukui manamana, na puna, a me na kiahā; o ka mea gula, he gula, a o ka mea kala, he kala.
- 20 I na kia elua, hookahi ipu auau, he umikumamalua bipi kane na mea malalo iho o na poho, na mea a ke alii a Solomona i hana'i maloko o ka hale o Iehova. Pau ole ke keleawe o keia mau mea hana a pau, ke kaupaonaia.
- 21 A o na kia, he umikumamawalu kubita ke kiekie o kekahi kia, a puni hoi ia i ke apo, he umikumamalua kubita; eha lima kona manoanoa; ua kawaha.
- 22 A he papale keleawe maluna ona. Elimā kubita ke kiekie o kekahi papale, me ka mea ulana pukapuka, a me na pomegerane maluna o na papalekia a puni, ho keleawe a pau loa. A ua like hoi me neia ka lua o ke kia, a me na pomegerane.

- 23 A he kanaiwakumamaono na pomegerano o kekahi aoao; o na pomegerane a pau ma ka mea ulana pukapuka, hookahi haneri a puni.
- 24 A lawe aku la ka lunakoa ia Seraia ke kahuna nui, a ia Zepania ke kahuna lua, a me na kiaipuka ekolu.
- 25 Lawe aku la hoi oia mai ke kulanakauhale aku i kekahi luna i poaia, i hoonohoia maluna o na kanaka kaua, a i ehiku kanaka punahele o ke alii, na mea i loaa ma ke kulanakauhale; a i ke kakauolelo o ka lunakaua, nana i alakai i na kanaka o ka aina i ke kaua; a me na kanaka o ka aina he kanaono i loaa ma ke kulanakauhale.
- 26 A lawe aku la o Nebuzaradana ka lunakoa ia lakou i ke alii o Babulona ma Ribela.
- 27 Pepehi aku la ke alii o Babulona ia lakou, a make lakou ia ia ma Ribela i ka aina o Hamata. A ua laweia aku la o ka Iuda mai ko lakou aina aku.
- 28 Oia na kanaka a Nebukaneza i lawe pio aku ai: i ka hiku o ka makahiki, ekolu tausani na Iudaio, a me ka iwakaluakumamakolu.
- 29 I ka makahiki umikumamawalu o Nebukaneza, lawe pio aku la oia mai Ierusalema aku, i ewalu haneri me kanakolukumamalua kanaka.
- 30 I ka makahiki iwakaluakumamakolu o Nebukaneza, lawe pio aku la o Nebuzaradana ka lunakaua i ehiku haneri me kanahakumamalima kanaka o na Iudaio. A oia poe kanaka a pau, eha tausani lakou me na haneri keu eono.

- 31 A i ka makahiki kanakolukumamahiku, o ke pio ana o Iehoiakina, ke alii o ka Iuda, i ka malama umikumamalua, i ka la iwakalukumamalima o ka malama, o Evila Mero-daka, ke alii o Babulona, i ka makahiki mua o kona noho aupuni ana, hapai ae la oia i ke poo o Iehoiakina, ke alii o ka Iuda, a lawe ae la ia ia iwaho o ka halepaahao.
- 32 A olelo oluolu iho la oia ia ia, a hoonoho iho la i kona nohoalii maluna o ka nohoalii o na'lii e noho pu ana me ia ma Babulona.
- 33 A no ka lole o ka halepaahao, haawi ae la oia i lole hou; a ai mau oia i ka ai imua ona, i na la a pau o kona ola ana.
- 34 A o kana ai hoi, na ke alii o Babulona i haawi i ai mau nana, he puu no i kela la i keia la a hiki i ka la o kona make ana, i na la a pau o kona ola aua.

**Baibala Hemolele  
The Holy Bible in the Hawaiian language of the United  
States, 1868 revision**

Public Domain

Language: 'Olelo Hawai'i (Hawaiian)

Translation by: na na misionari i pai

2015-11-10

---

PDF generated using Haiola and XeLaTeX on 11 Nov 2022 from source files  
dated 9 Oct 2020

4fde4536-9f74-574b-8404-d9ec34a30cbb